

ЗАҲИРИДДИН МУҲАММАД БОБУР НОМЛИ
АНДИЖОН ДАВЛАТ УНИВЕРСИТЕТИ

Музайяна АМОНУЛЛОХОН (БОҚИР) ҚИЗИ

БОҚИРНОМА

ЁХУД
ДАДАМ ҲАҚИДА
ХОТИРАЛАР

«ANDIJON NASHRIYOT-MATVAA»
очиқ акциядорлик жамияти
2006

83.3(5У) Узбек адабиёти


Масъул муҳаррир – Фахрий профессор
Сайфиддин ҳожи Жалилов

Тақризчи - филология фанлари номзоди
Абдулазиз Абдулҳамидов

Музайяна Амонуллохон (Боқир) қизи.

Боқирнома ёхуд дадам ҳақида. Хотиралар. – Андикон, «Andijon nashriyot-matbaa» ОАЖ, 2006 йил. 108 бет.

Истеъдодли олим, хассос шоир Амонуллохон Валихонов –
Боқир адабиёт илмида, шеъриятда ўзига хос из қолдирган ал-
ломадир. Унинг қизи Музайянахон ёзган ушбу китобда бу оли-
жаноб инсоннинг ҳаёти, ижоди ҳақидаги маълумотларгина эмас,
у киши мансуб бўлган адабий давра, мұхит ҳақида ҳам
қимматли маълумотлар, хотиралар, зсдаликлар ўз аксини топ-
ган.



Андижон вилояти
Бобурноми ку-
тубхонаси
83-3(5Узб)
Б-90

©Музайяна Амо-
нуллохон қизи.
2006
©«Andijon
nashriyot-matbaa»
ОАЖ, 2006.

МАСЬУЛ МУҲАРРИРДАН

Не ҳүшким, ўлкамиз ҳурсандликларнинг маконидур,
Улуғ-ёш шоду ҳуррам, айшу нўшининг пайту, онидур,
Саҳар булбул тилида комронлиг достонидур,
Баҳор айёмидур, дози¹ йигитликнинг авонидур²,
Кетур, соқий, шароби-нобким, ишрат замонидур.

Азиз ўқувчи, Сиз бу гўзал мухаммасни ўқиб, Амонулло Валихонов деганлари эски мадрасаларда таҳсил кўрган, аруздан чуқур хабардор мўйсафид бир киши бўлса керак, деб ўйламанг. Иўқ, Амонулло Боқир XX аср иккинчи ярмининг одами, касби оддий ўқитувчидир. Шунга қарамай унинг Бобурдек улуғ санъаткор ғазалига бас келадиган мухаммас боғлаши шоёни таҳсиндир.

Ҳа, домла Валихонов замонамизнинг етук зиёлиларидан, шеърият мулкининг ҳазинабони ва ишончли пошибонларидан эди. Шу билан бирга, фикри тиниқ олим, фалсафий мушоҳадага бой мутафаккир, дўстлар ўлтиришларида эса, серзавқ улфат ҳам эди.

Камина у киши билан ўтган асрнинг 50-йиллари бошлиридан то умрларининг охирларигача - 40 йилча ҳамфир дўст, ҳамдард жўра сифатида бирга бўлдик. 20 йиллар чамаси институтда бирга ишладик.

Иккинчи жаҳон урушидан кейинги дастлабки йиллари Андижоннинг эски шаҳар қисмида Республика уйғур драма театри очилиб, биз эндиғина улфатчиликка ўрганган йигитчалар, театр қошидаги чойхонага чиққанимизда гоҳо шоирлар Мұхаммадхон Мажқурий, Абдуваҳоб Сайфий, Имодиддин Улфат, Абдулаҳад Анисий, санъаткор Қосимжон Охуновлар тўпини учратар эдик. 1946 йилнинг кеч кузи бўлса керак, бир куни шу гуруҳ билан шоир Собир Абдулла ва ёшгина шоир Амонуллохон ҳам бирга

¹ дози – тағин, яна , ҳамда.

² авон(а) – вақт, пайт, замон.

чойхонага кириб келишди. Амонулло новча, кўзга тезроқ ташланар эди. Одамлар орасида ийманиш билан бирга ҳурмат аралаш безовталаниш сезилди. Ўтирганларда «Тўрам қамалган эдилар, қутулибдилар», - деган шивир-шивир гап оралади. Кейин билдимки, уруш йиллари Амонуллохон тўра қандайдир сабаб билан қамоқхонада ҳам ётиб чиққан экан. У кишини биринчи кўрганим ва таниганим шундан бошланди. 50-йиллардан эса дўстлигимиз бошланди. Амонулло Валихонов шаҳар бухгалтерлар тайёрлаш курсида математика ўқитувчиси, мен эса САГУни битирган аспирант - шарқшунос иноқлашиб, дўстлашиб кетдик.

Амонуллохон хилча қоматли, ўйчан, атрофдагиларга синчковлик билан боқадиган, киприклири узун-узун, буғдоранг йигит эди. У сұхбатларда ҳам доимо ўйчан тутар эди ўзини. Бир куни дўстимнинг Тахтакўпrik маҳалласидаги уйида гурунглашиб ўтирганимизда, у шахсий кутубхонасидан Навоийнинг «Мұҳокаматул-лугатай» асарини олиб, 20 га яқин тушунилиши қийин сўзлар маъносини изоҳлаб берди. Ўшандаёқ математика ўқитувчининг тил бобидаги билимига қойил қолганман.

Амонуллохоннинг Андижондаги шоир - устоз акахонлари Мажкурий, Улфат, Анисий, Сайфий, улар орқали атоқли адиллар Гафур Гулом, Собир Абдулло, Ҳабибий, домла Боқий ва бошқалар унинг шеърий машқлари билан таниш эдилар. Дастребки машқларини ўқибоқ Амонуллога: «Сен шоирсан», дейишган. Аммо у камтарлигидан, қолаверса, шеъриятга бўлган ихлосидан узоқ вақт шоирлигини ошкор қилмай юрган (мавзудан ташқари бўлса ҳам айтайин: ёш шоирларимиз мана шу сифатга алоҳида зътибор бермоқлари лозим). Аммо ҳаётга, она табиатга, гўзалликка меҳр-муҳаббати шундай кучли, эҳтиросли эдики, холисона сұхбатларида ҳам ишқ-муҳаббат оҳанги уфуриб турар эди. Дарҳақиқат, шоир учун бундан ҳам яқинроқ мавзу борми? Ишқ вужудимизнинг маънавий раҳнамоси, инсон руҳий оламининг чароғбони-ку! Мана шу ишқ ёш Амонуллонинг қалб гулшанида эрта ўсган, кейинча бутун ҳаёти мазмунига айланган жавҳар бўлиб қолди. Менинг кузатишмча, Амонуллохон

кўпроқ Фузулийга ва Навоийга эргашарди. Урушдан кейинги йиллариFaфур Fулом Андижонга бир келганида дўстлари ёш Амонуллонинг ижод ниҳоллари билан таништирганлар. Faфур ака шоир ижоди мумтоз шеъриятимизга ҳамоҳанг эканига эътибор қилган. Хусусан, Фузулийнинг:

«*Ул паривашким, малоҳат мулкининг сultonидур,
Амр онинг амридур, фармон анинг фармонидур*»

матлаъли ғазалига Амонуллонинг:

«*Ул гўзалким, ҳукму фармонининг эл қурбонидур,
Ҳукм - онинг ҳукмидур, фармон - анинг фармонидур*»

матлаъи билан бошланувчи назираси устозга маъқул тушган ва Амонулло Faфур акадан кўп мақтовлар эшигган.

Етук адабиётшунос олим тўғри таъкидлаганидек, Улфат, Анисий, Boқир арузда гўзал ғазаллар яратсалар-да, «...лекин нашр эттиришга шошилмайдилар. Улар гўё ўзлари учун, ёр-дўстлари учун ёзадилар. Энг гўзал шеърлари улфатлари орасида ўқилиб, ҳаммага манзур бўлган тақдирда, шаҳардаги ҳофизлар репертуаридан жой олади, куйга тушиб, тўй-томошаларда халқимизга завқ-шавқ бағишлийди» (Тўхтасин Жалолов, «Ўзбек шоиралари», Т. 1960 й. 336-бет). Сайфий, Ҳабибий, Собир Абдулла каби ўзбек шеъриятининг «аруз қанотида учадиган» шоирлари суҳбатини ва тарбиясини олган ёш Амонуллохон Boқир тахаллуси билан ўзбек шеъриятининг Андижон гулшанида алоҳида ғунча бўлиб етилди ва умрининг охиригача ушбу гулшанда ўзига хос ҳид таратадиган гул бўлиб очилди. Boқир ҳазрат Навоийнинг «этаклари»дан маҳкам тутиб, унинг шеърияти уммонига шўнғиб кетди.

Амонулло Валихонов - Boқир шоирлигидан ташқари навоийшунос олим ҳам эди. Унинг бир қатор илмий ишлари кўлёзма ҳолида қолиб кетди. Навоийхонликка бағишиланган тадқиқотларини мавзуларга ажратган ҳолда 3-4 та китоб қилмоқ ниятида бўлганлигига ўзим гувоҳман. Олим улардан фақат иккита мавзуни - Навоий ижодида гул ва мусиқа мавзунини маҳсус тадқиқ қилиб нашр этти-

ришга улгурди (А. Валихонов. «Ғазал нафосати», F. Гулом номли нашриёт, 1985.) Камина ушбу асар мөҳияти, илмий-бадиий қіммати ҳақида сўз юритишдан ожизман. Фақат шуни биламанки, Эркин Воҳидов, Иброҳим Гафуров, Ёқубжон Исҳоқов каби Навоий муҳлислари Амонулло Валихоновнинг ушбу тадқиқотига алоҳида эътибор қаратдилар.

Зукко олим, нозиктаъб шоир Амонулло Валихонов Боқир Андижонда ЎзФА Навоий номли адабиёт музейининг филиалини оёққа турғизиш ва ривожлантириш борасида иқтидорли ташкилотчи эканлигини ҳам намоён этди. Музейнинг асосини ташкил этувчи нодир қўлёзмалар, Андижонда ўтган шоири адибларнинг архивларини тўплади ва мунтазам равишда музей хазинасини бойитиб, ҳатто бу ерда баҳоли қудрат тадқиқот ишларини ҳам бошлаб, самарқандлик катта олим, академик Воҳид Абдуллаевнинг музейга ташриф буюришига эришли.

Биз Амонулло Боқирни шоир ва олим сифатида кўпроқ билар эдик. Аммо унинг ҳозир Тошкентда яшаётган шогирдлари Маҳкам Маҳмуд Андижоний ва Ирфон Отажоннинг айтишларича, Боқир тарихий мавзуларда латиф ҳикоялар ҳам ёзган. Дарҳақиқат, унинг «Шарқ машъали» журналида чол этилган, Навоий ҳаётига оид «Дафъи хумор» номли ҳикояси сўз латофати ва назокати билан ўқувчига алоҳида завқ бағишлийди.

Боқирдан анчагина бадиий ва илмий мерос қолган. Унинг ушбу мероси адабиёт музейида сақланмоқда.

Боқир ҳаёт бўлганида бу йил 80 ёшга тўлар эди. Марҳумнинг қизлари Музайяна хоним қаламига мансуб ушбу эсдалик асар айнан унинг таваллуд кунларига бағишилангандир. Умид қиласизки, эсдаликлар шоир ва олим ҳаёти ҳамда ижодий олами ҳақида кўп нарсаларни ўқувчилар ёдига солади.

Сайфиддин ҳожи ЖАЛИЛОВ.
2004 й., декабрь

БИСМИЛЛАХИР РОҲМАНИР РОҲИЙМ

КИТОБНИНГ ЁЗИЛИШИ САБАБИ

Қиблагоҳим вафотларининг дастлабки кунлариданоқ ул зот умрларининг сўнгги даврларидағи армонли сиймолари кўз ўнгимга муҳрланган, руҳлари гўё менинг доимий ҳамроҳимга айлангандек эди.

Қайғули, ҳасратли кунлар, маросимлар ўтди. Қанча вақт ўтмасин, у кишининг умидли нигоҳи кўз ўнгимдан кетмас, армонлари мени «таъқиб» этаётгандек, қандайдир тадбир топишга даъват этаётгандек туюлаверди.

Бу, айниқса, аям вафотларидан сўнг янада авж олди. Чунки кейинги йўқотиш бизни анча довдиратиб қўйган эди.

Ўша кезларда қиблагоҳимнинг меросларини, - нечаничи бор билмайман, - кўздан кечираётib, бир ҳақиқатни англагандай бўлдим.

Назаримда, улар қолдирган шеърлару бадиҳалар, турли мактублару мушоаралар, таъриху тадқиқотлар тафаккур ҳосиласигина бўлмай, у кишининг феъл-авторлари, ўйлари ифодаси ҳам эди. Шунда у кишининг олдиларидағи фарзандлик бурчим нимадан иборатлигини англагандек бўлдим. Бошқача айтганда, бу бебаҳо бойликни жамламаслик, наслу наасаблари тўғрисида, феъл-авторларию ҳаётга муносабатлари ҳақида муҳлисларига, келажак авлодларга маълумот бермаслик дуруст эмаслигини ҳис қилдим.

Яратганинг ўзига таваккал қилиб, бўш кунларимни мутолаага сарфладим. Орадан маълум муддат ўтди. Бир оқшом мутолаадан ҳориб, кўзимни уйқу элтиб, туш курдимми, ё ҳаёл огушида пайдо бўлган тасаввурми, менга мақсадга элтувчи йўлни кўрсатаётгандек бўлди:

Уйимизнинг очик ромидан ҳовли томонга қараб турган эмишман. Иттифоқо, ҳовли томондан 10-15 чоғли нуроний мўйсафидлар бизникига кириб кела бошладилар. Уларга пешвоз чиқаётib, чўчиб уйғониб, ўзимга келдим.

Кутылмаганда менда бир журъат, дадиллик пайдо бўлди. Нуроний мўйсафидларни ўзимча аждодлар руҳи сифатида тасаввур этдим.

Шу воқеадан уч-тўрт кун ўтиб, тасодифан кўчада дадамнинг қадрдан дўсти, хонадонимизнинг доимий азиз меҳмони Сайфиддин ҳожи aka Жалилов билан учрашиб қолдим. У киши салом-аликдан сўнг:

- Учрашиб қолганимиз жуда яхши бўлди. Бир маълумот керак эди. Қайси куни уйларингизга борсам қулай бўлар экан? - деб сўраб қолдилар. Шунда мен:

- Якшанба куни аямизга эҳсон қилмоқчимиз, шунга ташриф буюрсалар, бизни хурсанд қилардилар, - дедим.

У киши рози бўлдилар.

Бу 1998 йилнинг апрель ойларида бўлган эди.

Белгиланган куни домла хонадонимизга келдилар. Одатларича, аямизни ёд олиш учун келган меҳмонларни кузатишдилар. Кўп одам келганлиги учун маросим чўзибироқ кетди. Меҳмонларни деярли кузатиб бўлгач, домла ўз муддаосига кўчдилар:

- Мен тақдир тақозосига кўра, уч ойча муддат Саудияда бўлдим ва у ерда муҳожир ижодкор ватандошларимизнинг тақдири билан қизиқдим, уларнинг меросларини имкон даражасида жамлашга ҳаракат қилдим. Шу сафар давомида, тасодифан Қудратиллохон тўрамнинг шеърлар дафтари қўлимга тушиб, у кишининг Амонуллохон тўрамга қариндошликлари борлигини эшишиб қолдим,

- дедилар ва у кишининг дадамизга қай жиҳатдан боғланишларини билмоқчи бўлганликларини айтдилар.

Мен шажарамиз ҳақидаги бор маълумотларни олиб чиқиб кўрсатдим ва Қудратиллохон тўрамга оид дадамдан эшиган баъзи воқеаларни айтиб бердим. Домла шажараларимиз тарихини кўздан кечирар эканлар, унга қизиқиб қолдилар ва олиб кетиб, чуқурроқ танишиш истаги борлигини айтдилар. Биз рози бўлдик.

Орадан маълум муддат ўтгач, Сайфиддин ҳожи домла омонатни қайтарар эканлар:

- Бу - бебаҳо бойлик. Эсиз, алломанинг шундай шажаралари тарихи, унинг бошқа меросларига ўхшаб биз-

нинг лоқайдлигимиз, ўз тарихимизга, адабий меросимизга эътиборсизлигимиз, унга менсимай муносабатда бўлишимиз туфайли, худди соядек ўчиб бормоқда. Афсус..., - дедилар ва чуқур «уф» тортдилар.

Бу менга қаратилган таънадек вужудимни ларзага солди. Қалбимга қачонлардир тушган чўғни алангалатгандек бўлди.

Чуқур хаёлларга берилиб, юрган кунларимнинг бирида яна туш кўрдим:

Ҳовли томондаги уй даҳлизи эшиги катта очиқ. Мен даҳлиз остонасидан ичкари мўраладим. Даҳлиз ўртасига, бир вақтларда бўлганидек, катта хонтахта қўйилган. Атрофига якандозлар тўшалган, хонтахта устида Ойбувим(катта онам)ларнинг доим ўқиб турадиган табаррук «Куръон»лари. Хонтахта ёнига бамайлихотир жойлашиб олган Ойбувимларнинг бошларидағи оқ рўмоллари юзларидан таралаётган ёлқинли нурни янада жилолантираётгандай. Ёнларида қиблагоҳим деразадан ҳовли томон назар ташлаб тик турибдилар. Шунда ҳовли тўла одам эканлигини ва улар ниманидир кутаётганикларини хис қилдим. Шу пайт мени дадам чақириб қолдилар. Остона хатлаб, оҳиста ичкари кирдим. Ойбувимлар ёнларидан жой кўрсатдилар. Ўзларига хос мулойим овозда ўтиришга таклиф қилдилар. Мен одоб билан у кишининг ёнларидан жой олдим. Ойбувимлар «Куръон»ни секин мен томонга суриб қўйдилар ва:

- Ўқинг! - дея амр қилдилар.

Ҳовлидаги одамларнинг салобати, Ойбувимлар ва дадамнинг жиддий нигоҳлари мени саросимага солиб қўйган эди. Мен бир қанча фурсат тараддуdda туриб қолдим.

Шу пайт дадамлар мулойим ва ёқимли овозда:

- Музайянахон, ойимизни музтар қилмай, ўқинг, - дедилар.

Борлиқ сукунатга чўмган. «Тиқ» этган товуш эшитилмайди. «Қайси сурани ўқисам экан?..»

Хаёлимдан кечган бу саволни Ойбувимлар сездилар шекилли, «Ёсин» сурасини очиб қўйдилар. Ҳаяжон билан

үкій бошладим. Овозим шу қадар тиниқ, жарангли чиқдики, бунга үзим ҳам ҳайрон қолдим. Учинчи оятни үқиб бұлғач, уйғониб кетдим. Қалбимда ажиб бир ҳис, вұжудимда үзгача бир титроқ ҳукмрон әди. Завқли зхтирос, тасаввур қилиб бўлмас ёрқин туйғу ичра қолгандек бўлдим.

Бир қанча муддат туш таъсиридан қутула олмадим. Уни турлича таъбир қилдим. Бу - қўлга қалам олиш учун руҳларнинг даъвати әди гўё.

Шу тариқа узоқ кунлар дадамнинг меросларини яна кўздан кечира бошладим. У киши ҳақида ёзилган хотира-ларни жамладим, қиблагоҳимга алоқадор ҳамма манба-ларни назардан ўтказдим. Аммо мақсадга хизмат қилувчи фикрлар асов отек тутқич бермас, уларни «жиловлашга» ҳали ожизлигим сезилиб қоларди. Шундай дақиқаларда умидсизлик, қатъиятсизлик гирибонимни тутар, ночор қолганлигимдан кўзларимдан ёшлар қуйиларди.

Яна туш кўрдим:

Ховлида тумонат одам. Ўртага жойнамоз ёзилган. Унинг олдида дадамлар. Имомгарчиликка ўтмоқлик учун шайланиб турибдилар. Уларнинг ортида иқтидо қилув-чилар. Кутимаганда мени чақириб:

- Сиз аzon айтинг! - деб қолдилар.

Эътиrozга ўрин йўқ. Жамоат кутиб туриди. Бор овоз билан «азон» чақирдим.

Худди шу дақиқада ўз овозимдан чўчиб, уйғониб кетдим.

Қиблагоҳимнинг унсиз овозлари эшитилгандек, у қалб кўзимни очгандек, сир пардасини кўтариб, ҳақиқатни англатгандек бўлди:

- Эй, муштипар нури дийдам! Сизнинг «азон» айтишга даъватингиз аждодларимиз хоҳиши, уларнинг сизга меҳ-рибонликлари, сизни ўз ҳимояларига олганликлари ифодаси әди. Иншооллоҳ, хайрли ниятларингиз амалга ошишида, мушкултларингиз күшойишида уларнинг раҳнамолиги тарк бўлмагай.

Кўзим «ярқ» этиб очилди. Эрта тонгдан бошлаган ишни поёнига етказиш учун қатъий ҳаракатни ният қилдим.

Иншооллоҳ, «ота васияти»нинг бажарилиши - имон бутлигига боис бўлар. Ушбу рисоладан баҳра олган ҳар бир кимса ўтмишдошларимизни, уларга поклик, ҳалоллик, тўғрилик йўлини кўрсатишга ҳаракат қилган бу зотларни эъзоз билан ёдга оларлар, уларнинг ҳақларига бир-икки калима оят тиловат этиб, руҳларини шод этарлар. Истиқлолимиизни орзу қилиб ўтганлар қатори қиблагоҳимиз номини ҳам ёдга оларлар, деган умиддамиз.

ПУРВИҚОР ҚОЯЛАР БАҒРИДАГИ ЧАШМА

*Соҳиби илми ладун¹ эрди, багоят покрой,
Обрў топган эл ичра, илм элин сардафтари.
Шеър илмин номдори, зеҳни равшан кун каби,
Наср дунёсида гўё эрди меҳри ховари.²
Хулқ отвори мулойим, сўзлари жондек лазиз,
Нутқи гавҳарпошига³ ошиқ эди элнинг бари.
Маҳзани мөхру, вафо эрди кўнгил ганжинаси,
Олами инсоният ичра садоқат заргари.*

(Улфатнинг «Таърих-марсияси»дан)

«Амонуллохон Андижоннинг кўрки бўлган хассос шоир, ажойиб тадқиқотчи олим эди. У кишининг оналари Шарқ адабиётининг, тарихининг билимдонларидан эди. Амонуллохон ислом дини ақидаларини, тасавуфни чукур билар, уларнинг шеъриятдаги ўрнини, аҳамиятини тўлиқ англарди. У академик даражасидаги олим эди. Тарихни, айниқса, Шарқий Туркистон тарихини яхши биларди. Уни Ҳамид Орасли, Воҳид Абдулло, Ғафур Гулом, Порсоҳон

¹ илми ладун (а) – ҳудо томонидан берилган деб ҳисобланган илоҳий илм, яъни тугаса қобилият.

² меҳри ховар (ф-т) – шарқ қуёши, қуёш.

³ гавҳарпош (ф) – чиройли сўз айтмоқ.

Шамсиев ва бошқа қатор фан арбоблари яхши билар, алоҳида ҳурмат, эҳтиром билан муомала қилардилар».

(Ўзбекистонда хизмат кўрсатган фан арбоби, профессор Фанижон Абдулаевнинг Boқир таваллудининг 70 йиллиги муносабати билан ўтказилган хотира кечасида сўзлаган нутқидан).

*Дидли Boқир мисрасига дош беролмас марварид,
Гоҳ бўларди ишқда мажнун, гоҳ сукутли мўйсафиid.
Хулқу одоб бобида эрди ҳалойиқ дилбари,
Зоти Офоқ Xожадан, еттинчи бўғин гавҳари.*

(Иқтисад фанлари доктори Абдуманноб Эгамбердиевнинг «Андижонийлар» қасидасидан)

Қиблагоҳимиз Сайийд Амонуллохон тўранинг аждодлари ҳақида, у кишининг шахсиятлари, илмдаги салоҳиятлари, инсоний фазилатлари, турмуш тарзлари ҳақида батафсироқ тўхталиш зарурати, рисола ибтидосининг «Пурвиқор қоялар бағридаги чашма», - деб номланишига сабаб бўлди.

Пурвиқор қоялар ўзларининг азим ва маҳзун салобати, ўзига хос кўриниши, кўрки, шукуҳи билан борлиқ бутунлигини, унинг турфа оламлигию, мўъжизаларга тўла ўзлигини намоён қилувчи кўзгу, шу билан бирга, қанчаканча сир-синоатларнинг шоҳиди, ўз қаърида ададсиз хазина-дафиналарни яшириб ётган жумбоқли тилсимотdir.

Зоҳиран, улар мағрур. Мағрурлик - уларнинг сифати, ботиний оламининг ҳифзу-ҳимоясини таъминлаш воситаси.

Шунинг учун бу мағрурлик ҳар қандай кибру, ҳаводан, ўзига бино қўйишдан узоқ бўлган мағрурликдир. Уларнинг алларникидек урён қоматлари сабр-бардош либослари билан зийнатланган. Улар борлиқнинг ҳар қандай синовларига қоим турадилар, ҳар бирларига шукроналиқ билан шокирлик қиласидилар.

Қояларнинг сирли олами ҳақида мушоҳада қилар эканман, хаёлан қиблағоҳим нигоҳларидан ўтказилган шажарамиз тарихига назар ташлайман. Аждодларимиз тимсолида қояларга қиёслагулик ибрат, ҳикмат кўргандек бўламан.

Ҳикмат:

Жувонро сұхбати пирон ҳисори оғият бошад,

Ба хоку, хун нишинад тир, чун дур аз камон афтоғ.

(Бедил)

Улуғлар сұхбати ёшларга сақланмок учун қўргон,

Камондан ажрагач, ўқ қонга ё тупроққа булгангай.

(Боқир таржимаси).

Дарҳақиқат, қиблағоҳимиз Амонуллохон Валихонов ҳаётлари давомида улуғлар сұхбатига эътиқод қилганлар ва имконлари қадар улар «хизмати»га боришни, улуғлар пандлари битилган китоблардан баҳра олишини яшаш мақсади деб билганлар. Шунингдек, ўз аждодлари ўтмиш тарихини ҳам синчилаб ўргангандар.

Яратганга шукрлар бўлсинким, биз у кишининг саъи-ҳаракатлари сабаб, ўз аждодларимизнинг ким бўлганликларини, уларнинг ўз даврларидағи касбкорларию, хизмат поялари ва мавқеларини, ҳаётлари мазмунларини англаб олиш шарафига муссар бўлдик.

Ана ўша манбалар шоҳидлигича, дадамиз Сайид Амонуллохон тўра Валихонов (шеъриятда «Боқир» тахаллусини истифода қилганлар) пайгамбаримиз Муҳаммад Мустафо (с.а.в.)нинг 22-авлодлари бўлмиш Маҳдуми Аъзам ва бу улуғ зотнинг тўртинчи бўғинига мансуб Офоқ Ҳожа наслидан бўлганлар.

Бу зотларнинг ҳаётлари ва фаолиятлари асосан Шарқий Туркистон билан боғлиқ бўлганлиги сабаб, бу юрт тарихига қисқача тўхталиб ўтиш вазифамизни енгиллаштирас, деб ўйлаймиз.

Ажодлар тарихига бир назар:

Шарқий Туркистанда Ёркент хонлиги қарор топғандан кейин, таҳтта Султон Саидхон (1515 - 1533) зғалиқ қылған даврда, Маҳдуми Аъзам ҳазратлари 1525 йили Ёркентта келадилар.

Маҳдуми Аъзам - Сайид Аҳмад ибн Сайид Жалолиддин Хожаги Косоний ал-Фарғоний (868-949), (1463-1542) нақшбандия таълимотини бир тизимга солган, ўз даврининг етук пир орифларидан бўлган.

Маҳдуми Аъзамнинг тасаввуфнинг нақшбандия тариқати назарий асосларини белгиловчи «Жомеъ-ул-мақомот», «Одоб-ус - солиҳин», «Ганжнома», «Асрор-ун-никоҳ», «Рисолайи Бобирия» каби асарлари бизгача етиб келган ва улар Абу Райҳон Беруний номли Шарқшунослик институти хазинасида сақланади.

Шарқий Туркистанда ислом динининг кенг тарқалиши ва нақшбандия тариқатининг етакчи таълимотга айланиши Маҳдуми Аъзам, унинг авлодлари номлари билан узвий боғлиқдир.

Маҳдуми Аъзам авлодлари мамлакатдаги сиёсий курашларда фаол қатнашганлар, хонлик таҳтига даъвогар-лик ҳам қылғанлар.

Маҳдуми Аъзамнинг энг катта ўғиллари Мұҳаммад Амин хожа - Хожай Калон бўлиб (Мұҳаммад Амин хожани шарқий туркистанликлар уйгур тили ва талаффузидан келиб чиққан ҳолда Мұҳаммад Эмин деб атаганлар), бу кишининг ўғиллари эса Мұҳаммад Юсуф хожадирлар. У киши Мозори Файз ёки Мозор Подшоҳ сифатида танилганлар.

Мұҳаммад Юсуф хожанинг ўғиллари Ҳидоятуллоҳ хожа бўлиб, тарихда Офоқ хожа номи билан машҳурдирлар.

Офоқ хожанинг оналари Зулайҳо бегим Қашқар саййидларидан Сайид Алоуддин авлодларидан бўлмиш Мир Сайид Жалилнинг қизи бўлган.

Хожа Ҳидоятуллоҳ 1625 йили Кумулда туғилганлар. Бу оила 1638 йилда, яъни Ёркент хони Абдуллоҳон (1638-1668) даврида Қашқарга кўчиб келади. Офоқ хожа 1660

йили Йўлбарсхон (1668-1670)нинг амакиси Убул Ходибекнинг қизига уйланади.

Офоқ хожанинг беш ўғли ва икки қизлари бўлган. Ўғиллари: Яҳё хожа (Хонхожа), Маҳди хожа (Подшоҳхожа), Абдусамад хожа, Ҳасан хожа (Фози подшоҳ) ва Қилич Бурхониддин хожалардир.

Офоқ хожа хонлик таҳтини эгаллаш учун Ёркент хони Исмоилхонга қарши кураш олиб борди ва 1692 йили уни қўлга киритиб, 1694 йилга қадар ҳукмронлик қилди. (Омонбой Жалилов. «Офоқ хожа». «Мулоқот» журн., Т. 1993. 53-54 бетлар).

Офоқ хожанинг хонлик таҳтини қўлга киритиши билан 300 йил давом этган чингизий Чигатой авлодлари ҳукмронлиги тугатилиб, Хожалар сулоласига асос солинди. Бу сулола XVII-XIX асрлар давомида Шарқий Туркистоннинг ижтимоий-сиёсий ҳаётига ўз таъсирини ўтказиб келди ва мамлакат мустақиллигини сақлашга қаттиқ ҳаракат қилди. Бу ҳаракат, айниқса, Шарқий Туркистон ҳалқининг Манжур - Хитой сиёсатига қарши олиб борган фаолиятларида ёрқин кўзга ташланди. (Омонбой Жалилов. «Офоқ хожа». «Мулоқот» журн., Т. 1993. 54-бет).

Офоқ хожа Ёркентда, Қашқарда, умуман, бутун Шарқий Туркистон худудида кўплаб масжид-мадрасалар, хонақоҳлар қурдирди. Чунончи, Қашқардаги «Хонхожа ўрдаси», «Масжиди жомеъ», Ёркентдаги «Олтин мозор» ва Кумул, Турфон, Илидаги қатор масжид-мадрасалар ана ўшалар жумласидандир. Бир қатор манбаларнинг кўрсатишиларича (кўрсат. асар, 57-бет), Офоқ хожа даъватлари таъсирида тўрт юз мингга яқин киши ислом динини қабул қилган.

Сайид Офоқ хожа ўз фарзандлари Хонхожа, яъни Яҳё хожа билан икки йилу, икки ой (1692-1694) ҳукмдорлик қиласидилар ва 1694 йили 69 ёшларида бу дунёни тарк этадилар. У зотнинг жасадлари Қашқарнинг Ёғду деган еридаги «Офоқи алайҳи» мақбараасига дафн этилади.

У кишининг вафотларидан сўнг Ёркент хонлиги таҳтига ўғиллари Маҳди хожа (Подшоҳхожа) ўтириб, 1694-1696 йилларда ҳукмронлик қиласидилар.

1694 йилда вафот этган Яхё хожадан уч фарзанд бўлиб, бир ўғилларининг исми Аҳмад хожа (1737-1738) эди. Аҳмад хожа Қашқарда хонлик қилганлар. Унинг икки ўғиллари бўлган: Бурҳониддин хожа (1755-1759) ва хожа Жаҳон (1759). Тарихий манбаларда қайд қилинишича, Шарқий Туркистон Чин империяси томонидан 1757 йилда истило қилинган. (Омонбой Жалилов. «Шарқий Туркистон хожаларидан Маҳдуми Аъзам авлодлари шаҷараси». «Туркистон тарихи» журн. Т. 1994 й., август. 12-бет). Қашқар ҳукмдори Бурҳониддин хожа ва Ёркент хони хожа Жаҳон 1759 йилнинг октябррида хитойлар томонидан Пекингга олиб келинади ва ўша ерда дорга осиб ўлдириладилар.

Бурҳониддин хожанинг ўғиллари Сайид Муҳаммад хожа ва Абдуҳолиқ хожалар эди. Сайид Муҳаммад хожанинг уч ўғли бўлган. Улар: Юсуфхон хожа, Жаҳонгир хожа, Маҳмудхон (иккинчи исмлари Баҳовуддин хожа)-лар.

Дадамнинг хотираларидан:

«1758 йили хитойлар Қашқарни олган чоғда Оғоқий хожаларни қирғин қилишган. Ҳали чилласи чиқмаган хожа Юсуфхонни оналари ўз хизматкорлари Қурбон охунд ва Ашурхон оналардан илтимос қилиб, дош қозон остига яшириб, сақлаб қоладилар ва тунда уларга мурид бўлган уйғурлар ёрдамида чақалоқни шаҳардан олиб чиқиб кетадилар. У Бухорога олиб келиниб, Қурбон охунд ва Ашурхон оналар қўлида тарбияланади. Бола бир оз улғайгач, уни дастлаб Тошкентга, сўнгра Андижонга олиб келадилар». (Шу ўринда дадам бир оз адашганлар. Чақалоқ Юсуфхон эмас, Сайид Муҳаммад хожадир. Бу тарихий таққосланди).

Юсуфхон хожанинг икки ўғиллари бўлган: Муҳаммад Амин хожа - катта хонтўрам, Абдуллоҳ хожа - кичик хонтўрам (Муҳаммад Амин хожа Валихон хожанинг опаларига уйланган, улардан Ҳакимхон тўрам тугилганлар). Жаҳонгир хожанинг ўғиллари Бузрукхон хожа эди. Манбаларда қайд этилишича, 1825-1828 йилларда Чин империя-

сига қарши қўзголон кўтарган ҳазрат Жаҳонгирхон авлиё Офоқ хожа номини коғирлар томонидан булғанишдан сақлаб қолган.


Маҳмудхон (Баҳовуддин хожа)дан эса Валихон хожа дунёга келдилар. Бу авлодни Шарқий Туркистонда «хожалар» дейишган, Узбекистонда «тўралар» ёки «сайидлар» деб атайдилар.

1825-1864 йилларда нақшбандия, «Хожагон» тариқатига мансуб қошғарлик хожалар, Валихон хожанинг амакилари Жаҳонгир хожа (1825-1828), Муҳаммад Юсуф хожа (1830), унинг ўғиллари Муҳаммад Амин хожа, ёки «Катта хонтўрам», шунингдек, тарихда «Етти хожалар исёни» номи билан машҳур бўлган Валихон хожа - Валихон тўра бошчилигида Чин империясиға қарши кўтарилиган қўзғолонлар (1857) (А. Д. Исиевнинг «Ўйгурское государство Йэттишаар» номли асарида бу воқеалар санаси 1847 йил деб берилган) бу авлод тарихи ҳақида тасаввурни кенгайтирувчи маълумотлардир. (Б. Аҳмедов «Марказий Осиё тарихий манбаларининг ўрта асрларда Ўрта Осиё билан Хитой ўртасидаги савдо, сиёсий ва маданий алоқаларни ўрганишдаги ўрни». «Тарихдан сабоқлар». Т. 1994 й. 273-бет).

Шунингдек, «Тавориҳи Ҳамсайи шарқий» номли манбадан қўйидаги маълумотни келтириш ўринлидир (Қурбон Али Аёгузий асари):

«Жаҳонгир хожа ва Юсуфхон хожа қўзғолонларидан сўнг хитойлар маҳаллий халқнинг исён кўтаришидан хавфсирай бошладилар. Улар Қўқон хонлигига ўз элчиларини йўлладилар ва қўл остидаги шаҳарлардаги хожаларнинг Қошғар (ўша даврда Қашқар эмас, Қошғар деб айтилган – муалл.) томонга ўтишларига монеълик қилиш тўғрисида музокаралар олиб бордилар. Бунинг звазига Қўқон хонига ҳар йили ямбу (кумуш ақча: оғирлиги 50 «ян» - 1,8 кг) билан ўлпон тўлаб туришга ваъда бердилар.

Қўқон хони хожаларни Қошғарга ўтказмаслик мажбуриятини олди». (Бу воқеалар 1825-1830 йилларда Ноидиранинг ўғли Муҳаммад Алихон хонлиги даврида бўлиб ўтган).



Хожалар сулоласидан энг сўнгги ҳукмдорлик Валихон хожага ва Муҳаммад Амин хожанинг ўғли Ҳакимхон хожаларга насиб этган.

Кейинчалик, ҳукм юритиш Қошғарнинг сўнгги амири Ёқуббекнинг қўлига ўтиб кетган.

Изоҳ:

Ёқуббек Муҳаммад Амин хожа ва Валихон хожаларни хийла билан заҳар бериб ўлдириб юбориш орқали ҳокимиятни бутунлай ўз қўлига олган.

Бу ҳақда Қўқон хони Худоёрхон қўлида 12 йил ва Еттишаҳаар ҳокими Ёқуббек қўл остида ҳам яна 12 йил давомида мұхим лавозимларда бўлган Мирза Аҳмад қүшбеги ўзининг Ёқуббек ҳақидаги хотираларида шундай ёзади:

«Мен баъзи масалалар юзасидан Алимқул (Худоёрхон ва унинг укалари ўртасида таҳт учун кураш авж олган ушбу даврда Алимқул Қўқон хонлигига мингбоши лавозимида фаолият кўрсатган) ҳузурига борган эдим. Суҳбат давомида Алимқул руслар тортиб олган ерлар ўрнини бошқа жойлар, жумладан, анча тартибсизликлар рўй берётган Қошғар (Шинжон) ерлари ҳисобига тўлдириш нияти борлигини айтди ва Қўқон таъсирига тортиш учун Қошғарга кимни юборсак, деб маслаҳат сўради. Мен ўйлаб ўтирмай, Ёқуббекни тавсия қилдим.

...Шундан сўнг Ёқуббек Офоқ хожа авлодларидан бўлган Бузрук хожа билан бирга Қошғарга юборилди. Тўғрисини айтганда, Қошғар ҳокимлигига Бузрук хожанинг амакиси Муҳаммад Юсуф тўранинг ўғли Муҳаммад Аминнинг хуқуки кўпроқ эди. Муҳаммад Юсуф тўра бу хонликка аввал З йил ҳукмдорлик қилган, хитойлар билан урушда ғалаба қозонишига кўзи етмагани учун 12 йил муқаддам давлатни ташлаб чиқиб кетган эди.

Бузрук хожа иродаси бўш эди... Хожаларнинг иккови ҳам бу пайтда Тошкентда яшар эдилар.

Бу орада Алимқул ҳалок бўлиб, Тошкент руслар қўлига ўтади... Мен Қошғарга отландим. Муҳаммад Амин хожа ҳам Қошғарга отланиб, мени ўзига ҳамроҳ бўлиб боришга ундинди... Ҳалқ ҳам, қўшин ҳам Қошғарга келган

Мұхаммад Аминдан вилоятни бошқаришни ўз құлига олишни сүради. Бундай вазиятда Бузрук хожага энг яхши чора Қошгардан чиқиб кетиш зди...

Бир ҳафтадан сүнг Маккага ҳажга боришни важ қилиб шаҳардан жұнаб кетди...

...Мұхаммад Амин Бузрук хожа ўрнига үтиргани билан бутун давлат ишлари Ѓекубекнинг құлида зди. У мени Маролбошига дунгонларни қувиб юборишга жүнатди. Мен шаҳарни құлға киритиб, бу ҳақда Ѓекубекка хабар қилдим. Лекин хатимга келган жавобда Мұхаммад Амин хожа вафот этғанлиги баён қилинган зди... Күпчилик Мұхаммад Амин хожа заҳарланған, деб шубха қиларди...

Унинг ўлимидан икки ой кейин Валихон тұра ҳам оламдан үтди (1866).

Айтишларича, бетоб ётган Валихон тұра ҳузурига Ѓекубек ўз одамларини юборған. Ўзларини табиб деб күрсатған бу кишиларни тұра қабул қилғанлар. Улар эса у кишига заҳар берғанлар.

Мұхаммад Амин хожа вафотларидан сүнг ҳокимият унинг ўғли Ҳакимхон хожа құлларига үтиши керак зди...» (Акмал Акрам ўғли. «Қошгарнинг сүнгги амири». Г. «Туркестон», 1992 й. август).

Бу воқеалар хусусида дадамнинг зсдаликларидан:

«1865 йили Алимқұл үлдирилгач, Сайдхон (Худоёрхоннинг укаси) тарафдорлари Қашқарға қочғанларида Мұхаммад Амин хожа «Катта тұрам» ҳам бирға здилар. У киши Қашқарға боришлари билан Бузрукхон тұра ўрнига хон сайланадилар...

...҆Екебек у кишининг мустақилліктерини күргач, гаров тариқасида ўғли Ҳакимхонни «үғирлатиб» олдириб боради. (Бунга ҳам Катта тұрам қарши здилар, Худоёр ҳам истамасди). Уни Маролбошига ҳоким қилади. Лекин күп үтмай отаси Іекебек томонидан үлдирилиб, ўзи күчли бир душманга қарши бўлган курашда, унга дош беролмай хавфда қолади. Бунинг устига Валихон тұра ва бошқа бир қанча яқынлари Іекебек томонидан үлдирилганлигини эшитган Ҳакимхон Қашқардан қочиб, (ҳозирги Андижон вилоятидаги) Шахрихонга яқин бўлган Ортуш

қишлоғида (Қашқарга яқын жойдаги Ортушдан қочган мұхажирлар қишлоғи) жон сақлады.

Валихон тұра Ёғду қишлоғидаги «Хожай Офоқий» мақбарасига дағын этилғанлар. Валихон тұранинг бир қызлари ва икки ўғиллари бўлган. Катта ўғилларининг исмлари Сайид Қодирхон тұрам бўлиб, улар кўпроқ «Асакахон тұрам» номи билан машҳур бўлганлар.

Кенжә ўғилларининг исмлари Жўрахон тұрамдирлар.

Қизларини «Ҳожи Оптов» деб аташган.

Ҳакимхоннинг тўрт ўғиллари бўлган: Маҳмудхон (яна бир исмлари Муҳаммадхон), Иноятуллохон, Ҳидоятуллохон ва Қурратуллохон тўралар.

Дадамнинг хотира дафтарларидан:

«1858 йилги қочища Валихон тұрам Кетмонтепага келадилар (Кўқон хонидан андиша қилиб). У ерда бир неча йил истиқомат қилғанларидан сўнг 1864 йилда яна Қашқарга кетадилар. Мана шу қочқин бўлиб юрган пайтларида Валихон тұранинг маҳрамлари Тўра пошшам бошқаларга сездирмаслик учун лўли қиёфасига кириб, у кишининг хузурларига келадилар ва бирга яшайдилар.

Валихон тұрам Қашқарга кетиш олдидан ўз маҳрамлари Тўра пошшага: «Аллоҳ яна бизга Сайид Қодирхонга жўра қилиб ўғил фарзанд берса, исмини Жўрахон қўйинг», - деб айтганлар.

Худди шу йиллари Жўрахон тұрам дунёга келганлар».

Сайид Қодирхон - «Асакахон тұрам»нинг фарзандлари бўлмаган.

Жўрахон тұрамнинг уч ўғиллари ва саккиз қызлари бўлган.

Дадам Амонуллохон тұрам (ёки Сайид Бокирхон) Жўрахон тұрамнинг кенжә ўғиллари бўлганлар.

Сайид Қодирхон - «Асакахон тұрам» назаркарда киши бўлганлар. Оиласда тұнғич ўғил сифатида у кишининг ҳурматлари юқори бўлган. Таҳт вориси сифатида ҳам мавқелари баланд эди.

Синглим Қамархоннинг хотираларидан:

«Ойбувимлардан ва бошқа ёши улуғ кишилардан эшитишимча, дадамнинг амакилари асримиз бошларида Асакадаги «Тўра чеки» мавзесида яшаган Сайид Қодирхон ибн Сайид Валихон ҳазратларининг ўрис босқинчиларига қарши халқ манфаатлари йўлида қилган ҳаракатлари, миллатига, эътиқодларига садоқатлиликлари туфайли халқ у кишини ҳурмат билан «Асақаҳон тўрам» деб атаганлар».

Жўрахон хожа Сайид Авлиёҳоннинг «Мовароуннахр сайдилари» китобидан:

«Уйгурободда бир мўйсафид истиқомат қилади. Ёшлари 95 да. Миллати - уйғур. Исм-шарифлари Юнусали қори Исҳоқ ўғли. У киши шундай ҳикоя қиладилар:

- Мен ҳам кўпгина уламоларнинг ва сайдиларнинг таълимларини олганман. Кўпларининг хизматларида бўлиб, сұхбатларидан баҳраманд бўлганман. Сайдилар деҳқончиликка, боғ ўстиришга берилган, санъатсевар халқ эканлигини яхши биламан. Ҳаётимда бу нарсаларнинг ўзим гувоҳи бўлганман.

Ҳамон эсимда, Асақаҳон тўрам Валихон тўрам ўғиллари деган сайдид авлодларидан ажойиб бир зот бор эдилар. Отга меҳр қўйиб, овга чиқар, катта сайлларда улоқ чопишни ёқтирад эдилар. (Илоҳи ул зоти шарифни худо раҳмат қилсин). Бир куни совуқ хабар келди: қазо қилибдилар. Таъзияга бориб, ғаройиб бир воқеанинг гувоҳи бўлдик. Хушбичим, чиройли кўк от тиз чўкиб, гоҳо тик туриб йигларди, кўзларидан шашқатор ёш оқарди...

Во дариг! Жонивор ҳам ўз хожасига инсон каби меҳр қўйган бўлса-я!..

Шу манзарани кўриб, тумонат одам орасида йигламагани қолмагани ҳозиргидай эсимда».

Шажара тарихининг давоми:

Жўрахон тўрам кенжা ўғилларини ҳар доим жони омонда бўлсин деган ниятда Амонуллохон деб ҳамда акаларига ҳурмат юзасидан Сайид Қодирхонга лафздош қилиб, Сайид Боқирхон деб ҳам атаганлар.

Боқирхон исмлари, кейинчалик дадамларга тахаллус бўлиб қолган.

Биз, набиралар, Асакахон тўрамни «хон бува», Жўрахон тўрамни эса «хон дада» дер эдик.

Жўрахон тўрамнинг ҳарамлари ҳақида:

Моҳлар ойим. Бўтақоралик Долимбойнинг қизи эди. Моҳлар ойим қиз фарзанд кўради, исми *Адолатхон* пошша қўйилиб, у чақалоқлик пайтидаёқ она вафот этади. Шунда Долимбой иккинчи қизи Гулхон ойимни ҳам Жўрахон тўрага никоҳлаб беради. Гулхон ойим Адолатхон пошшани вояга етказиб, Юсуфхон тўранинг (Орифхон тўранинг дадалари) акалари Холматхон тўра (Булар Андижоннинг Булоқбоши қишлоғида яшар здилар)га узатадилар. Амма ундан фарзанд қолмай вафот эттан. Гулхон ойимнинг Амирсойибхон исмли қизлари бўлиб, у вояга етганда Ҳакимхон тўранинг Иноятуллохон тўра исмли ўғлига узатилади.

Амирсойибхон пошша ва Иноятуллохонлар «кулоқ сиёсати» пайларида Афғонистонга кетиб қолганлар ва ўша ерда вафот этганлар. Уларнинг икки фарзанди бўлган: Муаззизхон пошша ва Муқаддас тўралар. Ҳар иккалалари Туркияга кетиб яшаб, ўша ерда вафот этганлар.

Жўрахон тўранинг яна бир қизлари *Мұҳаррамхон пошша*. У аввал Тоштепага, Ҳакимхон тўранинг иккинчи ўғиллари Ҳидоятуллоҳонга узатилган. Ҳидоятуллоҳон ундан фарзанд кўрмайёқ, вафот этган.

Иккинчи рўзгори, қувалик Ҳожи тўранинг ўғиллари Ҳакимхон тўра эди. Ундан қиз фарзанд кўрганлар, исми Адолатхон пошша. Кувада яшайдилар.

Яна бир қизлари *Мукаррамхон пошша*. Дастваб, Заргалдоққа, Холматхон тўранинг ўғиллари Султонхон тўрага узатилган. Султонхон тўра урушда ҳалок бўлганлар. Улардан бир фарзанд қолган. Исми Абдусамадхон.

Жўрахон тўранинг *Абдусамадхон* исмли ўғиллари йигитлик пайтларида вафот этган.

Яна бир ўғиллари *Абдулҳамидхон*дир. Гулхон ойим вафот этганларидан сўнг, Азиза пошшага уйланганлар.

Азиза пошшадан тарқалган зурриётлари:

Мунаввархон пошша У Ҳакимхон тўранинг кенжা ўғиллари Кудратиллоҳон тўрага узатилган. Бир фарзанд кўриб, у ёшлигига вафот этган.

Қатагон йиллари Кудратиллоҳон тўра акалари Иноятуллоҳонлар билан дастлаб Афғонистонга, у ердан Аммон шаҳрига ўтиб кетиб, ўша ерда вафот этганлар.

Мунаввархон пошша у киши билан кетишга кўнмай, Асакада қолганлар.

Кудратуллоҳон тўранинг уч ўғиллари бор: Неъматиллоҳон (ҳозир Тошкентда яшаяпти), Ҳидоятуллоҳон (Жиддада), Атоуллоҳон (Истамбулда).

Жўрахон тўранинг яна бир қизлари *Қамарсойибхон пошша*. У Юсуфхон тўра авлодларига узатилган. Фарзанд кўрмай вафот этганлар.

Яна бир қизлари *Ойпошшахон*. У киши Андижон шаҳрига Тўрахон тўранинг ўғиллари Муҳаммадхонга тушганлар. Фарзанд қолдирмай у киши ҳам вафот этганлар.

Жўрахон тўранинг Андижонда ҳам ҳовли-жойлари бўлган. У кишининг Андижондаги завжалари *Саодатхон пошша* здилар. Ундан икки фарзанд кўрганлар:

Амонуллоҳон ёки *Сайид Боқирхон тўра*. У киши Муҳиддин ноибнинг эвараси (андижонлик), Насриддин қозининг чевараси, Зухриддин мингбошининг набirasи, Насриддинбекнинг қизлари Хонсойибхонга уйланганлар ва беш фарзанд кўрганлар: Музайянахон, Улуғбек, Қамархон, Моҳрӯяхон, Муаззамхонлар.

Улфатнинг «Гулбоғ» девонидан олинган «Саёҳатнома»дан:

*Боқир бири шоюри замона,
Ахлоқу билимдадур ягона.*

*Күп илму фунундан ақли огох,
Номин атар эл Амони Оллох.*

(Улфат. Гулбог. Тошкент, F.Гулом номли нашриёт, 1988 й., 146-бет)

Қояларга сингиб покланган ва ундағи беғубор маъданлардан озиқланиб шаффофланган ҳаётбахш чашма суви қанча-қанча ташналарни қондириш билан бирга «ибрат күзгуси», поклик тимсоли сифатида беҳисоб кишиларга рұхий поклик баҳш этгани каби, дадам Амонуллохон тұрам ҳазратларининг ҳам рұхлари аждодлари тарбиятидан баҳра олиб, уларнинг «беғубор гавқарлари» шаффофликларидан қалб, ақл-идроклари камол топиб, худди чашма суви сингари кишиликка наф келтиришни ўзларига одат қылғанлар.

Тарихчи олим, профессор Сайфиддин ҳожи Жалилов мақоласидан:

«Амонуллохон - Бокир меҳмандүст, одамшаванда бўлиш билан бирга ажойиб сухбатдош, меҳрибон дўст зди. У ҳофизаси кучли, ҳаётга шайдо инсон зди. Шу билан бирга ўта қаноатли, очиқ чехрали улфат зди. Кўплаб кишилар холис маслаҳат, ёки ёрдам сўраб Амонуллохонга мурожаат қиласар эдилар ва ҳеч ким ноумид қайтмас зди. Ғафур Гулом асарларининг 10-жилдидаги шоирнинг Амонуллохонга ёзган хатида бундай дейилган:

«Биродарим Амонулло!

Андижонлик бир маҳбусдан илтимоснома олган здим, ким ўзи, нима гап, тушуна олмадим. Сизга юбордим. Ўрганиб (агар малол келмаса), менга маълум қилсангиз. Балки маҳаллий ҳукумат арбоблари билан ҳал бўлгундай ишдир. Ҳар ҳолда бир маҳкум мурожаати жавобсиз қолмас».

Ғафур Гулом, 28. XII. 1961 й.

Амонуллохон хатни олгач, мазмуни билан обдон танишиб, маҳаллий ташкилотларга боргани ва маҳбус илтимоси билан маҳсус шуғуллангани каминанинг ёдида. (Яхши инсонлар ёди. «Миллий тикланиш», 1995 й., 15 дек.)

Адабиётшунос олим Тўхтасин Жалолов: «Математик педагог, ғазалхон шоир ва адабиётшунос олим Амонулло Валихонов доимо комил инсонликка интилган, нозик таъб шахс эди. У камдан-кам учрайдиган ҳалол, ҳалим, хуштавозеъ йигит, рафоҳатида одам ўзини енгил ҳис қиласи, сұхбати эса ҳаловатбахш, муомалаларини кўриб ҳавасинг келади», - деб таърифлаган эди. («Ўзбек шоирлари», Т.1961.)

Шоир Улфат:

*Хулқу атвори лойиқи таҳсин,
Ўзгода бўлмагай бу хил атвор.
Табында бор эди музлойимлик,
Чумали, пашша топмаган озор, - дейди.*

ЧАРХ КАЖРАВЛИГИНИ ЕНГИБ...

Ахлоқий етукликка, яхши фазилатларга интилиш инсоннинг инсоний табиатидан келиб чиқади.

Абу Наср ФОРОБИЙ

Ҳикмат ва икрор:

Саъдий демиш:

*Кулганди ҳама жаҳонга сен келган чоқ,
Лекин ишинг ўлди йигламоқ - дод этмоқ.
Шундай яша дунёдаки, сен борурда кул,
Йиглаб қолсун бошга сочиб эл тупроқ.*

Менинг афсусим (Боқир):

*Кулган эди эл, жаҳонга мен келган чоқ
Лекин ишим ўлди йигламоқ - дод этмоқ,
Афсус, яшамабманки, борурда кулсан,
Йиглаб қолса, бошга сочиб эл тупроқ.*

Ҳужжатларнинг шоҳидлик беришича, қиблағоҳим Амонуллохон - Саййид Боқирхон тўра замон оқилу донолардан юз ўгирган, кажрафтор чарх ҳукми устуворлик

қилган, долғали, нотинчлик авж олган бир пайтда, 1925 йилда Андижонда дунёга келгандар.

Оналари Соодатхон пошша бўлиб, биз у кишига «Ойбуви» деб мурожаат қиласардик. Ойбувимлар назм таъб, ўқимишли, доно, шарму-ҳаёли, ўзларида ахлоқ-одобларни мужассам этган мукаммал инсон эдилар.

Дадамларга дастлабки сабоқларни ҳам у киши берганлар. Дадалари Жўрахон тўрам 1928 йилда 63 ёшларида вафот этганлар.

Башорат:

*Нега бу фалак солгуси гурбатқа мени,
Ҳар лаҳза тұғангусиз машаққатқа мени,
Не чора қилай, нетайки, тенгри гүё,
Межнатни менга яратти, межнатқа мени.*

(Бобур).

1932 йилга келиб кенг кўламда амалга оширила бошланган «қулоқ қилиш» сиёсати туфайли бутун ерсув, бөғ-роғлар тортиб олинган бўлишига қарамасдан, 1934 йили зўр-базўр ҳаёт кечириш имконини бериб турган ҳовли-жой ҳам тортиб олиниб, дадамлар кўчага чиқариб ташланган (ўша пайтда тўққиз ёшда эканлар), 7 ёшли сингиллари ва Ойбувимлар билан биргаликда ҳаммаҳаллаларидан бирининг даҳлизидан бошпана топишга мажбур бўлдилар. Кейинчалик, ҳозирги Аҳмадбек ҳожи кўчасида ўзларига жой қилиб кўчиб чиқдилар.

Кажрафтор чарх ўз «ўйинлари» билан Ойбувимнинг бардошларини, қиблагоҳимнинг иродаларини синашда давом этарди.

Шу йилларда у киши, кутилмаганда, «сиёсий ўйин» курбони бўлиб қамоққа олинадилар.

Тафсилот ва тарих:

1942 йилда Синъцзянда ҳокимият тепасида турган Шен Шицай шартномага хилоф равишда СССР билан иқтисодий, сиёсий, маданий ва ҳатто дипломатик

алоқаларни узиб, АҚШ, Англия ҳукуматлари билан ўз алоқаларини мустаҳкамлайди. 1943 йилнинг январ ойида у агрессияга даъват этувчи Гоминдон партиясини тузади.

Шен Шицайнинг ҳаракати билан Урумчида Англия ва АҚШ элчихоналари иш бошлайди. Шу йилларда Хитой коммунистларига, совет-хитой дўстлиги тарафдорларига қарши кескин ҳаракат бошланади. Улар таъқиб қилинади, турли сабаблар баҳона қилиниб, кўплари қамоққа олинади ва отиб ташланади (Новейшая история Китая, М. 1984).

Шен Шицай бу фаолияти учун ҳокимиятдан четлаштирилади. Аммо Синьцзяндан кетишдан олдин у ерда қаттиқ террор ўтказади. Айтишларича, унинг буйруғи билан 120 минг одам қамоққа олинади. 50 мингдан ортиқ одам турли йўллар билан ўлдириб юборилади (Кўрс. асар).

Изоҳ: Шарқий Туркистонда гоминдончилар партиясини тузиш ҳаракати бошланган кезларда, 1940 йилда мазкур гуруҳга қарши «Озодлик ташкилоти», «Миллатни қутқариш», «Шарқий Туркистон халқи революцион партияси» каби турли уюшмалар тузилган бўлиб, уларнинг асосий мақсади қуролли қўзғолон йўли билан Шен Шицайни ҳокимиятдан четлатиш эди.

Шу тарзда Гулжада ҳам «Озодлик ташкилоти» номи билан Ҳарбий революцион қўмита тузилган эди. Бу гуруҳ аҳоли ўртасида катта фаолият кўрсатиб, қуролли бўлинмалар ташкил қиласиди, озодлик ҳаракатини авж олдиради ва 1944 йилнинг 7-10 ноябрларида Гулжа, 1944-1946 йилларда бутун Или округи озод этилади.

1944 йил ноябрининг 12-сида Гулжада Шарқий Туркистоннинг янги президенти бошчилигига вақтли революцион ҳукумат тузилганлиги тантана билан зълон қилинади.

Гулжада тузилган вақтли революцион ҳукумат раҳбарлигига қонуний ҳақдор шахс сифатида Сайид Амонуллохон Боқирхон тўра тавсия қилинган эди.

Аммо бу лавозимни эгаллашга дадам ҳам, оналари ҳам рози бўлмаганларидан кейин, совет органлари томонидан дадам вақтинча қамоқقا олинади.

Ойбувим дадамларга берган маслаҳатларида ҳақ бўлиб чиқадилар. Орадан кўп ўтмай, дадамнинг сиёсий курашларда иштироки йўқлиги исботланиб, озод этиладилар. Аммо у кишига нисбатан ишончсизлик, ҳар бир ҳаракатига шубҳа билан қарашиб анча вақт давом этади. Муқим иш жойига эга бўлмай, иқтисодий тангликни бошидан кечирадилар.

Ниҳоят, меҳрибон инсон Ҳамзахон ака Юсупов дадиллик кўрсатиб, дадамни ўзлари раҳбарлик қилаётган бухгалтерия мактабига ўқитувчиликка қабул қиласидилар.

Дадам Фарғона педагогика институтининг физика-математика факультетига сиртдан ўқишга қабул қилинадилар ва институтни тамомлаб, мактабларда математика ўқитувчиси бўлиб ишлайдилар.

Андижон шаҳрининг 8, 18, 20-ўрта мактабларида, шунингдек, шаҳарнинг услубий таянч мактабларидан бўлмиш 29-ўрта мактабда математика ўқитувчиси ва ўқув ишлари бўлими мудири вазифаларида фаолият кўрсатганлар. 1957 йили «Совет мактаби» журналида босилган «Талантли ёш педагог» номли мақолада қўйидаги сатрларни ўқиш мумкин: «Ўртоқ А. Валихонов Андижон шаҳридаги 29-ўрта мактабда математика ўқитувчиси бўлиб ишлайди. У ўзининг меҳнатсеварлиги, ўқувчиларга пухта билим беришда жонкуярлиги, изланувчанлиги билан ўқувчилар ва отоналарнинг ҳамда мактаб жамоасининг ҳурматига сазовор бўлди. Унинг қўлида таълим олган кўпгина ўқувчилар ҳозир Тошкент, Фарғона, Самарқанд олий ўқув юртларининг физика-математика факультетларида муваффақиятли ўқимоқдалар. Улар ўз устозларига тез-тез хат ёзиб турадилар. Шулардан бири Ўрта Осиё Давлат университетининг IV курс студенти У. Самадов: «Хурматли ўқитувчим Амонулло ака! Мен Сиздан жуда миннатдорман. Чунки ўрта мактабда

Сизнинг берган кенг, чуқур билимингиз олий ўқув юртида муваффақиятли, юқори баҳолар билан ўқишимга катта ёрдам бермоқда», - деб ўз хатида самимий миннатдорчилигини изҳор қиласди.

А. Валихонов бир қанча илмий ва методик мақолалар музаллифидир: «Тескари доиравий функцияни ўқитиши», «Берунийнинг тригонометрия соҳасидаги энг муҳим ишлари», «Ал-Хоразмийнинг тенглама ечиш усуллари», «Улуғбекнинг астрономия мактаби» кабилар. Талантли ёш педагог доимо қунт билан изланишда».

Дадам 1958 йили Андижон Давлат педагогика институти ректори Ганижон ака Абдуллаев тақлифига биноан институтга ишга ўтадилар.

Шу йиллардан у кишининг осойишта ҳаёти бошлилади. Ўз умрларини хайрли ишга: талабаларга билим беришга, илмий тадқиқотлар олиб боришга, ижод билан шуғулланишга, дўстлар учун, шеърият равнақи учун, оила осойишта ҳаётини таъминлаш учун сарфлайдилар.

Институтда 20 йил давомида катта ўқитувчи, «Бошлангич таълим услубияти» факультетининг («педфак») декан мувонини, декани ва физикаматематика факультети декани каби лавозимларда ишлаганлар. Бобур номли Андижон Давлат университетида тайёрланган «Улар хотираси барҳаёт» номли тўпламда қиблагоҳим ҳақида қўйидаги маълумотлар келтирилган (Музаллиф С. Жалилов):

«Институтда XX асрнинг 60-70 йиллари ўзига хос адабий муҳит вужудга келиб, Андижонга ташриф буюрган олимуму, адиллар бу ерда тўпланишар, уюштирилган адабий гурунгларга А. Валихонов доимий равишда бош-қош бўлар ва ташкилотчилик қиласди.

Шу билан бирга мумтоз шеъриятимизнинг дол зарб мавзуларида маърузалар қиласди, республика ва вилоят матбуотларида адабиётшуносликнинг баҳсли масалалари юзасидан ўз қарашларини баён қилувчи мақолалар эълон қиласди.

Унинг «Навоий - аллома», «Навоий ва фан», «Навоий - мусиқашунос», «Хамса» сабоқлари», «Хамса»даги фалакиётта оид маълумотларнинг манбалири», «Жомий ва Навоий» каби илмий мақолаларида навоийшуносликнинг муҳим масалалари юзасидан баҳс юритилса, Захирiddин Муҳаммад Бобур ҳақидаги бир қатор мақолалари бобуршуносликнинг долзарб муаммоларига бағишлилангандир. Олимнинг «Оташин шоира», «Жодузабонлик», «Маънавиятимиз дурдонаси», «Алломалар отаси», «Барҳаёт сиймолар» каби мақолалари эса адабиётшуносликка, шунингдек, тарих ва фалсафага алоқадор баъзи муаммоларга бағишлиланган бўлиб, улар Амонулло Валихоновнинг қомусий билим згаси эканлигини, илмий талқинда ўз услуги ва овози бор олим сифатида аллақачон шаклланганини кўрсатади... Амонулло Валихоновнинг «Ғазал нафосати» (Т.1985) номли йирик илмий асари эса навоийшуносликка қўшилган ўзига хос улуш бўлдики, андижонлик адабиётшуносларга ҳам обрў келтирди, десак, хато бўлмайди» (Ўша тўплам, 67-бет).

Йирик тилшунос олим, филология фанлари доктори Фатҳиддин Исҳоқов ва филология фанлари номзоди Абдулазиз Абдулҳамидовлар ўзларининг «Соҳиби илми ладун» номли мақоласида («Ўзбекистон адабиёти ва санъати» газетаси, 2003 йил 13 июн) шундай ёзадилар: «Амонуллохон бадиият намуналарини қадрловчи, ундан маънавий озуқа олувчи ва уни шунчаки баҳолаб ўтувчи кишигина эмас, шу билан бирга, унга улуш қўшишга интилевчи ижодкор, нозиктаъб шоир ҳам эдилар. Амонуллохон - шоир Боқир мумтоз шеъриятимизнинг билимдони, синчков тадқиқотчиси сифатида ўз шеърлари орқали инсони шарифнинг улуглигини, унинг юксак ахлоқий фазилатларини, гўзалликни мадҳ этади, инсон камолотида тарбиянинг доимий ва муқаддас ўрнини таъкидлайди. Тарбия ишида инсон амал қилиши лозим бўлган бош фазилат - одамийликдир. Боқир шеърлари билан мумтоз шеъриятимиз ўртасидаги муштаракликни таъминловчи

куч, шоир ижодига ўтмиш шеъриятининг энг яхши анъаналари сингдирилганини тасдиқловчи мезон, уларда ўқувчини ўйлашга даъват этувчи, кишини ибрат олишга чорловчи мазмуннинг устуворлигидир.

Боқир шеъриятига бадий санъаткорлик нуқтаи назаридан ёндашилса, уларда ақл ва тажриба кучи билан ечиладиган, ўқувчини узоқ ўйлантириб қўядиган ўринларга кўп дуч келамиз:

*Гулда шабнам сувидин шуъла сочар күн нури,
Бу таажжубки, қилур сув ичинда ўт издор.*

«Фасли баҳор»да келтирилган бу байтда баҳор фаслининг одатий манзараси ифодаланган:

«Гул япрогида шабнам, шабнамда қуёш нури жилвалиниб турибди» дейилмоқчи. Бироқ шоир буни «мумтане» (бўлиши мумкин бўлмаган нарсани бўлиши мумкин тарзида изоҳлаш) санъати қолипига солиб, сўз санъатини намоён қилган. Халқ тилида ўт билан сув - қарама-қарши нарсалардир. Ўт ичида сув, сув ичида ўт бўлиши мумкин бўлмаган ҳолат, лекин кун нурининг шабнамда акс этиши буни мумкиндай қилиб кўрсатади. Боқир ўз шеърий асарларида тимсоллар яратишда юзаки, чала, мантиқий боғланмаган ифодаларга ўрин бермайди, аксинча, етарли билим, ўлчов асосида теран тафаккур ва илоҳий илҳом билан иш кўради, мантиқ ва моҳият талабларига риоя қилган ҳолда ўз салафлари анъаналари изидан бориб, уларга ҳурмат ва баланд зътиқодда бўлади. Шоир, шинавандалар таҳсинаiga тушган кўпсонли намуналардан биргина мисолни - Боқирнинг Бобур ғазалига боғланган муҳаммаси бандини эсга олиб ўтмоқчимиз:

*Гаҳи қир бағрига ел сабза мавжидин бериб тўлқун,
Гаҳи боғ қўйнига күн нури тобидин тўкиб олтун,
Гаҳи булбул чекиб бўй ила ранг завқидин лаҳну-ун,
Гаҳи саҳро узори лола шаклидин эрур гулгун,
Гаҳи саҳни чаман гул чехрасидин аргувонидур.*

Улфатий домладан бирор сўз ёки ибора маъносини сўрасак, ўз жавобларини айтиб бўлиб: «Яна Амонуллохондан сўранглар, у киши мендан кўра билим-

донроқ», - деб қўярдилар. Амонуллохоннинг вафоти муносабати билан ёзган таърих - марсиясида домла надомат билан у кишининг таърифларини қилиб «соҳиби илми ладун эрди» деб ёздилар. Илми ладун - худо сунган илм, илоҳий қувват билан касб этилган илм, демакдир. Ҳақиқатан Амонуллохон тўранинг табиатида бу сифат очиқ сезиларди.

Устознинг ақл-заковатига, қомусий илмига тан берардик, бизни ҳайратга соларди, суйган бандасининг жисмига бу илмни Яратганинг ўзи ҳадя этган деб иқрор бўлардик, шундай баркамол устозимиз, дўстимиз борлигидан қувонардик».

Дадамнинг эълон қилинган ижод намуналари қўйидагилардир:

1. Маҳаллий ва марказий матбуотда 50 дан ортиқ шеърлари ва элликка яқин илмий-оммабоп мақолалари чоп этилган.

2. Собир Абдулла, Ҳабибий, Сайфийларнинг асарларида дадамнинг улар билан муштарак мушоаралари, мухаммасларидан намуналар берилган.

3. Тўхтасин Жалоловнинг «Ўзбек шоирлари», «Бону», «Нафосат оламида» номли асарларида айrim шеърлари берилган.

4. Faфур Ғуломнинг «Мактублар» жилдида ҳам ижодларидан айrim намуналар берилган.

5. «Чертганда дуторимни» номли тўпламда бир канча шеърлари эълон қилинган.

6. Абдураҳмон Жомий ғазаллар тўпламидаги 22 та ғазал, Ф. Исҳоқовнинг «Гулханий «Зарб-ул-масал»и» асарида 2 ғазал, Паҳлавон Маҳмуд рубоийларидан 24 таси дадамнинг таржималарида эълон қилинган.

7. 1984 йили Увайсийнинг «Кўнгил гулзори» асарига сўз боши ёзиб, шоир Улфат билан ҳамкорликда чоп эттирганлар.

8. 1985 йили Увайсий асарларининг русча миниатюра нашри чиқсан («Прогресс» нашриётида). Унинг тузувчиси ва таржимони дадам эдилар.

9. 1985 йили Ғафур Ғулом нашриётида «Ғазал нафосати» номли асари нашр этилган.

Булардан ташқари уч гуруҳ ишлари нашр қилишга улгурмай қолиб кетган. Қуйида мазкур ишлар рўйхатини келтирамиз:

Нашрга тайёр ишлар

Биринчи нафбатда:

а) Талқинлар ва тақризлар	10 б.л.
1. Шеърият ва ҳарфлар	2 б.л.
2. Оташин шоира (Увайсий ҳақида)	1 б.л.
3. Жодузабонлик (Фурқат маҳорати ҳақида)	0,7 б.л.
4. Воқеий ҳикоятлар	0,25 б.л.
5. Шиоримиз - дўстлик	0,3 б.л.
6. Маънавиятимиз дурдонаси («Ятиматуд - даҳр»га тақриз)	0,65 б.л.
7. «Маҳбуул-қулуб»нинг баёнига тақриз	0,65 б.л.
8. «Фундаментал тадқиқот» (М. В. Стеблева асари ҳақида)	1 б.л.
9. Озроқ заҳмат чекилса эди...	1,5 б.л.
10. Эътиборсизлик - хатонинг онаси	0,4 б.л.
11. Диалектологияга оид бир асар хусусида...	1 б.л.
б) Навоийнинг андижонлик издошлари	
1. Навоийнинг андижонлик издошлари	3 б.л.
2. Барҳаёт сиймолар	0,5 б.л.
3. Маънавий бойлигимиз хазинаси	0,25 б.л.
4. Манзур	0,4 б.л.
5. Ҳам олим, ҳам шоир (Анисий ҳақида)	0,5 б.л.
6. Шоир Улфатнинг ойинадори	0,75 б.л.
7. К. Аҳмадий	0,25 б.л.
8. Н. Кўзи	0,25 б.л.
9. Ҳ. Солиҳова, В. Дадабоевлар қўлёзмаларига тақриз	0,65 б.л.
10. В. Раҳмоновга жавоб	0,15 б.л.

11. Нусрат ва Ёлқин тўпламлари
қўлламаларига тақриз 0,25 б.л.

Иккинчи нафбатда:

Киноя ва мажоз луғати (Анисий билан ҳамкорликда)	8 б.л.
1. Бош сўз (А. Валихонов)	1 б.л.
2. Луғат	7 б.л.
3. Бадиалар (Ўзимнинг шеърларим)	8 б.л.

Учинчи нафбатда:

а) Шоир ва шуур	6,5 б.л.
1. «Бобур» имлоси ҳақида	0,5 б.л.
2. Шуурнинг кучайиши	1 б.л.
3. Улуғ салаф ҳақида буюк халаф	0,6 б.л.
4. Заҳириддин Муҳаммад Бобур	0,45 б.л.
5. Бобур ижодига Навоий таъсири	0,6 б.л.
6. Бобур ғазалиётининг баъзи хусусиятлари	0,5 б.л.
7. Бобур ғазалларида тазод санъати	0,5 б.л.
8. Бобур ғазалиёти нашрлари хусусида	0,75 б.л.
9. Ўшнинг фазилати...	0,45 б.л.
10. Фундаментальное исследование	1 б.л.
б) Бадр Чочий қасоиди (Анисий иши, нашрга тайёрловчи - А. Валихонов)	8 б.л.
1. Бош сўз (Анисий, А. Валихонов)	1 б.л.
2. Қасоид	7 б.л.

*(Бу маълумотларни дадамнинг ўзлари ёзиб қолдир-
ганлар)*

* * *

Оталари вафот этгач, дадамнинг ва бир ёшли сингилларининг тарбияси Ойбувимнинг зиммаларида қолади. Ойбувим уларни ҳам ота, ҳам она ўрнида тарбияладилар. Улар ота дийдорига ташна қалбларни она меҳри, сахий муруввати билан қоплашга ҳаракат қиласдилар. Ўксик кўнгилларни кемтик қиласлик онаизорнинг бирдан-бир мақсадига айланади.

Құқонқишлоқдаги Ҳабибий музейи илмий ходими Жүрәй ака Құлдошев хотираларидан:

«Мен пахтаободлик уйғурман. Амонуллохонга ихласим баланд бўлганлигидан, хонадонларида тез-тез бўлиб турадим. Бу хонадонда мени лол қолдирган нарса, у кишига нисбатан оналарининг ўта меҳрибонлиги, ҳурматларини жойига қўйиб, авайлаб муомала қилишлари эди.

У киши зукко, ўқимишли, қаноатли аёл эдилар. Амонуллохон дастлабки саводларини оналари қўлида чиқарганлар. Аруз илмини, форс тилини оналари ёрдамида, мумтоз шеъриятимиз сир-асрорларини у кишининг таъсирида ўзлаштирганлар».

Дадам оналарини бағоят ҳурмат қиласдилар. Амрларини сўзсиз бажарар, маслаҳатларига қулоқ тутар, у кишининг рухсатлари бўлмагунча бирор ишга кўл урмасдилар.

Оилага ҳар доим Ойбувим бош-қош, фармонбардор, ҳам қалқон эдилар. Биз фарзандлар ҳам шунга одатланган, шу руҳда тарбияланган эдик. Оиласиз ҳаётининг тўкислиги, файз-баракотлилиги, хонадонимизнинг саранжом-саришталиги, фаришталилиги Ойбувимиз туфайли, у кишининг оқиласи, саъй-ҳаракати билан боғлиқ эди.

Дадамга хос одатлардан бири шу эдики, агар улфатлари билан олисроқ жойига боришлари зарурати пайдо бўлиб қолса, албатта, Ойбувимдан рухсат сўрадилар. Бирор сабаб бўлиб улар билан кўриша олмай қолсалар, келиб кетишга имкон топа олмай қолсалар, сабаб кўрсатилган бир-икки оғиз сўз битилган қоғозни бирортасидан юбориб, оналарини огоҳ қиласдилар. Ҳеч қачон оналарининг хавотирланишларига йўл қўймаганлар.

Дадамнинг оналарига меҳр-муҳаббати дўстларига ҳам маълум эди.

1977 йил 7 февралда Ойбувим ҳаётдан кўз юмганларида дадам устоз Ҳабибийдан шундай мазмунда мактуб олган эдилар:

«Ассалому алайкум!

Қимматли ва самимий дўстим Амонуллохон! Сизнинг бола-чақангиз билан саломат яшамоқлигингизни дўстона тилайман.

Сизнинг меҳрибон онангиз дунёдан кўз юмган эмиш. Ўз қўлингиз билан узатибсиз.

Мен эшишиб кўп афсусландим. Чунки сизга ҳам ота, ҳам она эди. Инсонга етимлик мерос бўлиб келган.

Мураббаъ:

*Шонли дўстимдан ҳабар мұхбир демиш,
Бошига солмиш фалак шўришилик иш,
Бу етимлик эл учун мерос эмиш,
Кўҳно дунёда ўтиб кўп ёзу қиши.*

Дўстингиз Ҳабибий, котиба Дилафрўз.

13.III. 1977 йил.»

Ойбувимнинг айтишларича, дадам сингиллари Қамарсойибхон пошшага ҳам жуда меҳрибон, муруватли, эътиборли бўлган эканлар. Қўлларидан келганича унинг отасиз эканлигини билдирамасликка, кўнгли истаган нарсани топиб беришга ҳаракат қиласар, энг яхши нарсаларни сингилларига илинар эканлар.

1942 йилнинг баҳор пайтларида дадамнинг бошларига катта бир мусибат тушади. Қамарсойибхон пошша оғир дардга чалиниб вафот этадилар. Ўз сингилларига қаттиқ боғланиб қолган дадам қайгу-изтиробларини қанчалик яширишга ҳаракат қилмасинлар, мотамзада оналарининг армонлари изҳори бўлган қўйидаги марсия уларни қайта янгилар эди:

(Марсиянинг асл нусхаси йўқолган. Сингилм Қамархоннинг ёшлиқда ёд олганлари ососида қайта тикланди. Шунинг учун мұхтарар китобхонлар хатоларини авф этарлар деган умиддамиз...)

Бу кун қон йигламай найлай, мен ул

жонимдан айрилдим,

Юрагим қуввати, ҳам танда дармонимдан айрилдим.

Менда йўқ энди тоқат, сабру сомонимдан айрилдим.

Кузим нури Қамарсойибхоним - жонимдан айрилдим.

Дариго, сад дариго, моҳи тобонимдан айрилдим.

Мени айб айбламанг, дўстлар, этай

золим фалакдан дод!

*Яқомни чок этиб, кўздин тўкиб қонлар, қилаи фарёд!
Келиб ушбу вафосиз дунёда бир бўлмадим дилшод,
Қамарсойибхоним - жонимдан айрилдим, ажалдин дод!
Дариго, сад дариго, маҳи тобонимдин айрилдим.*

*Бул икки дурни камлик бирла еткурдим камолига,
Бўлибон булбули шайдо, буларнинг гул жамолига,
Қувонурдим, қараб ҳар дам, они сарви ниҳолига,
Нетай, бевақт ҳазон этди, эссиз фасли баҳорида,
Ҳазон ўлди баҳорим, боғу бўйтонимдин айрилдим.*

*Бу баҳри бебақо ичра келиб ул орази раъно,
Атодин қолди бир ёшда етим, ул қомати зебо,
Ёши еттига етганда ватансиз қолди бу барно,
Бўлиб кўчманчилар, доим мусофир, ҳам дури якто,
Қўзим нури Қамарсойибхоним - жонимдан айрилдим.*

*Үйинг куйгур фалак, менга неча турли жафо этди,
Ўлим тийгин үруб кўксумга багримни яро этди,
Ажал боди келиб, фасли баҳоримни ягмо¹ этди.
Вужудим хирманига ўт қўйуб, дийдам дарё этди,
Ул ўн етти яшар гул гунча хандонимдан айрилдим.*

*Азал тақдирига тадбир, ё чора топилмайдир,
Етиб келса қазо, ёш, навбаҳор деб раҳм қилмайдир,
Масал: кетган-келур, фавт топган - зинҳор келмайдир,
Агарчи ҳонумон сарф қилсанг, ўлган тирилмайдир,
Ажалнинг дастидан минг дод!*

Дармонимдан айрилдим.

Бундай дамларда ўғилариға бирдан-бир малҳам яна
Ойбувимнинг ўзлари эдилар. Қазога рози бўлишлиқ, кулфатга
шукроналик ва унинг дафъига умидворлик билан бардош

¹ ягмо (ф) – талон-тарож, бузгунчилик

қилмоқлик бандай мүмин амали эканлигини сингдирувчи ҳам оналари эдилар.

Ойбувимнинг ҳикоя қилишларича, дадам сингилларига жуда меҳрибон бўлган эканлар. Ҳар қандай вазиятда сингилларининг кўнгилларини авайлаб муомала қилар, ҳатто улар мактабдан келмагунларина, қоринлари қанча оч бўлмасин, овқатланмай кутиб ўтирас эканлар.

Қиблагоҳимнинг қуидаги байтлари сингилларига атаб битилган эди:

*Ўз қўлим бирла қўйиб, ер остига танҳо сизи,
Уйга мен қандоқ кетурман, меҳрибоним, алвидо!*

Ёки:

*Ўйласам, шамъи чирогим, моҳи тобоним укам,
Қолди дийдори қиёмат, алвидо, жоним укам.*

Дадамнинг бизга, фарзандларига бўлган меҳрлари, кўрсатган муруватлари ҳар қандай тавсифдан устун эди.

Уларнинг хулқ-атворлари, оиласда ўзларини тутишлари, бизга муносабатларидаги самимийлик, бағрикенглик, шу билан бирга ўзларигагина хос қатъийлик ва талабчанлик ибратгина эмас, балки толеъимиз, Яратганинг бизларга инояти эди.

Улар ҳар биримизнинг ёшимизни, феъл-атворларимизни, кўнглимиизни ҳисобга олиб муомала қилардилар.

Агар биз томондан бирор айб иш содир этилса, қандайдир сабабларга кўра бизнинг хонадонга муносиб бўлмаган иш қилинса, дадам юмшоқлик билан, сирли, кишининг жон-жонидан ўтиб кетадиган оҳангда: «Сиз шунаقا эси йўқ бўлиб қолдингизми?» - деб танбеҳ берардилар. Бундай танбеҳ биз учун калтаклагандан ортиқроқ таъсир қиларди.

Баъзан айрим камчиликларни, одатга айланиб қолган атворларимизни эркалаб, мутойиба билан гапириб ўтардилар. Масалан, синглим Қамархон тозаликка ортиқ риоя қиларди. Шунинг учун дадам баъзан ҳазил билан: «Қамархон сувни ҳам ювиб ишлатади», - деб қўярдилар.

Қуидаги воқеа ҳеч хотирамдан ўчмаса керак, деб ўйлайман.

Институтни янги битириб (1971 й.), врачлик дипломини олган укам Улуғбек кўп ўтмай бетоб бўлиб қолди. У бир оз шифохонада даволаниб чиққач, дадам уни Қримга - Анапага дам олиш учун юбордилар. Ўғлининг олисдалиги, қолаверса мусофир юртдалиги дадамга тинчлик бермай, кун ора канда қилмай унга хат ёзиб туардилар. Дадажонимнинг фарзандларига бўлган муҳаббатда қанчалик бағрикенг, самимий бўлганликларини таъкидлаш мақсадида у кишининг Қримда дам олаётган укам Улуғбекка ёзган бир хатини тўла келтиришни маъқул кўрдим:

«Ассалому алайкум, Улуғбек!

Мен илгари куни Сизнинг кейинги ёзган хатингизни (4.III.даги) олдим. Соғлигингизни билиб, хурсанд бўлдик. Яқинда кўришиш умидидамиз. Музайянахонлар келган эдилар. Хужастахон ҳам Сизни соғинибди, кўп галиради. Жиянларингиз Хужастахон ва Масъудхонлар билан бирга кеча кетишиди. Сиздан кўпгина бодом, апельсин ва яна аллақандай мева, афтидан, Қримнинг пистаси шекилли, олдик. Раҳмат! Сизга озгина пул юбордим (йўлкира учун), оларсиз. Самолётингиз жуда кеч келар экан. Қайси куни келишингизни аниқ айтиб, телеграмма берсангиз, мен Сизни Тошкентда кутиб олардим. Телеграммада рейс но-мери, куни, иложи бўлса, вақтини кўрсатинг. Балки бундан кейин хат ёзишгунимизча ўзингиз келиб қоларсиз. Шунинг учун такрор ёзяпманки, ортиқча юкларингизни (қишлик ботинка, жемперларни) посылка қилиб бериб юборинг. Ўзингизни қийнамай, енгилроқ келинг. Ўзингизни эҳтиёт қилинг! Биздан ҳамма ўртоқларингизга салом айтинг.

Салом билан дадангиз Амонулло.»

Институтни тугаллаб, врач бўлиб ишлаётган ўғилларининг курортдан қайтиб келишларига қанчалик жонсараклик?!

Дадам набираларини жонидан ортиқ севардилар. Улардан бирортаси бетоб бўлиб қолгудай бўлса, ишга кетишларидан олдин ҳам, ишдан қайтаётганларида ҳам,

баъзан тушликка чиқкан пайтларида ҳам вақт топардилар-да, шифохонага келиб, уларнинг ҳолидан хабар олиб кетардилар.

Умрларининг сўнгги пайтларида, беморликдан қаттиқ азоб чеккан дақиқаларда ҳам «фарзандларимнинг кўнгиллари бузилмасин» - деган андишада тортаётган оғриқ азобларини сездирмасликка ҳаракат қилас, ҳар қандай ҳолатда ҳам зорланмас, дард-изтиробларини ошкор қилас маълум эдилар.

Куйидаги воқеа ҳеч ёдимдан кўтариilmайди: дадамнинг аҳволи оғирлаша бошлаганинги сезган шифокорлар қон томирларига қандайдир дори юбордилар. У акс таъсир кўрсатдими, дадамнинг аҳволлари, кутилмаганда, янада оғирлашиб қолди. Барчамиз ёнларидан жилмай, маъюс бир аҳволга тушдик. Гўё дард дадамни «олиб кетмоқда» эди.

Орадан маълум фурсат ўтгач, у киши бир оз ўзларига келдилар. Аҳволимизга назар ташлаб, ўз умрлари охирлаб бораётганини сездиларми, бизларга жуда мунгли, аммо ҳаммамиздан ризо оҳангда: «Сизларни қийнаб қўйдим. Қилган хизматларингизга рози бўлинглар!» - дедилар.

У кишининг бу сўzlари қалбларимизни ўртаб юборди. «Дод!» деб юборишдан ўзимизни базур тўхтатдик. Дардимизни ичимизга ютиб, ҳолатимизни ошкор қиласликка уриндик. Шу пайтдаги бирдан-бир мақсадимиз у кишини умидсизликдан чиқариш, шифо топиб кетишлирага ишонтириш эди.

Дадамнинг касалликлари сабаб бўлиб, 60 йиллик юбилейлари ўтказилиши кечикирилганлиги учун тантана кунларида тақдим этишни ният қилган машқ шеърим эсимга тушди.

Бир оз кўнгиллари кўтарилармикан деган умидда, эртасига сал ўзларига келганларида, «машқимни кўрсатишга журъат қилдим: «Шуни назарларидан бир ўтказиб берсалар. Аммо «гуноҳимни» кечирсинлар... Ўзларига маъкул бўлса, юбилей кунларига чиройли қилиб ёздириб қўяман», дедим.

Дадамнинг юзларида сезилар-сезилмас ёқимли табассум пайдо бўлди. Машқимни, одатларича, шошилмай кўздан кечирдилар. Ушбу машқ у кишининг назарларидан ўтганлиги учун ҳам, ҳужжат тариқасида уни айнан келтиришни маъқул кўрдим:

*Хўп үлуглар, ҳам азизлар қизларига жон қадар,
Минг ташаккур, меҳрибоним, бузругим, жоним падар.
Бўлмагай ташбеҳ мукаммал, ҳар сўзи гавҳар десам,
Таърифин қилмоқ учун сўз гавҳари етмайди, кам.
Бекиёс меҳру-мурувват соҳиби, олижсаноб,
Камтарину, камсукум, ширинсухан жоним отам.
Бир нафас билмай ҳаловат, чекса юз заҳмат ва лек,
Ўйламас ўз роҳатин, деб: безавол юрсин болам.
Одамийлик дарсидан берса сабоқ оқшомлари,
Айлагай йўлим мунаввар, минг шукр, ҳар субҳидам.
Илму-одоб борасида мен учун намунасиз -
Бебаҳосиз, қиблагоҳим, бузругим, эй мұхтарам.
Бўлмади ташбеҳ мукаммал, ҳар сўзи гавҳар дедим,
Таърифин қилмоқ учун сўз боилигим етмайди, кам.*

* * *

Ҳикмат:

*Хулқингни рост қилгил, ҳар соригаки борсанг,
«Ассанта!» - дер бори эл, яхши от чиқорсанг.*

(Бобур)

Қиблагоҳим Бобурнинг ушбу фард-муаммосини тез-тез такрорлар здилар. Бунинг сабабини кейин англағандек бўлдим. Унда айтилган ҳикмат, дадамнинг руҳларига тўла ҳамоҳанг эди. «Хулқни рост қилмоқлик» у кишининг ҳаёт мазмунлари мезони эди: Бундай эътиқод у кишига оналари сабоги орқали ўтган эди. Кейинчалик, Абдулазиз қори ва Орифбек каби ёшлиқдаги дўстлари билан биргаликда андижонлик таниқли уламо ва шоир Абдулмажид қози домла Ҳофиздан, араб, форс адабиётининг етук билимдони Муҳаммадхон маҳсум aka Маҳжурийдан араб, форс тилларини ва адабиётларини, мумтоз шеъриятимиз илмларини, шарнат аҳкомларини ва ахлоқ қоидаларини

чукур ўрганиш натижасида бу эътиқод янада барқарорлашган эди.

Уларга қўшимча равишда, турк, уйғур, рус, немис тилларини мукаммал эгаллашга ҳаракат қилдилар. Ўз билимларини мустаҳкамлаш мақсадида, (ўзлари учун) араб, форс, рус тилларида сўзлашув ва изоҳли луғат тузганлар. Илм у киши учун эҳтиёж омили бўлиш билан бирга таскин манбай ҳам эди.

Жўрабой ака Қўлдошев хотирасидан:

«Биз Амонуллохон билан Фарғона Давлат педагогика институтида бир вақтда ўқиганмиз. У киши математика факультетида, мен эса ўзбек тили ва адабиёти факультетида таҳсил кўрдик.

Амонуллохон ўртоқлар орасида қобилиятининг юқорилиги билан ажralиб туради. У ҳар жиҳатдан домлаларимизга маъқул эди. Улар Амонуллохондаги қомусий билим, иқтидорни ўз вақтида пайқай олган эдилар».

У кишидаги илмий баркамоллик, тадқиқотчи сифатидаги етуклиқ, айниқса, Навоий илмий-адабий мерослари талқинларида, Бобур шахсиятини, илмий меросини атрофлича изоҳлашда, шеъриятидаги бетакрорликни кашф қилишда, уларни соғф илмий нуқтаи назардан ўрганишда, Бадр Чочий қасидаларига қилган изоҳларида, Фузулий олами ҳақидаги қарашларида, маҳаллий истеъдодларга қилган ҳомийликларида ва уларни «кашф» қилишларида яққол намоён бўлган эди.

Дадамнинг «Ғазал нафосати» китоби қўлёзмаси билан танишиб чиқкан Ваҳоб Раҳмонов шундай ёзибдилар: «Навоийни тадқиқ этиш учун яна бир Навоий керак эди аслида. Боқир эса Навоийни тадқиқ этибгина қолмаган, балки кашф этган. Тадқиқ этиш эмас, кашф этиш йўлидан борган. Ҳар бир боби бир номзодлик ишига арзигулик тадқиқот. Китобни қўлга олиб, ҳатто овқатланишдан ҳам қизганиб, бир ўтиришда ўқиб тугатиб, сўнг овқатланишга ўтирдим».

Албатта, қиблагоҳимнинг илмий камолоти, эл-юрт ўртасида шуҳрат топиши у киши мулоқотда бўлган, уни ўз бағрига олиб, катта мактаб вазифасини ўтаган ўзига хос илмий-адабий муҳит, катта ҳаёт мактабининг самараси эди. Бу - Ҳабибий,

Мағкурий, Сайфий, Анисий, Улфат, Хуррам, Ҳошимжон Раззок, Восит Сайдулла каби қаламкашларни, Аббос Бакиров, Комилжон Жабборов, Қосимжон Охунов, Фаттоҳон Мамадалиев, Йўлдошбой Кийиков, Гуломжон Ҳожикулов, Маҳмуджон Қодиров сингари санъаткорларни, Ганиёжон Абдуллаев, Сайфиддин ҳожи Жалилов, Абдумажид Абдуллаев, Фатхиддин Исҳоқовдек олимларни ва бевосита қалам тебратмасларда, адабиёт, санъатни нозик ҳис қилувчи, илмий мушоҳадада ҳар қандай илм аҳли билан баҳслаша олувчи Эшон Сайд aka Шаҳобиддинов, Солижон қори aka Восилжонов, Аҳмадрафиқ Қамбаров, Султонхон Фозилов каби ўз даврининг зуко кишиларини атрофига бирлаштирган Андижон адабий муҳити эди. Шунингдек, улар дўстлик ришталари билан боғланганFaфур Ғулом, Собир Абдулла, Тўхтасин Жалолов, Мақсад Шайхзода, Эркин Воҳидов, Иброҳимжон Ғофуров, Юнус Ражабий, Тўхтасин Жалилов, Ортиқӯжа И момхӯжав, Воҳид Абдулло, Ботирхон Валихӯжав, Шавкат Шукуров, Бокий домла, Мунирхон Муинзода, Чархий домлалар иштирок этган Тошкент, Самарқанд, Ҳўжанд, Кўқон илмий-адабий муҳитлари эди.

Шубҳасиз, дадамнинг республикамиз илмий-адабий доираларида ҳам танилиши, кенг жамоатчилик зътиборига тушишлари, Тожикистон, Қирғизистонда ҳам зътироф этилишлари Андижон илмий-адабий гурунги иштирокчилари томонидан тез-тез уюштириб туриладиган «ўтиришлар», Сайфиддин ҳожи aka Жалилов ибораси билан айтилганда, «Нафис мажлислар» самараси эди.

Тошкентлик олим Муҳаммаджон Воҳидовнинг мактубидан:

«Ассалому алайкум, ҳурматли дўстим Амонуллохон!

Сиз зоти ойилларига ва Сиз орқали барча андижонлик биродарларимга саломимни юбормоқчиман.

Амонуллохон, ҳали хотирамдан Ўшу, Андижондаги ажойиб сұхбатлар заррача хиралашгани йўқ. Жуда ажойиб таассуротлар билан қайтдим. Сизларга минг раҳмат!..

...Агар янглишмасам, Зокиржон Фурқат бир ерда шундай деган экан:

*Одам эрмас ҳар киши, гар айламас ёд Андижон,
Чүх мусоғир хотирин айлаб турар шод Андижон.
Умри кечсин даشت аро мажнун каби үл кимсанинг,
Қадрига етташ, этар үлса ёмон от Андижон.*

Ҳақ айтган гап экан. Чунки Андижонда бир марта бўлиб, андижонликлар билан сухбатда бўлган одам умрининг охирига қадар унутмайди!

Салом ва эҳтиром билан: Муҳаммад Воҳидов.

22.12.1970.

Деярли ҳар ҳафтада, турли манзилларда кандай қилинмай ўтказиладиган бу «нафис мажлислар»да катта зътибор шеърхонликка, мушоараларга қаратилар, оралиқда бўлиб турадиган мусиқий лаҳзалар шеърхонликдан жунбушга келган қалбларни ўз сехрлари билан жиловлагандай бўлар, кетидан турли мавзуларда илмий, шеърий баҳслар, фикр алмашувлар бўлар, ибратли ҳикоялар ўртага ташланиб, ҳар ким ўзи кўрган, эшитган қизиқ-қизиқ воқеаларни ҳикоя қиласдилар.

Андижон адабий гурунгининг ўзига хослиги, назаримда, уларда турли мавзулардаги мушоараларга кенг ўрин берилганлигига, унда ҳикоя қилинаётган воқеаларнинг мавзу-мазмун кўламишининг кенглигига ва ижрочиликдаги маҳоратида ёрқин намоён бўлар эди.

1944 йили август ойида таникли опера артисти Саттор Ярашевнинг Ғафурахонга уйланиши муносабати билан қўйидаги мушоара яратилган:

Бу Ғафурахон ва Саттор Ярашевларнинг тўйлари учун хурсандлик садоси ва базм гулистони таърифида ошуфта булбулларнинг лаҳну навоси.

Улфат: Шарафли тўй бугун, аҳбоблар, мастонавор ўйнанг,

Тузиб хурсандлик базмини, диллар бегубор ўйнанг.

Бокий: Олиб қўлларга нозик созлар, овози хуш бирлан,

Чолиб ноз оғаринлиқ қўйида чанггу,

рубоб, ўйнанг.

Боқир: Мұхаббат гулшанида ғунчай васл очилур чоги,

Етишди бу маҳал, гўё эрур фасли баҳор, ўйнанг.

Маҳжур: Тутарлар шодликнинг бодасин гул юзли
жононлар,
Килиб кайфу сафолар, олмайин бир дам қарор,
үйнанг.

Улфат: Икки севган кўнгуллар бирлашур бу саъд¹ соатда,
Кўрунсин шодлик акси, бўлиб ойинадор үйнанг.

Сайфий: Бири тўтийи шаккарлаб, биридур булбули
хушхон,
Икки ёш бир бўлиб, даврон гули боғ ичра бор
үйнанг.

Хуррам: Икки хушхон бўлиб жўр, мунча ҳам яхши
ярошибдур,
Яшашсин кўп замонлар қўша қариб барқарор,
үйнанг.

Ҳабибий: Бу тун Боқий, Ҳабибий, Улфату, Маҳжур ҳам
Хуррам,
Яна Сайфийю, Боқир, айтиб-айтиб ёр-ёр, үйнанг.

8 август, 1944 йил.

1946 йили Гафур Гуломнинг Яшар ва Ўзар исмли
фарзандлари вафотлари муносабати билан ёзилган
марсия-мушоара ҳам «нафис мажлислар»
иштирокчилари ҳақида тасаввур ҳосил қилувчи
хужкат бўлиши мумкин:

Улфат: Биродар, ажрамишсан бемаҳал фарзанди
жонингдан,
Ҳаётинг лаззати, лаъли лаби шаккарфишонингдан.

Анисий: Фалак золим сенинг фарҳунда² аҳволингни
рашқидан,

Айирмушдир Яшар бирлан Ўзардек қаҳрамонингдан.

Маҳжур: Вужудинг осмонидан тушиб ерга Куну Ойинг,
Ики нури ўёқмиш,³ оҳқим, ному нишонингдан.

Мунир: Жафожў, бемурувват марг ҳайликим қароқчидур,
Ики гул гунчани торож этибдур бўстонингдан.

¹ саъд -кутлуг, баҳти

² фарҳунда (ф)- баҳтили, саодатли, қувончли

³ ўёқмиш - ботмиш

Улфат: Ўлумнинг сарсари йиқмиш ики нозук ниҳолингни,
Олиб кетмиш қилиб бедод иккисин икки ёнингдан.
Хузурий: Бири булбул, бири тути эди боғи умидингда,
Фигонким, айрилибсан хушнаво ширин
забонингдан.

Сайфий: Синиб тушмиш қанотинг ногаҳон теккач ажал тоши,
Учиб шунқорлар бу қадри олий ошиёнингдан.
Боқир: Тириклик маркабини¹ шодликларга етакловчи,
Жиловдорингни элтибдур қазо илги инонингдан.
Ҳошим: Етим бир бўтадекким, бўзламишсан ун чекиб
маҳзун,
Ажал яғмогари бевақт айирмиш карвонингдан.

Маҳжур: Эшиштач бу хабар аҳроблар мотамда ўртандик,
Табиий, тушди учқун бизга ҳам ўтли фигонингдан.
Маҳжур: Сенинг суйингни ўйлаб, дийдадан хуноби ҳасратлар,
Тўкармиз барчамиз, чунким муҳибби²
жонажонингдан.

Сайфий: Қадинг ҳам бўлмасин мотам юкидан, кўзларинг
пурнам,
Кўзинг нури кетиб, ҳам айрилиб сарви равонингдан.
Маҳжур: Мураккабдур жаҳон авзои фарҳат бирла қайғудан,
Бу маъни маҳфий зермасдур маҳакки³
имтиҳонингдан.
Мунир: Тулув⁴ этса неча порлоқ кавокиблар⁵ ажаб эрмас,
Ики юлдуз агар учди тириклик осмонингдан.

¹ маркаб (а) - улов

² муҳиб (а) - севубчи, дўст тушувчи

³ маҳак (а). - кумуш ва олтинларга суртиб, уларнинг тозалигини ажратадиган тош

⁴ тулув (а.) - чиқиши, кўриниш, балқиши.

⁵ кавокиб (а) - юлдузлар.

Хуррам: Бериб мотамларингга хотима, соғ бўл ўзинг
йиллар,

Эшитмай мунглиғ ун минбаъд аҳли хонадонингдан.

Мажжур: Сепиб сув баҳри илмингдан мусибат оташин
сўндирир,

Вагарна ўртандур дунё сенинг доғи ниҳонингдан.

Мунир: Мусибат тарихи чун навҳа¹ бирла оҳ чекдиким,
Кесилди васл йўли ахтари² баҳт иқтиронингдан³.

Улфат: «Фироқинг ғами»дан жабр чекконинг бўлиб
тарих,

Қилур бу рамзни изҳор табъи нуқтадонингдан.

8 май, 1946 йил.

Дадамнинг архивларида академик Воҳид Абдуллонинг бир мактуби сақланадики, у билан танишиш қиблагоҳим мансуб гуруҳнинг илм аҳли, шеърият муҳиблари, давралардаги мавқелари нечоғлик эканликларини тасаввур қилиш имконини беради:

«Андижон анжумани кунларида қоғозга туширилмиш ушбу тухфай ночиз мулло Амонулло дўстимга хотира!

Хурмат билан камина мулло Воҳид Абдулло Самарқандий.

Қадимий ӯзбек ўзлон шаҳрлардан Андижондир бу,
Қадим бобо, қадим момо, қадимлардан нишондир бу.
Қадимлардан қамал қаттолида қақроқ эди юртим,
Бүгун озоду обод, оғарин, ороми жондир бу.
Оқарда оби замзам ортиқ энди мақтанолмайдир,
Баҳодир баҳр бунёди жавоҳирларга кондир бу.

¹ навҳа (а.) - мунгли йиги, нола.

² ахтар (ф.) - юлдуз

³ иқтирон (а.) - яқин келиш, йўлиқиши, учрашиш.

*Йигитлар сервиқору, қыздары лочину, қамчинму,
Оқ олтн үлкасн карвонларига сорбондир бу.
Сағарларда чаман сайр ахтарыб сарсон кезиб*

юрманг,

*Қадамда настарин, нарғис, атиргул бұстондур бу.
Фидойи меңнатидин мақсади ҳосиллигин ёзсан,
Нече дафтар, неча дөвонга сигмас достондир бу.
Ярашмиш сұхбат ахлига сұжансанжлик чуноноким,
Дудогидин табассум түшмагай, шириң забондир бу.
Амонулло, Азим, Улфат, Фани, Фаттах, Гулам,*

Хуррам,

*Дилоро базми назмида газалхон, нұқтадондир бу.
Газалларким Навоий, Бобуру Машраб, Ҳабибийнинг
Тилидан зоҳир үлмиш, дилда нақши жовидондир бу.
Тасанно, Ваҳидо, таҳрир этурда уқтириб айтгил,
Жаҳони жонни жонинг Андижонинг - Андижондир бу».*

Қиблагоҳимнинг таниқли кишилар билан бўлган шахсий мулоқотлари у киши илмий салоҳиятининг янги-янги қирралари очилишидагина эмас, дўстлари даврасининг кенгайишида, машҳурлик миқёсининг ортишида ҳам муҳим аҳамиятга эга бўлди.

Дадамнинг архивларидан:

«Ассалому алайкум, ҳурматли Амонуллохон ака!

Аввало сизга самимий биродарлик саломини йўллаб, сиҳат-саломатлик ва ишларингизда муваффақиятлар тилайман.

Сониян, дўстона мактубингиз ва холисона тақризингизни олиб ғоятда хурсанд бўлганлигимни изҳор қиласман. Мана, қимматли вақтингизни сарфлаб, «Йатимат ад-даҳр»ни синчиклаб ва қунт билан ўқибсиз. Сизнинг ҳақингиздаги тасаввуримиз янада кенгайди. Жанобингизга жуда катта раҳмат. Сизнинг мактубингиз миллий маданиятимизга бўлган муҳаббатингиз нишонасицидир. Ёзган фикр ва мулоқазаларингиз ғоятда мазмунли ва тўғри. Ўйлайманки, бундан буён Сиз ва бизни қизиқтирадиган айрим илмий мав-



Аманулло Валихонов
Боқир



Боқир(2-қаторда, ўртада)нинг йигитлик даври.
1952 й.



Амонулло Валихонов 29-ўрта мактабда 10-синф ўқувчиси
Шоввоз Ҳомидов (ҳозирда тиббиёт фанлари доктори,
профессор) билан биргаликда геометриядан машғулот
пайтида.

1957 йил



Ёш Боқир бир гуруҳ олимлар даврасида.

Биринчи қаторда ўтирганлар (чапдан): Ҳошимжон Рассоқов, Амонулло Валихонов.

Иккинчи қаторда ўтирганлар: (чапдан): Акрамжон Иброҳимов; Ҳоди Зарифов;Faфур Гулом; Порсокон Шамсиев; Собиржон Иброҳимов.

Турғанлар (чапдан): Имодиддин Қосимов; Абдулаҳад Азизов; Тожибий (Наманган); Абдурашид Азизов (Анисийнинг ўғли);

1958 йил, 15 апрель, Андижон.



Андижон, 1979 й. февраль. Академик Воҳид Абдулло ва профессор Ботирхон Валихўжаевлар андижонлик ижодкорлар, олимлар даврасида.



Боқирнинг ҳамфир сұхбатдошлари:

Үлтирганлар (чапдан): Абдулхамид Абдураззоқов (Хуррам); Тұхтасин Жалолов (адабиётшунос олим); Имодиддин Қосимов (Улфат);

Тик турғанлар (чапдан): Сайд Эшон ака, Ганижон Абдуллаев; Амонулло Валихонов (Боқир)

1975 йил 24 июнь, Андижон.

зулар ҳақида фикр алмашиб турсак, бир-бири миздан мамнун бўлур эдик.

Тақризни «Гулистан»га юборган экансиз, уни рўёбга чиқарамиз. Меҳнатингиз учун яна бир карра раҳмат!

Хурмат ва самимият ила Исламатуллоҳ ибн Абдуллоҳ¹.

24.05.1977.»

«Муҳтарам Амонуллохон!

Паҳлавон Маҳмуд рубоийлари «Гулистан» журналининг шу йил 11-сонида босилади. Бу хусусда Асқаджон билан келишиб қўйдик². Бунинг учун таржималар 15 августгача менинг қўлимда бўлиши шарт. Таржима тамом бўлиши билан дарҳол машинкада уч нусха кўчириб, икки нусхани менга юборишингиз керак. Мен учун Андижоннинг хуштаъб, хуштавозе ва ўқтам йигитларига, яъни барча ёру дўстларимизга самимий салом топширинг. Ҳаммаларингизга сиҳат-саломатлик ва хушнудлик тилаб:

Тўхтасин Жалолов. 17.07.1975.»

Албатта, юқоридагидек нозик табиат, нуктадон кишилардан таркиб топган Андижон адабий, илмий муҳити қиблагоҳимга аждодларидан мерос бўлиб ўтган барча улуғворлик сифатларининг тўла рўёбга чиқишида муҳим аҳамиятга эга бўлди.

Дадам ҳаётларининг сўнгги йилларида (1983 йилдан) Андижон адабиёт музейининг мудири сифатида иш бошлашлари ҳам у кишининг айрим яширин кирралари очилишида, ўз истеъдодларини тўла намоён қилишларида ўзгача имконият яратди.

Худди шу йилларда музей жойлашган Жомеъ биноси адабий марказга айланди. Ҳар куни бу ерга илм аҳли, шоирлар, санъаткорлар ва уларнинг муҳлислари

¹ Исламатулло Абдуллаев – филология фанлари доктори.

² Асқад Муҳтор – «Гулистан» журналининг бош мұхаррири.

йиғиладиган бўлди. Андижонга йўли тушган таниқли кишиларнинг деярли ҳаммаси шу ерга жамланар, керакли кишиларни шу ердан топишиб, узундан-узоқ сұхбатлашар ва шундан кейингина мўлжалланган манзилга йўл олардилар.

Музейга бош сақловчи сифатида ишга қабул қилинган Солижон қори ака Восиджоновнинг ишга эрта келиши барча ўртоқларнинг шу ерга тўпланишиб, биргаликда нонушта қилишлари учун баҳона эди. Эрталаб бошланган «нонушта» кўп ҳолларда кечга қадар давом этарди.

Солижон қори амакимнинг маслаҳатлари ва қиблагоҳимнинг тинимсиз ҳаракатлари, фидойиликлари билан Андижон адабиёт музейи кўргазмаси деярли қайта жиҳозланди, янги-янги манбалар, маълумотлар билан бойитилди. Маҳаллий шоирларнинг мерослари тўпланди.

Ўзбекистонда хизмат кўрсатған фан арбоби, профессор F. Абдуллаев ва тарихшунос олим Сайфиддин ҳожи ака Жалилов хотираларидан:

«Андижон адабий муҳити, Андижон адабиёт музейи ҳақида гап кетса, кўпчиликнинг кўз ўнгидан ҳаракатлари юмшоқ, қарашлари ювощ, камсуқумлик билан жилмайиб жавоб берувчи олим Амонулло Валихонов ўтади.

Зукко олим, нозиктаъб шоир Амонуллохон Андижонда Бобур номидаги адабиёт музейини ташкил этиш борасида иқтидорли ташкилотчи эканини намоён этди...»

* * *

Ибрат:

*Шифойи васл қадрин ҳажр ила бемор ўландан сўр,
Зилоли завқ шавқин ташнаи дийдор ўландан сўр.
(Фуэулий).*

Қиблағоҳим Фузулийнинг юқоридаги байтини умрларининг сўнгги даврларида тез-тез такрорлаб турад эдилар.

Дадам шифохонада узоқ ётиб даволандилар. Дўйстлари шифохонада ҳам, уйга келганларида ҳам ёлғиз қолдирмасликка ҳаракат қилдилар. Қўлларидан келганича кўнгилларини кўтаришга, ҳазил-мутойибалар билан «дарддан йироқлаштиришга» ҳаракат қилдилар. Бундай пайтларда қиблағоҳимнинг ўзлари ҳам ҳазил-мутойибаларда иштирок этишга уринар, дарднинг оғирликларидан озор чекаётганликларини сездирмасликка, дўйстларига таскин беришга интилардилар.

1986 йилнинг декабр ойлари эди. Қосимжон ака Охунов ўзлари бир оз бетоб бўлганликлари сабабли, дадамдан хабар олгани кела олмаган эдилар. Шунинг учун ўзларини дуруст сезишлари биланоқ дадамга қўнғироқ қилиб узр сўрадилар:

- Шамоллаб қолганлигим учун ҳузурингизга бора олмаяпман.

Дадам шу пайт у кишининг лақабларига ишора қилиб¹:

- Кеча қалин қор ёғиб, болалар билан узоқроқ ўйнаб қўйибсиз-да! Эҳтиёт бўлинг, яна қор бўрон остида қолиб, йўқолиб қолманг,-дедилар.

Бу ҳазилдан икковлари мириқиб кулишгани эшитилиб турарди.

Шу сухбатнинг эртасига дадам кома ҳолатига тушиб қолдилар. Шифокорларнинг қаттиқ саъй-ҳаракатлари сабаб, уч кундан сўнг яна бир оз ўзларига келдилар. Бундан хабар топган дўйстлари дадамни кўргани келдилар.

Шу кунлари Қосимжон ака ҳам ўзларини тузалган билиб, Улфат домла, Сайд Эшон акалар билан биргаликда хонадонимизга файз киритдилар. Дадам уларни кўрдилару, ўзларини дадилликка солиб,

¹ Қосимжон Охуновнинг лақаби «ёш бола» эди.

ўринларидан турдилар, меҳмонларга пешвоз чиқмоқчи бўлдилар. Шунда Қосимжон aka дадамни тұхтатиб:

- Тақсир, ўринларидан турмасинлар, уриниб қола-дилар. Уша ерга «чўккалай қолсинлар», - дедилар.

Дадамнинг лақабларига ишора қилиб¹ «чўккалай қолсинлар» дейилиши ўртада самимий кулгу уйғотди. Кўзимизга дадам ўз аслларига қайтгандек, дардлари чекингандек кўринди. Бу сұхбатдан кейин дадам ўзларини анча енгил ҳис қилдилар.

Назаримда, қиблагоҳим бетоб ётганларида «дўстлар васли» қудратини бошқаларга нисбатан теран ҳис қила олган эдилар. Ўз дўстларидан миннатдор эдилар. Шу билан бирга дўстлари хизматларини ўзи истаганича қила олмаганидан афсусланиш, армон акс этиб тургандек эди.

Қиблагоҳимнинг меросларини кўздан кечирар эканман, у кишининг қаламларига мансуб ушбу газал диққатимни тортди:

«Бу касаллигум муносабати билан жондан
азиз дўстларга үзрнома,
Гарчи уни ёзишда ожизлигини намойиш
айлади қўлимдаги хома.

Қилди ҳужум танамга ажаб бедаво касал,
Ётқизди қўиди, кучни олиб ўтмайин ҳаял.
«Дорини кўп ичиш, дедилар, дардинга сабаб»,
«Хайрул умури авсатуҳ²!»-эрди кўп гўзал.
Боғримга урди нойзасин дард лашкари,
Тешди жигарни дард ўқи, ўйл топгали ажал.
Баргин тўкишга-ю, ҳашаротин этишга дафъ,
Ҳар не сочилса нахтага, менга пичоқ мисол.

¹ Амонуллохоннинг лақаби «бузрук» эди.

² «Ҳар ишнинг ўртасаси яхши» - ҳодис.

*Ҳозиқ табиблар неча заҳмат чекишилар,
Дардим иложин этгали маҳкам қилиб бағал.¹
Жон дўстларки, саъю² таважжұхлари³ ила,
Дардим шифосин тилашур эрди ҳар маҳал.
Күбдан таважжұху ҳаракатлар натижаси,
Соглиқла дард ўрин талашурлар адал-бадал.
Боқир, де шукр токи тириксан, умид этиб,
Бергүвчи дард, берса давосин, ажаб матал.
Жондин азиз дўстларим, афв этинг мени,
Ки сусту нодуруст эса ҳам битдим бу газал.*

1986, ноябр.»

1986 йилнинг ноябрида битилган бу ғазал қиблагоҳимнинг ўзларига чиқарған ҳукми эди.

Зоро, бу пайтда у киши руҳиятлари умид ва умидсизлик курашлари гирдоблари орасида эди. Ўзларига қанчалик таскин бермасынлар, атрофдагилар бу дарднинг ўткинчи эканлигига қанчалик ишонтиришга ҳаракат қиласынлар, яғмогар хасталикка қарши чорасизлигини ҳис қила бошлаган эдилар.

Бу «чарх қажравлиги»ни енгиб, ўзи хоҳлаган тарзда ҳаёт кечириш имкониятини яратса олган, иқболини дўстлари даврасидан қидирган ва фақат ўша ерда топган кучли ирода соҳибининг «тақдир ҳукми» олдида ўз ожизликларини эътироф этишлари эди.

Мана бу эса дадамнинг энг сўнгги ёзган ғазалларирид:

*Жаҳонга кимки келшиш-кетмаги охир муқаррардир,
Келиб-кетмак русуми барча инсонга баробардир.*

¹ бағал (ф.) - құлтық, қүйин

² саъю (а.) - астойдил ҳаракат, ғайрат.

³ таважжұх (а.) - юзланиш, ҳайрихоҳона қараш

*Келиб, қўймоқ қадам тенгдир қадам қўймоққа кетмакка,
Келиб-кетмак, келиб-кетмак, келиб кетмак саросардир.*

*Жаҳонга нега келмиш? Мақсадин билсин аниқ ҳар ким,
Буни ким билмагай, кўнгли аниг доим мұқадддардир¹.*

*Келиб-кетмакда маъно йўқ, агар беманфаат бўлса,
Ватан, эл нафъин ўйлаш яхши инсоний сифатлардир.*

*Нечунким, тарбият айлар Ватан-эл одам авлодин,
Кишининг эл-Ватан меҳри билан кўнгли мұнаввардир.*

*Элу-юрт ўз жигарбандин қилурда тарбият, гўё -
Берувчи сањати олтун-кумушга жилва заргардир.*

*Ватан - эл қилган ўз фарзандига бу меҳрибонликлар
Жигарбандин дилида ишқ ўтиш ёқгувчи ахгардир².*

*Садоқат-ла Ватанга - элга хизматга белин боғлар
Ватан ишқин дилида сақлаган эр, гар диловвардир.*

*Элу - юртга садоқат зоҳир айлаш-айлаш инсонлик,
Бунга ким арзимас-ул арзимас эрликка, остардир.*

*Бу ерга токи келди, эл-Ватанга айласин хизмат,
Кўнгулни тоза тутгай, кимки бу ишга сафарбардир.*

*Зарурат бўлса Боқир, эл - Ватан йўлида жонинг бер,
Бу ҳил раҳрабга мангаликнинг авжи чун мұяссардир.*

30 ноябр, 1986 йил.

*1986 йил декабрнинг 27 сида қиблагоҳим руҳлари
омонат жасадларини «Бобо Саъдиддин» қабристонида*

¹ мұқаддар (*а*) - кирланган, хирадланган, гамли.

² ахгар (*ф*) - ёниб турган олов, лахча чўз

қолдириб, боқийлик дунёсига, абадий барҳаётлик оламига парвоз қилди...

Дағн маросимидаги дил изҳорлари:

Профессор Ғанижон Абдуллаев:

«Амонуллохон бирор одамга қаттиқ гапириб күнглини қолдирмаган, бирор кишини хафа қилмаган, хушмуомала, хуш хулқ инсон эди. У ҳаммага фақат яхшилик қиласарди. Ҳаммага наф етказгиси келар эди.

Вилоятдагина эмас, республикада, ҳатто бошқа республикаларда ҳам уни чин дўст сифатида қадрлар здилар. У ўта билимдон, зукко олим, нозик табиатли шоир эди. Бир сўз билан айтганда, у энциклопедист олим, «халқ академиги» эди.

У шогирдлари қалбида, ёзган китоблари саҳифаларида, шеърлари мазмунида абадий яшайди».

Фатҳиддин Исҳоқов:

«Агар бошқа вилоятларга борганимизда, бизларни у ердагилар танимасалар, «биз Амонуллохоннинг дўстлари бўламиз» десак, дарҳол ҳурмат билан, иззат-икромлар билан бизларни қабул қилишар, меҳмондўстликни ўрнига қўйишар, бир пиёла чойсиз жавоб бермас здилар. Андижон аҳли жуда катта жудоликка учради. Ҳаммамиз учун азиҳ, ардоқли бўлган Амонуллохонни сўнгги йўлга кузатяпмиз».

Иқтисодчи олим Ҳасанохун Мусаев:

«У чин маъноси билан аҳли дониш тўраси бўлганлиги учун ҳам ҳаммага ардоқли, ҳурматли эди. Энг афсусли томони шуки, шунчалик ақлу заковат, билим, донишмандлик тупроққа қўшилиб кетди».

Бу «Дил изҳорлари»ни вақтлар ўтиб, хотиротлар ичидан топиб олиб кўздан кечирар эканман, хаёлан Ҳасанохун Мусаевга зътиroz билдирган бўламан: «Йўқ! Ақлу заковат, билим, донишмандлик тупроққа қўшилиб кет-

майди! У авлодлари қонида, шогирдлари заковатида, дўстлари хотирасида қайта ҳаёт бошлайди. Унинг муҳиблари, мухлислари тирик экан, унинг номи улар билан абадий яшайди, уларнинг хаёлий суҳбатдоши сифатида, уларга «ҳаёт сабоги»дан дарс беришни давом эттиради».

Шоир Үлфат:

Азиз ва мўътабар олим, баланд истеъододли шоир,
нафис табиатли муаллим, қадрдан укахоним Амонулло
Валихонов вафотига

ТАЪРИХ - МАРСИЯ

Минг таассуфким, бу кун бизларни мотамода қўйиб,

Ўтди оламдин ажойиб фазл аҳлин сарвари,

Соҳиби илми ладун эрди, бағоят покрўй,

Обрўй топган эл ичра илм элин сардафтари.

Шеър илмин номдори, зеҳни рағшан кун каби,

Наср дунёсида гўё эрди меҳри ховари¹.

Эрди устоди Навоий, ҳам Фузылий шеър аро,

Хотирида ёд эди ашъорларининг аксари.

Хулқ-атбори мулойим, сўзлари жондек лазиз,

Нутқи гавҳарпошига ошиқ эди элнинг бари.

Дарсгўйлик қилди фанлар боргоҳи ичра кўп,

Топди зийнат сўзларидан илм элининг минбари.

Маҳзани меҳру вафо эрди кўнгил ганжинаси,

Олами инсоният ичра садоқат заргари.

Асл зати шаҳзода, фикри олий ижтиҳод²,

¹ меҳри ховари (ф.т) – Шарқ қуёши, қуёш

² ижтиҳод (а.) – интилиш

*Химматин олдида паст эрди жаҳон сийму зари.
Эл аро номи Амонулло, ўзи покиза табъ,
Назм аро Боқир лақаб, ашъор элин тожи сари.
Бедаво дардга гирифторликда чекди ранжлар,
Бўлди ожиз дафъига бул кун замон ҳозиклари.
Олтмиш уч ёшида кўз юмди жаҳонни тарк этиб,
Айлади умрин ҳазон беражм ажсал горатгари¹.
Илм қомуси эди, афсус, минг афсуским,
Борди тупроқ қўйнига бундок билимнинг пайкари.
Ёнди мотам ўтида дўстлар, барни фарзандлар.
Кулга айлантируди жонни бу жудолик ахгари².
Келмогу кетмоқ эмиш инсонга қонуни азал,
Сабрдин йўқ ўзга чора, биз қадарнинг чокари³.
Минг тўққиз юз саксон олти эрди милодий сана,
Охри эрди декабрнинг, юмилди кўзлари.
Фавти тарихин ёзарда Улфатий қилди савол,
Ақл пиридин не деб тарихи мотам парвари.
Фазл элиниг сұхбатидин деди ул узгач «нигоҳ»
Бўлгуси тарихи фавти⁴, «Фазл аҳлин сарвари».*

Андижон, 1407 ҳижрий.

¹ горатгар (а.-ф.) - талончи, ҳўжум қилувчи

² ахгари (ф.) - чўя

³ чокари (ф.) - хизматкори

⁴ фавти (а.) - бақти

ХУШ КЕЧАР УМРИМ МЕНИНГ...

Ҳикмат:

Сен менга дўстларингни курсат, мен сенинг кимлигинги айтаман.

Ибрат:

Эй қўнгил, ёр эт ўзингга қадрлик дилҳоҳ¹ дўст,
Сен билан ҳар ишда бўлсин жон каби ҳамроҳ дўст.
Бўлса чин дўстинг ҳамиша қайгудан озод сен,
Ёғса гам борони бошга, дафъига ҳиргоҳ² дўст.
Эҳтиёт эт, дўст танлаш чоги жамъият аро,
Бўлмасин сенга яқин, гофил топиб гумроҳ дўст.
Дўсти нодондан зийрак душманни афзал дейди ҳалк,
Айлагай душман ишини, бўлса надон гоҳ дўст.
Қўнса бошингга Ҳумо, баҳтингга магрур бўлма, ҳеч,
Бўлмаган ҳеч кимсага бу мансаб ила жоҳ³ дўст.
Молу, мансабга бирор дўст бўлса қилма эътимод,⁴
Курсатур гарчи ўзини сенга давлатҳоҳ дўст.
Дўстларнинг сұҳбатидан топдинг, Улфат, эътибор,
Шукр қилким, сұҳбатингдан қилмади икроҳ⁵ дўст.

ДАДАМНИНГ ДЎСТЛАРИ

Қиблагоҳимнинг ажаб бир одатлари бор эди. Қачон хонадонимизга улфатларини таклиф этган бўлсалар, кайфиятлари кўтарилиб кетар, қилинаётган тайёргарликларни зимдан кузатардилар-да, ўзларича Собир Абдулланинг:

¹ дилҳоҳ (ф.) - дил ҳоҳлаган

² ҳиргоҳ (ф) - чодир

³ жоҳ (ф.) - амал, мартаба

⁴ эътимод ёки иътимод (а.) - ишониш, ишонч, суюниш

⁵ икроҳ (а.) - жирканниш, нафратланиш.

*Хуш кечар умрим менинг чин дүстүр аҳбоби билан,
Дүстүр аҳбобим азиз ахлоқу одоби билан.
матлаъси билан бошланувчи газалини хиргойи
қилишни яхши кўрардилар.*

60-йилларнинг бошларида яратилган бу ғазал ўз даврида машхур бўлиб кетганлиги учун уни тўла келтираман:

*Хуш кечар умрим менинг чин дүстүр, аҳбоби билан,
Дүстүр аҳбобим азиз ахлоқу одоби билан.
Ошноларсиз гўзал bogу, чамани на қиласай?
Завқсиз ўтгай куним, бор айш асбоби билан.
Қадру қимматлар ҳарорат баҳш этиб дўст қалбига,
Доимо кўнглим ёритгай меҳрининг тоби билан.
Топмасанг бир яхши дўст, бедўст ўтган яхшироқ,
Бўлма дўст ҳаргиз кишининг кўнгли қаллоби билан,
Бўлмагай хурсандлигим бедўст, ўртоқ bog аро,
Базм агар бошланса ҳам Ҳайём майи ноби билан.
Бир нафаслик яхши сухбатга сотурман, ким олур?
Масжиду тоат ибодатларни меҳроби билан.
Ишқдан қайтаргучи гар юз китобдур, мақтама,
Тенг эмас ҳаргиз мұхаббатноманинг боби билан.
Ёт агар кўй сўйса ҳам йўлингга, Собир, бормагил,
Дўст илиа сухбатни туз, ёвғону, ардоби билан.*

Назаримда, бу ғазал дадамлар ва дўстлари учун ёзилган эди. Чунки, Собир aka Андижон театрига адабий эмакдош бўлиб хизматга келган дастлабки кунлариданоқ, бу ердаги адабий гуруҳ билан боғланган ва уларнинг ажралмас ҳамсуҳбатига айланган здилар.

Самимият асосига қурилган беғараз, беминнат бу дўстликнинг меҳр-оқибат, ибрат қилиб кўрсатишга арзийдиган жиҳатлари кўплиги учун ҳам бу шеър у кишининг андижонлик дўстларига бўлган садоқатлари изҳори сифатида катта аҳамиятга эга.

Самимий дўстликнинг аҳамиятини дадамни тупроққа кўйиб келгандаридан кейин, кўчамизнинг бошидан бир одам фарёд чекиб келаётганликларини кўрганда илк бор туйганман. «Фарёд чекиб келаётган бу одам ким бўлди экан?» - деб турганимизда, дарвозадан дадамнинг яқин

қадрдонларидан Сайфиддин ҳожи ака Жалилов кириб келди-да, дадам ётган жойга юзларини босдилар ва чуқур, дардли изтироб билан, кўз ёшларини тұхтата олмай: «Менинг Амонуллохон дүстим қани?! У бизларни ташлаб кетдими?! Мен дүстимни охирги йўлга кузата олмай қолдим-ку!» - дея афсуслар чекдила.

Маълум бўлишича, у киши дадамнинг қазоси етган пайтларда бошқа жойга кетган бўлиб, дафн маросимидан бехабар қолган эканлар. Уйларига келибдилару, нохуш хабарни зиштибдилар ва тўғри бу томонга йўл олибдилар. Шу куни Ҳожи амакимлар бизларга қош қорайгунча қайгудош бўлдилар, ҳол-аҳвол сўраб келгувчиларни бизлар билан кузатишилар.

Дўстга садоқат, дўст хонадонидагиларнинг қайгула-рига ҳамдардлик қиблагоҳимнинг ўшлиқ дўстлари Муҳаммад Усмон ака Азизов томонидан ҳам ўзгача тарзда намоён этилди.

1987 йили «Хотира куни»да дадамнинг ётган жойларини зиёрат қилиб, уйга энди келиб турган эдик, Муҳаммад Усмон амаки келиб қолдилар. Бомдод вақтида бугун «Хотира куни» эканлиги эсларига тушибди-да, ўшдан тўғри шу ерга келибдилар. Хоргинлик, узоқ дард тоqtган одамларда бўладиган ҳаракатдаги сустлик, нафас олишдаги нотекисликдан унинг бу ерга қийинчилик билан етиб келганниклари сезилиб турарди.

Маълум бўлишича, улар дадамларни «охирги йўл»га кузатиб кетгач, икки кундан сўнг инфаркт бўлиб касалхонага тушибдилар ва узоқ вақт даволаниб, бир кун аввал шифохонадан чиқибдилар.

У киши узоқ вақт тиловат қилиб, савобларини ўтганларга, жумладан, дўстларининг руҳи покларига бағишлидилар. Сўнг бизларга таскин бериб, бир оз вақт гаплашиб ўтирдилар. Ўринларидан туриб, дўстининг қабрларини тавоғ қилиш нияти борлигини айтиб, «Бобо Саъдиддин» қабристони томон йўл олдилар.

Шубҳасиз, Муҳаммад Усмон амакининг бу ҳимматла-ри ибраторумуз, чин инсоний фазилат эди.

У кишини кузатиб туриб эдикки, бизлардан ҳолаҳвол сўраб, устозини хотирлаб ўтиш учун Тошкентдан Маҳкам Маҳмудов икки ижодкор ўртоги билан келиб қолдилар. Улар ҳам бизларга қўлидан келганича таскин беришга ҳаракат қилиб, устози қабрларини зиёрат қилиш ниятини айтиб, рухсат сўрадилар.

Шу куни ҳадсиз-ҳисобсиз кишилар қиблагоҳимни йўқлаб келдилар.

Кўз ўнгимда 50-йилларда бўлиб ўтган қуйидаги воқеа намоён бўлди.

Дадам қаттиқ хасталик билан шифохонага тушиб қолганларида Воҳиддин амаки (Аббос Бакировнинг жияни) бирор кунни канда қилмай ҳар куни аввал шифохонага борардилар. Кейин Ойбувимлардан хабар олиш учун хонадонимизга келардилар. Дадамнинг болаликдан дўстлари бўлган у киши бизниги келганларида, албатта, бизларнинг кўнгилларимизни кўтариб, дадамнинг сиҳат топаётганлигини айтардилар ва «Менга қандай хизматлари бор?» - деб сўрадилар.

Ривоят:

Лукмони ҳакимдан сўрабдилар: «Дўст неча ҳил бўлади ва қай бирлари садоқатда событ бўладилар?»

У киши жавоб қилибдилар:

- Дўст уч ҳил кўринишда намоён бўлади: «Кўз дўст», «қўл дўст» ва «қалб дўст».

«Кўз дўст» - фақат кўз кўзга тушганда дўстликни изҳор қиласди. Ва бошқа пайтларда дўстини эсга ҳам олмайди. Бу - дўсти бевафо.

«Қўл дўст» - дўстликни мол-дунёга қараб қуради ва кўлда ҳеч вақо қолмагандан дўстини ташлаб кетади. Бу - хиёнаткор дўст, дўсти бебақо.

«Қалб дўст» - қалбингга дўст бўлади ва на мол-дунёнг, на унинг қошида бўлиш-бўлмаслигинг дўстлик риштасини уза олмайди. У борлиги билан сенинг мушкулотингни осон қилишга интилади ва ҳеч нарса тама қилмайди. Бу дўсти беминнат, дўсти бовафодирки,

улар билан дўстликнинг ришталарини абадийликка боғлаш, иккала дунёнинг соодатига эришишадир.

Ушбу хотиротлар баҳона дадамнинг дўстларини бир-бир хаёл кўзгусидан ўтказар эканман, уларнинг ҳаммалари «қалб дўст»лар бўлганлигига ишонч ҳосил қиласман. Улар қиблагоҳим вафотларидан кейин ҳам бизларни ташламадилар, имкон топишлари билан йўқлаб турдилар, кўнгилларимизни кўтардилар.

1997 йили аям фалаж бўлиб ётиб қолдилар. Бундан хабар топган дадамнинг укахонлари Махсумхон ака ва дўсти қадрдонлари Эшон Саидхон аканинг ўғиллари Заҳириддин аямдан хабар олиш учун келишиди. Уларни кўриб аям ўзларини тўхтата олмай узоқ йиғладилар. Улар тасалли бериб: «Аллоҳ суйган бандасига дард берар экан. Хафа бўлмасинлар. Иншооллоҳ, дардини берган, шифосини ҳам ўзи беради», - дейишиб, аямнинг кўнглини бир оз кўтаришга ҳаракат қилдилар.

Қиблагоҳим Сайид Амонуллохон тўранинг кимлигини, албатта, у киши дўст тутинган кишилар қандай тоифадаги кишилар эканлигидан билса бўлади.

Дадамлар ўз дўстлари сифатида, аввало, Андижон адабий гурунги аъзолари Ҳабибий, Маҳжурий, Сайфий, Анисий, Улфат, Ҳуррам, Хошимжон Рассоқов, Восит Саъдулла, Азимий каби шоирларни, Аббос Бакиров, Қосимжон Охунов, Фаттоҳхон Мамадалиев, Йўлдошбой Кийиков, Гуломжон Ҳожиқулов каби хофизу бастакорларни, зурафо аҳллари Эшон Саидхон ака Шаҳобиддинов, Солеҳжон қори Восиджонов, Султонхон Фозилов, Аҳмадрафик Қамбаров, Маҳмуд Қодиров, қўқонқишлиқлик мулла Муҳаммаджон қори ака, Ғанижон Абдуллаев, Сайфиддин ҳожи ака Жалилов, Фатҳиддин Исҳоқов, Фозилжон Икромов, Махсумхон Маҳсумов, Абдуғани Ҳамидов ва улар билан гурунгларда иштирок этган қатор ҳарифлари ва улар орқали боғланган Тошкент илмий-адабий муҳитидан Ғафур Ғулом, Собир Абдулла, Тўхтасин Жалилов, Юнус Ражабий, Орифхон Ҳатамов, Тўхтасин Жалолов, Эркин Воҳидов, самарқандлик Воҳид Аб-

дулло, Ботиржон Валихўжаев, Шавкат Шукуров кабиларни билганлар.

Ҳикмат:

Фақат илм билан баландмас одам,
Аҳду вафо билан баланд паст одам.
Сўзи билан иши бир бўлса агар,
Ҳар нарсадан баланд, муқаддас одам.

Юқоридаги мисралар дўст танлашда қиблагоҳим зътиқодларига ҳамоҳанг эди. Улар учун дўстлик, аҳду вафо, сўз билан иш бирлиги, одамийлик муқаддас ҳисобланарди.

Дўстлик шартларига, аввало, у кишининг ўзлари қаттиқ амал қилардилар. Дўстларини йўқлашда, улардан хабар олишда фидойилик кўрсатардилар.

Тўхтасин Жалоловнинг «Бону» китобидан:

«Уш бозорига келганда Амонуллохон ўзбек анъаналарига мувоғиқ ширмой нон, қанд, бодом, писта каби нарсаларни харид қилди-да, яна атрофга жавдираб қарай бошлиди. «Ҳа!» - десам: «майиз керак эди», - деб қолди. Ҳолбуки, шу қандолатчининг ўзида олтин каби сап-сариқ кишмиш бор эди. Мен кишмишга ишора қилиб: «Бу бўлмайдими?» - дедим. Амонуллохон мийигида кулиб:

- Йўқ, домла, қора майиз керак, - деди.

Ахтара-ахтара, қора майиз топдик. Лекин Амонуллохон: «25 грамм майиз тортиб беринг», - деб қолди. Бу гапни эшитиб, мен ҳам, майизфурӯш ҳам ҳайрон бўлдик. Лекин майизфурӯшнинг ўзга чораси йўқ эди. У 25 грамм майиз тортиб берди. Мен Амонуллохонга савол назари билан қарадим. У:

- Сабр қилсинлар, бунинг сабабини кейин биладилар, - деди.

Шарафиддин aka бизнинг йўлимизга мунтазир эканлар, оstonадан қадам қўйишимиз билан:

- Мозор босиб келган дўстлар дийдорини кўришдан бисёр мамнунман, - дея зарофат қилди.

Бизда «Мозор босган нон» деган таъбир бор. Ундан нон табаррук бўлади. Уни кўзга суртиб ейишади. Аммо «Мозор босиб келган дўстлар» таъбири тамом янги бўлиб, хушнуд кулгига сабаб бўлди.

Катта боғнинг ўртасида қурилган меҳмонхонага кирдик. Шарафиддин ака Амонуллохоннинг қўлидаги нарсаларни кўриб:

- Нега овора бўлдилар. Ахир дастурхон кўтариб юриш хотинлар одати-ку, - деб «койиб» берди.

Амонуллохон ҳам ҳазил занжирини бўшатмай:

- Эскиларнинг «мулла киши - хотин киши», деган мақоллари бор. Икки мулла бир бўлиб, бир аёлчалик иш қилган бўлсак, бизни маъзур кўрасиз, - деб жавоб берди. Яна кулги, чақ-чақ бошланди. Мезбон дастурхонга кириб кетганда, Амонуллохон 25 грамм майиз ҳақида сўз очди:

Фарғона йигитларининг қизиқ одатлари бор. Бир-бирларига лақаб қўйиб, чандишиб, асқия қилишмаса, кўнгиллари тўлмайди. Қора майиз у кишининг лақабларига ишора. Аслида эса Мақсум акам (Шарафиддин акани дўстлари Мақсум ака деб аташарди) умрларида кўкнори ичган эмаслар. У киши кўпинча тафаккурга берилиб, хомуш ўтирадилар. Кўкнорининг сукутга кетиши билан Мақсум аканинг ана шу ҳолатида ўхшашлиқ бор. Шунга ишора қилиб, ҳарифлари унга «Кўкнори» деб лақаб қўйганлар.

Тўкин дастурхон ёзилди. Шарафиддин ака бизларга чой қуйиб бериб, ўз пиёласини лабига олиб борган ҳамон Амонуллохон «шошманг» ишорасида қўл кўтариб, ўрнидан қўзғолди. Шарафиддин ака ҳам турди.

Амонуллохон узр сўраган оҳангда:

- Хом сутган эмган банда-да, бир нарсани тамом унутибман. Сизга андижонлик ёру - дўстлардан тухфа келтирган эдим. Лутфан қабул этсинлар, - деб, ўн қават қоғозга ўралган бир нарсани Шарафиддин акага узатди.

Шарафиддин ака ҳанг-манг бўлиб, кутилмаган тухфани оча бошлади.

Бу ўн-ўн икки дона қора майиз эди. Бирдан шундай қаҳ-қаҳа кўтарилдики, учаламизнинг кўзларимизга ёш тўлди.

Бу - сўёзиз асқия эди. Лекин бу ҳақоратомуз, дилозор, яланғоч асқия эмас, бегараз закийликнинг бир товланиши эди.

Дадамнинг дўстларига бўлган самимиятини тасдиқловчи яна бир одатлари у кишининг турли байрамлар, улуғ кунлар, айрим маросим муносабатлари билан эринмай табрик хати, шеър, телеграмма билан, ёки вақт топиб ўзлари шахсан муносабатларини изҳор қилиб қўйиш одатлари эди.

Жумладан, 1965 йил бўсағасида дадам ўша пайтда Тошкентда яшаётган Анисий домлага табрикнома йўллаганлар. Бу табрикномага 1965 йил 6 январда у кишидан жавоб хати олганлар.

Бу хат бевосита мавзуга алоқадор бўлганлиги учун уни тўлиқ келтирамиз:

С Новым годом!

Боқиро, келди ҳатинг тилда «С Новым годом!»
Мени қутлаб бу янги йилда «С Новым годом!»
Сизга ҳам бу янги йил мен каби қутлуг бўлсин,
Эски йилдек яна бу йилда «С новым годом!»
Келсангизлар иигилиб, байрам этарга дўстлар,
Шавқи сүҳбат тўла кўнгилда «С Новым годом!».
Орзусида ширин сүҳбатингизнинг доим,
Етар эрдим сизга ҳар йилда «С Новым годом!».
Бир гўзал ҳуснига мафтун ұла бормай қолдим,
Бели нозиклиги йўқ қилда «С Новым годом!».
Барча эл топди зафар меҳнат ила ўтган йил,
Янги йил байрами ҳар элда, «С Новым годом!».
Яна бир ёш қаридим деб, ҳафа бўлманг, Улфат,
Яшаринг зоҳирю ҳам дилда, «С новым годом!».
Бўлингиз катта, Қосимжон ака, сиз ҳам ўйнанг,

Шару сурнайча түтиб қўлда, «С Новым годом!».
Қўйдингиз бир қадам олдинга яна, эй Бақир,
Тез юриш сиз каби йўқ филда, «С Новым годом!».
Дўстлар сұхбатига илгари кел, эй Хуррам,
Қувватинг бўлса агар белда, «С Новым годом!».
Ҳаммангизга тиласидир бу Анисиининг: бўлинг
Бахту иқбол уза бир хилда, «С Новым годом!».

1965 йил, 6 январь.

Мазкур табрикни олишлари билан дадам унга
шундай жавоб ёзган эдилар:

Келди ҳат Муллакадан тилда «С Новым годом!»
Барчани қутламоги дилда, «С Новым годом!»
Севиниб, ҳатни олиб, кўп ўқидик ҳўп кулишиб,
Ҳат биринчи эди бу йилда, «С Новым годом!»
Бўшашиб парпашадек йўлда узоқмеш ҳатингиз,
Ўқилиб ёки неча тилда «С новым годом!»
«Чарҳу чармак, йигу дук, танда - таноб, наича-дудуқ»-
Деб, - ўчиргич, савату пилта - «С Новым годом!»
Ўқиёлмасдик ўқиб, не эканин унда радиф,
Русча ёзилмаса чернилда «С Новым годом!»
Эски йилларда эди ҳазил «С Новым годом!»
Ҳазил бўлди бу янги йилда «С Новым годом!»
Орзусида ширин сұхбатингизнинг доим,
Кутар эдик Сизни ҳар йилда «С Новым годом!»
Келмадингиз, ўигилиб байрам этардик бирга,
Шавқи сұхбат тўла кўнгилда, «С Новым годом!»
Қутласак янги иилин, балки қабул айлар ўшал -
Бели нозуклиги йўқ қилда, «С Новым годом!»
Бўлди бир анъана йил бошида табрик айлаш,
Бизда бор, лек йўқ «Инжил»да «С Новым годом!»
Қутламоқ бирни бири расм бўлибдири - дейишиб,
Мақсадин сидқ ила, ҳар элда «С Новым годом!»
Кўнгли ёшдек, ўзи кексарса-да, Қосимжон ака,
Тонги концерт ҳали ҳам тилда «С Новым годом!»
Кексалик кайфини сурмоқда Имодиддин акам,
Яшариб зоҳирию дилда, «С новым годом!»

*Қош кериб, ҳаммадан аввал гапириб сүхбатда,
Хуррам этмоқда күчи белдә «С Новым годом!»
Биз даги илгарига биттә қадам қыйдик, то
Бўлмагай бунча қадам филда, «С Новым годом!»
Сизга соалик ила баҳт истагувчи дўстларингиз
Кўнглида мақсади бир хилда, «С Новым годом!»
Гап уланди, кечиринг, ҳазил учун Бокирни,
Ҳазил бўлди янги стилда, «С Новым годом!».*

1965 йил, 6 январь.

Мана бу эса дадамга шоирFaфур Ғуломдан келган ҳазил тарзидаги манзумадир.

(Изоҳ: Дадам бу улкан алломани тоят ҳурмат қилганлари учун ҳовлимизда етишган анор, беҳиларга писта қўшиб посилка жўнатганлар. Аммо улар маълум сабабларга кўра юборилган одамга ўз вақтида етиб бормай, почтахоналарда уч ойдан ортиқроқ вақт давомида туриб қолган ва яроқсиз ҳолга келгандан кейингина, Faфур амакининг қўлларига етиб борган).

«Амонуллохон Валихоновга.

Ҳурматли Амонуллохон!

Беҳад ва бепоён саломдан сўнг биз учун тортган мاشаққатингиз учун ташаккур айтишга ижозат беринг. Биз учун юборган совгаларингизни бугун 23 февралда бориб олдик. Яшик устида адрес аниқ ёзилган бўлса ҳам, квитанцияда «Ташкент, Гулямову» дебгина ёзилган экан. Яшик омборда, квитанция кассирда, кимга аталганлигини билмай қариб уч ой қолиб кетибдур. Вокзалда ишловчи бир қўшнимиз хабар топиб келди, бориб олдик, сўнгра қуидаги мазмунни таҳрир қилдик. Манзума будур:

*Аввало Сизга ва ёронларга кўпдан кўп салом!
Доимо бўлсин дилингиз шоду дастингизда жом.
Дўст кўнглин овламоққа шунчалар ҳурмат билан,
Пешкаш қилган экансиз, дастрас бўлди тамом.
Гарчи биз бу хушхабардан тапла тақ уч ой кейин,
Яъни февраль охирида, бул ажаб топдик паём.*

Чунки Аңжон бирла Тошкентнинг ароси бу сафар
Рол-расо қиши умрига тенгдош бўлиб қилмиш давом.
Сиз бағажга юкни топширгандан қиши кирган эса,
Бизга теккан чогда қиши юк тангибон қилмиш широм.
Билмадим, қандай чатоқлик ўртада юз бергану,
Юк бағажний искалабда тұхтаган, хуллас қалом.
Күн кече бир йұл тасодиған билиб қолдик қаранг,
Кимни ҳам бу ишда айблошга дөёлмай миму лом.
Шүнчалик ҳам содда, бепарво бўлурмикан киши,
Тақсирим, лозим зди иккى оғиз сүз тилгром.
Хөвлиқиб вокзал сари бордик билиб паспорт билан,
Ўртада бир нуроний сандиқ түрар мұхри күлом.
Нафси бадга учраганмишман қариган чогда,
Донасидан бехабарман, ушбу сандиқ бўлди ром.
Ким юборган, қайдану қандай муюм, билмас здим,
Йўқ зди: «Дүстинг фалон иби фалон» дегувчи ном.
Бу иили Тошкент ҳавоси гоҳ нам, гоҳи соғук,
Чаккадан галвир мисоли ҳамма дому ҳамма том.
«Нұх тұғфони» - бағаж омборидан бир кафтча сүб,
Бизнинг яшик ҳам қайиқдек ўртада зул эҳтиром.
Дуб ёпишдилар, жүзжүқлар, юкни давра олдилар,
«Не экан? - деб дилда қолмай сабры тоқат бир гиром.
Бири қайчи, бири болта, бири теша ушлаган,
Бу мұаммони ечишга күргузуб зўр эҳтиром.
Сиз «Алиф лайл» китобида балиқчи эртагин
Хой-наҳой яхши билурсиз, түр солур эрди мұдом.
Бир куни тұрига түшмиш мұхрбандлик бир күза,
«Газна топдим», - деб шүринг күргүр қилиб сабдои хом.
Күза мұхрини күчиргач, бир қаро дуд бурқираб,
Ахраманга айланыб, олдида тутмишдир мақом.
Худди шундай бўлди, тақсир, қолқогин қилгач қиё,
Етти рангли бир тутуң күп-кундузни қилди шом.
Куз куни бօғда ғурури - чун жазо тортиб анор,
Ич қаролик бирла тақдир олмиш эрди интиком.
Сиз қаросонлик касаллардан беҳи ҳолин сұранг,
Малла пўстиндан нишон йўқ түрш чеҳра, талҳ ком.
На вұжудида қадимиий заъфарон ҳаддан асар,
Қолған умрида бу шүрликка қиём бўлмак ҳаром.

*Яхши ҳам бу можарода писта лаб очмай омон.
«Оғзини очган балога мубтало», - дейди авом.
Махз бир күлгү учун назм айладим, афв айлангиз,
Хурматингиз камситишга қалбим эрмас қитта ром.
Дүсты ёрон йүклаганда бош баланд, күкдан ошиб,
Илтифотларга ташаккур айтуючы Faфур Гулом.*

Мендан уй ичи, қавму - қариндошларингизга, биродарларимиз Абдулаҳад, Имодиддин, Солижон, Аҳмад Рафиқ, Хурхўжа эшон, Солижон оқсоқол ва бошқаларга салом айтадурлар, деб, яна бир салом билан Faфур Гулом.

1954 йил, 28 февраль»

Донишмандона тафаккурнинг, дўст сидқига, унинг соғлигига бўлган юксак ишончнинг намунаси ва чуқур самимият, бегараз ҳазил-мутойиба билан йўғрилган бу манзума узоқ вақтлар дадамнинг дўстлари қўлидан тушмай ўқилганлиги, латифа қилиб сўзланганлиги, уларда ўзгача завқ, кўтаринкилик уйғотганлиги, уларнинг бу ажойиб инсонга абадий боғланиб қолишлирига боис бўлган сабаблардан бири эканлиги маълум.

Қиблагоҳимнинг Faфур амаки ҳақидаги хотираларидан:

«Faфур аканинг қазоси етган куни биз улфатлар билан лола сайлига чиққан эдик. Кеч қайтдик. Ҳориб келиб, дам олиб ётиб, ухлаб қолибман. Унинг вафоти ҳақидаги хабар шу вақтда радиодан эълон қилинибди.

Мени чарчаб келган деб, Ойбум ва Тўфаҳон аямлар (дадамнинг катта қайноналари - М.А.) менга бу хабарни ўша пайтда билдиришмапти. Бир оз ором олсин, дейишибди. Эрталаб тургач, бу хабарни эшишиб, машинам билан Имодиддин акам (шоир Улфат) нинг олдиларига етиб бордим. У ҳам қайғуриб, мени ҳой-наҳой етиб келади, деб кутиб ўтирган экан. Биргалашиб институтга ўтдик.

Faфур Гуломни дафн этиш маросимида иштирок этиш учун шаҳар ижроия қўмитасидан олти кишини тайинлаган эканлар: Ҳошимжон Рассоқов, Фанижон Абдуллаев, Имодиддин Қосимов (Улфат), Абдулаҳад Азизов (Анисий), Абдулҳамид Хуррам ва мен.

Жўнаш учун поездга буюртма берилиб, жойлар брон қилинган экан.

Вақт ўтказмай, тезда вокзалга қараб чопдим. Кассага бориб, Тошкентга билетни сўрасам, «Билет йўқ!» -деган жавоб бўлди. Сабабини сўраган эдим:

- У билетларни згалари олиб кетди, - деган жавобни эшитдим.

Мен ҳайрон бўлдим. Диққатим ошди. Бўғилиб машинада кетаётсам, Турсуной Каримова¹ одимдан чиқиб қолдилар.

- Йўл бўлсин? - деб сўрадилар.

Мен ахволни тушунтиридим.

У киши мени ўзлари билан бирга шаҳар ижроия қўмитасига олиб бордилар. Ўша ерда шаҳар ижроия қўмитаси раисига:

- «Дарҳол Тошкентдан самолёт чақиринг ва беш дақиқадан кейин менга натижасини айтинг!» -деб тайнинлаб, чиқиб кетдилар.

Шу заҳоти самолёт учун буюртма берилди ва самолёт айтилган вақтда етиб келиб, 17 киши Тошкентга учдик.

Аэропортдан таксида дафн маросими ўтказилаётган жойга зўр-базўр етиб бордик.

Кейин билсак, бизга аталган билетни Fafur Fуломнинг вафотини эшитган унинг ихлосманди, ўзини «унинг дўстиман», деб танишириб юрадиган Ҳожимат ака деган киши олган ва дафн маросимига етиб борган экан. Бу шундай бўлибди:

Fafur аканинг вафотини эшитган Ҳожимат ака вокзалга бориб, Тошкентга билет сўрабди.

- Йўқ! - деб жавоб қилишган экан, «ўлимга кетяпман десам, бир илож қилиб беришар», деб ўйлаб, кассирга:

- Похорон, похорон, - депти.

Кассир брон қилинган билетнинг бири шу одамга экан, деб ўйлаб, билетнинг бирини унга бериб юборипти. Унинг орқасида навбат кутиб турган яна бир йўловчи ҳам уни кўриб туриб, «похорон» деса билет берар экан», деб, у ҳам «похорон»га кетяпман» деб, иккинчи билетни олибди. Шу тариқа

¹ Турсуной Каримова ўша йиллари Андижон вилояти ижроия қўмитаси раисининг ўринбосари эди.

менга ва Имодиддин акамларга аталган билетлар бошқа одамларга бериб юборилган экан.

Фақат Турсуной опанинг шиқоати туфайли биз Тошкентга дағын маросимига етиб борганимиз».

Дадам бу хотираларни бизга вафотларидан уч күн аввал сўзлаб берган эдилар ва «Турсуной опа ана шундай айрим эркаклар ҳам қила олмайдиган ишларни қиласр эди», - деган эдилар.

Охирида эса, бизга қаратада:

- Катталарнинг гапларини уқиб олиш керак, - дея гапларига якун қилган эдилар.

Бу бизга дадажонимнинг сўнгти васиятлари эди назаримда...

Хөвлингиз ҳувиллаб тутмоқда мотам,

Ғамгинидир Волидам сақлайди сукут.

Сўзлари шаккардан лазизроқ отам,

Ёдингиз дилларда ҳар он, ҳар минут...

Қиблагоҳим ўzlари боғланиб қолган кишиларга улар ҳәётлиги чоғидагина эмас, вафот этгандаридан кейин ҳам садоқат расмини қаттиқ сақлар эдилар.

Бунга у кишининг дафтарларини варақлаб ўлтириб, Аҳмад Рафиқ Қамбаров номлари билан боғлик сатрлару, саҳифаларга назарим тушиб, яна бир бор ишонч ҳосил қилдим:

Аҳмад Рафиқ қабр тошига. Боқирдан:

Күнгил ёдини сақлар, тил мудом Аҳмад Рафиқ номин,
Жойин жаннат, гарикى раҳмат этсун ҳақ ани, омин!

Ўша саҳифаларга терилган инжуларни ўқиб, сиз ҳам бунинг гувоҳи бўласиз, деган умидда ва менинг нечоғлик ҳақ эканлигимни тасдиқлашингиз илинжида уларни сизга ҳавола қилишни лозим билдим:

Бу - қадршунос дўстим сұхбатининг хумори ва унинг ҳажри келтирган аламлар изҳори. (11.2.1983 йил).

Дадам ёзиб қўйган изоҳ: 11.2.1983 йили Андижон шаҳридаги мактабда Алишер Навоий таваллудининг 542 йиллиги ва Заҳириддин Муҳаммад Бобур таваллудининг 500 йиллиги нишонланди.

*Охим фалакка чиқди то кирди ерга ёрим,
Ашким оқизди үртаб ҳажр үти жони зорим.
Хижрон үти эмиш тунд, үрлайди құкка ҳар дам,
Паст айлай олмади ҳеч бу ашки шашқаторим.
Сабрим била қарорим эргашибди соя янглиғ,
Чүн борди ёр - борди сабрим била қарорим.
Кеттас құзим үңгидан сиймоси эртаю - кеч,
Фикрида кечгуси ҳар оқшом била наҳорим.
Ёд айладик буқун биз Бобур, Навоийларни,
Афсус, бұлмади бу базм ичра ул нигорим.
Базм үлса қанча ширин, аччиқ билинди шүнча,
Бу ерда бұлмагач, ул лаълы шакарнисорим.
Ёрни хаёли базми Бокиргадур обүнчөк,
Чүн боргач, үзи қолди базми хаёли ёрим.*

Навоий ва Бобур таваллуди күнлари ва дүст ёди қиблагоҳимга сезиларли таъсир күрсатди шекилли, орадан күп фурсат үтмай, илк баҳор завқидан жүшадилар ва «Маликул қалом» Лутфийга тазмин тариқасида Аҳмад Рафиқ Қамбаровнинг руҳи покларини шод этиш мақсадида, қуйидаги ғазални битадилар:

*Күкарди чаман, гүлузорим қани?
Сиҳи сарб бүйлук нигорим қани?
Кулумсиб, чечаклар юз очмиш бугун,
Юзи гул, табассум шиорим қани?
Баҳор эрди күнгли фараҳ бергали,
Фораҳбахш күнгли баҳорим қани?
Тутуб лола Оҳангарон тоглари,
Кутар, орази лолаворим қани?
Күзүмдин оқар сүв чаман сайдида,
Бу ишда менга ихтиёрим қани?
Қарор ила сабримни олди фироқ,
Қани эмди сабру қарорим, қани?
Ғанимат ҳаёт гул чоги, Бокиро,
Бу гул фасли ул гүлузорим қани?*

6.03.1983 йил.

Ушбу сақиfalарни қайта-қайта күздан кечирар эканман, хаёлимга қуйидаги фикр муҳрланиб қолғанлигини ҳис қиламан:

Күкарди чаман, буэрукворим қани?..

Күзларимдан ёшлар оқади, ўзимни тұхтата олмай армон қиламан. Ҳар йили тақрорланувчи баҳор тонгида мен ҳам дадамга әнг яхши кунларни илинаман. Ноилож қолганда, тақдирға тан бераман. Ўзимча сүзланаман:

...Паррандаю, дарранда, қурт-қумурсқалар ҳам баҳор нафасини сезган ҳолда яшаш учун күймалана-дилар. Аммо орамизда баҳорнинг чин шайдоси бўлган Сизнинг йўқлигингиз қалбларни тирнайди, сўнгсиз армонлар гирдобига ташлайди мени! Қани энди ҳаёт бўлсангизу, яшнаш ва ёшариш фасли бўлмиш наврўзи олам тонгида табаррук қаламингиздан тўкилган дурлардан оқ сақиfalар юзи гул-гул яшнаб кетса!

Гўзалликка ошуфта дилларнинг ёниши, гул ишқида шайдо булбуллар хониши ғазалларингизда тараннум этилса!

Ҳамон ёдимда... Ўша қиши уйда ўтиравериб димиқиб, зерикиб кетганингиз, баҳорни жуда ҳам согинганлигингизни айтиб, «Кўклам келса, кўк сомсалар ер эдик», - деб Наврўзни интиқлик билан кутгандарингиз...

Ўша баҳорни кўриш Сизга насиб этмади!

Кўк сомса билан сийлаш эса бизга!..

Бу сўзларингиз армон бўлиб қолди, эсиз!..

Булар менинг қаламга кўчган армонларим:

Сиз интиқ кутган бу Наврўзи олам -

Тонгида мен Сизни хўп интиқ кутдим.

Кўк сомса ёпарди Сизга деб, - онам,

Тандир ҳам қолипти мунгайиб - етим!

Булбуллар қизил гул ишқида ёниб,

Куйлаган саҳарни Сизга илиндим!

*Жудолик ўтида бағрим ўртаниб,
Дадажон, баҳорни Сизга илиндим!..*

ДҮСТЛАР ДАДАМ ТАҚДИРИДА

Қиблагоҳимнинг дўстлари, уларнинг дадам тақдиридаги ўринлари ҳақида ўйлар, у киши вафотларидан сўнг ўтган йигирма йиллик вақт давомидаги хотираларни сарҳисоб қиласар эканман, Боқирга хос инсоний фазилатлар ана ўша дўстлар таъсирида мукаммаллашганлигига имон келтираман.

Дарҳақиқат, қиблагоҳимга хос илм, шеърият хусусида фикр билдиришдаги шиҷоаткорлик, ўз ҳукмларини «ўтказиш»даги дадиллик устоzlари қаторида бўлган Сайид Эшон ака Шаҳобиддинов ва Имодиддин Улфат таъсири бўлса, у кишидаги андишалик, муоммадаги юмшоқлик, шубҳасиз, Шарқ адабиётининг улкан билимдони, дўстларини «юмшоқ»лиги билан ром этган Анисий домла фазилатлари самараси эди.

Дадамда айрим пайтларда пайдо бўладиган хокисорлик, ўта юмшоқ табиатлилик - беозорликда ўз умрини улфатларининг хизматига бахшида қилган, ўта хокисор, бетакрор ахлоқи ҳамида¹ эгаси Абдулҳамид Хуррам фазилатлари ўз муҳрини қолдирган.

Назаримда, қиблагоҳимда ўзгаларга малҳам бўлиш, хонадонидагиларга катта эътибор билан қарашга одатланиш, ўта камтарлик ва жамиятдаги кишилар даврасидаги ўз мавқенини, ўз ўрнини англай билиш хислати дадамнинг доимий маслаҳатгўйи, умрининг сўнгги дақиқаларигача хонадонимизнинг энг азиз кишиси бўлиб келган Солеҳжон қори Восиджонов ибратларидандир.

Бу - қадршунос акахоним Сайид Солеҳжон Махдум муқаллаби Иқболнинг вафоти муносабати ила ёзилмиш марсия ва таърих:

¹ ахлоқи ҳамида - яхши ахлоқ

Бир улугким, менга ҳурматли эди, берди ҳабар:
«Бўлмиш ул Озода бул кун доҳили¹ ҳулди² барин»
Солди кўнглим мулкига үшбу ҳабар бир инқилоб,
Ким умид очган чечакларни йўмирди ул барин.
Исми Солеҳжон ўзи солеҳ, эди ул покбоз,³
Пешвоси ўз замонин аҳли солеҳ, элларин.
Фазли бобида агарчи айтгали қўймас эди,
Ҳулқи тўйсмасди назокат пардасидин манзарин.⁴
Ҳулқи ҳуш-ла эл аро гоятда ҳурматли эди,
Табыи мавзуни⁵ -ла, лекин бениҳоят камтарин.
Бир касалликким илашди, қасди жон нақди экан,
Зоҳиридин билмади эл дард мұхлиқ⁶ музмарин.
Кўп ҳазоқат аҳли дардин дафъ этолмай бўлди лол,
Нафъи бўлмай ҳеч дору бирла игна ништарин.
Игнадин қилсанг тикон бөг томига, - дер шоири, -
«Ори тўйсмас йўлларин боди ҳазоннинг сарсарин».
Кукка чирмашди бу мотамда фигону, нолалар,
Ун чекиб, қавму-қариндош, ёру-дўст, кимким қарин.⁵
Сўрса Боқир бўйла «бемантиқ» үлум тарихини,
Бу сифат бўлмиш жавоби нуктадонлар сарварин:
«Коми⁶ дунё»дин бўлуб озод ул озодаваш,
Фавти тарихини қилди: «Доҳили ҳулди барин!».

Август, 1986 йил.

¹ доҳил (а) – кирган, кирүвчи

² ҳулди барин (а) - жаннат

³ покбоз (ф-)1) истораси иссиқ, ёқимли; 2) садоқатли ошиқ, чин ошиқ

⁴ манзарин (а) – 1) кўриниши, сурат, шакл; 2) қараладиган жой

⁵ мавзун (а.) - 1) ўлчанадиган, коматга яраша бичилган; 2) тузилиши келишган, чиройли

⁶ мұхлиқ (а.) - ҳалок қилүвчи, ўлдириүвчи, йўқ қилүвчи

⁵ қарин (а.) - яқин, қалин дўст

⁶ ком (ф.) - тилак, истак

Кечагидек эсимда. 1970 йил май ойи бошлари...

Одатдагидек, Май байрамини дўстлари даврасида ўтказиб, Тошкентга қайтиб келган Абдулаҳад амаки Азизов - Анисий домланинг вафот этгандари ҳақидаги кутилмаган мусибатли хабар у кишини хурсандлик билан кузатиб қолган барча дўстларини қаттиқ қайғуга солади.

Бу совуқ хабар келиши билан дўстлари у кишининг жасадларини, кун иссиқ бўлишига қарамай, машинада Андижонга олиб келадилар ва катта жамоа иштирокида «Бобо Саъдиддин» қабристонига дағн этадилар.

У кишига бағишлиб Ҳабибий, Маҳжурий, Улфат, Ҳуррам ва бошқа дўстлар қаторида дадам ҳам марсия - таърих ёзадилар ва ўзларининг у кишига қанчалик боғланиб қолганликларини «жонсиз шоҳид» орқали изҳор қиладилар:

«Бу - алломайи замон, менга дўсти қадрдан Абдулаҳад ака Анисийнинг Вактсиз вафоти муносабати билан ёзилган марсия ва таъриҳ:

*Воҳким, чарҳ урди нишу қўксим афгор айлади,
«Ўтди, - деб, - Мулло Анисий!» - яъни ахбор айлади.
Бу аламким, шиддатидан тинди қўз, айланди бош,
Дарди сар пайдо қилиб, қўзумни хунбор айлади.
Эй муганний, «Гиря» у «Нолиш» нағосин рост қил,
Ким фигон чекмакни лозим чархи гаддор¹ айлади.
Бемурувват чарҳ гулёр ошиқи ул ёрдин.
Айриди то бизни, бизни тарк гулёр айлади.
Эрди базморо, Анисий исмидек ёру анис,²
Ёру дўстин базмининг таркини ул ёр айлади.
То ажал соқийси йўқлиқ жомони сунди анга,
Ул адамнинг³ бодасин ошом⁴ начор айлади.*

¹ гаддор (а) - 1) алдамчи, хиёнатчи; 2) бераҳм золим

² анис (а.) - 1) улфат, дўст, ошно, ҳамдам; 2) ёқимли;

³ адам (а.) - 1) йўқ, йўқлик; 2) нобуд, ўлим;

⁴ ошом (а.) - 1) ейиш, ичиш; 2) сўзга қўшилганда: ичувчи маъносида

Қилмагон эрди ямон иш, умрида бир бор ҳам,
Айлади күп-күп ямон иш, гарчи бир бор айлади.
Келса ул, байрамлар ўтгай эрди пуржүшү¹ хуруш²,
Келмади байрамда ҳам, муштоқи дийдор айлади.
Шоңру олим эди, фазлу ҳұнарда мислсиз,
Бор эди то үзни илму фазлда бор айлади.
Чун Навоий гулшанидин бүлди гул термақ иши,
Хонайи дилни мұаттар тоза гулзор айлади.
Токи жазм этти қасоид³ боги саирин азмиға,
Бу чаманга бөгбонлиғ расмин изәдор айлади.
Бадрким, фардү⁴ өөхид⁵ әрмиш қасоид бобида,
Они шархидә яди байзо⁶ намудор⁷ айлади.
Бадрнинг сиррин тасарруф қилди ул, тафсир ҳам,
Ким қасоид илми ичра кашфи⁸ асрор⁹ айлади.
Шеър сиррин өқиғидин изласам таърихини,
Үқдиріб Бокирга үшбу сүзни тақрор айлади.
Шеър сиррин кашф қылғон эрди, марғи¹⁰ ногағон,
Соли фавтин «Кошиф-ул - асрори ашъор»¹¹ айлади.

1970 йил, май-июнь

Дадам умрларининг охирларига қадар Анисий домла номларини тилларидан туширмадилар.

У кишининг камтарлиги, ҳар қандай шароитда үзларини хушнуд, сипо тута билишлари замирида қанча-қанча улуғворлик, үзгаларни әхтиёт қилиш андишаси ётғанлиги

¹ пуржүш (ф.) - 1) зақылы, шод; 2) җаяжонли

² хуруш (ф) - қычқириш, ҳайқириш.

³ қасоид (а.) - қасидалар

⁴ фард (а.) - якка, ёлаиз

⁵ өөхид (а.) - битта, якка, ягона

⁶ яди байзо (а.) - 1) оппоқ құл; 2) зүр, күч, қудрат

⁷ намудор (ф.) - күрнишили, күрнишиб турған;

⁸ кашф (а.) - очиш, топиш

⁹ асрор (ф.) - сирлар, яширин нарсалар

¹⁰ марғ (ф) – үлім, ажал

¹¹ ашъор (а) - шеърлар

қиблагоҳимни у кишига боғловчи ришта бўлганлигига, кўп пайтларда унинг ўша фазилатларидан ибрат олганлигига ишонч ҳосил қиласман.

Дадамнинг барча дўстлари табиатан ҳазилмутойибани нозик тушуна оладиган, аскияга мойил, закий кишилар эди. Шунинг учун ҳам ҳар қандай ўтиришлар, учрашувлар, ҳатто телефондаги сұхбатлар ҳам аскиясиз ўтмас эди.

Албатта, бу соҳада устоз Ҳабибийга бас келадигани кам эди.

Бинобарин, дадамнинг ҳазилларидағи мукаммаллик Ҳабибий домла таъсири эди. Буни дадамнинг у кишининг вафотлари муносабати билан битилган қуйидаги марсия - таърихидан ҳам англаб олиш мумкин:

Ўзбекистон ҳалқ шоири, устод Мұхаммад Зокир ака Ҳабибийнинг Вафотлари муносабати билан ёзилган таърих:

*Менга ҳабар үлдиким, жаҳонни
Тарк айлади шоири сұханвар.
Афсуски, бормиши үл сұхандон,
Сўз қадрини англагувчи заргар.
Кўп нозук эди шуурү, фикри,
Шоирлар аро үл эрди сарвар.
Озода, гўзал ватанни қўйлаб,
Ҳурматга бўлиб эди сазовор.
Эл мадҳида тебратиб қаламни,
«Ҳалқ шоири» номи ҳам мұяссар.
Шеърда тахаллуси Ҳабибий,
Дўстликда садоқати мұқаррар.
Гарчанд эди кўп үлуг сифоти,
Эл ичра тутарди ўзни камтар.
Мойил эди таъби кўп ҳазилга,
Сұхбат чоги дўстлар ила лобар.
Покиза кўнгүл билан қиласми,
Маҳфилни¹ сафоли ҳам мунавввар.
Кўпларга қиласми меҳрибонлиг,*

¹ маҳфил (а.) - мажлис, базм

*Гамхор эди барчага баробар.
Тұқсонаңға ёши етүшгач, үмри -
Бағриға вафонинг үрди ҳанжар.
Боқир деди: «Эй вафоси йүқ үмр,
Ақлым бу алам иилин сўроқлар!»
Эълон этиб, үмри бебафо дер -
Тарихини: «Шоири сұханвар!»*

28.04.1980 йил.

Дадам у кишининг вафотлари муносабати билан ўтказилган барча маросимларда ўzlари иштирок этибина қолмай, ёр-дўстларини уюштиришда ҳам бошқош бўлдилар. Уларнинг хонадонларидан умрларининг охирларига қадар, масофанинг узоқлиги, соғлиқларининг ҳолати ва ишларининг кўплигига қарамай тез-тез хабар олиб туришни тарк қилмадилар.

Ҳабибий домла вафотларидан сўнг тўрт ойлар чамаси ўтгач, 1980 йилнинг 16 августидә Андижон адабий гурунги устунларидан, дўстлари даврасида «Тирик тарих» номи билан машҳур бўлган шоир Хуррам - Абдулҳамид Абдураззоқовнинг ҳам бу дунёни тарк этишлари дадам учун, дўстлари учун катта йўқотиш бўлди.

У кишининг ўта хокисорликлари, боз устига ҳаётда тоқ ўтганниклари, бошқа дўстлари қатори дадамларга ҳам қаттиқ боғланиб қолганниклари қиблагоҳимга қаттиқ таъсир қилди ва ўзларининг изтиробларини акс эттирувчи қўйидаги марсия - таърихни битдилар:

Қадршунос акахоним, ғоят хокисор инсон Абдулҳамид ака Хуррам вафотига таърих:

*Менга етди мусибатдин хабарким,
Жаҳонни тарк этиб бормиш у Хуррам.
Жаҳондин кўз юмиб, афсус-афсус,
Қўйибдур охират сорига мақдам.¹
Эди бир кўнгли тоза, яхши инсон,
Тарикى одамият ичра маҳкам.*

¹ мақдам (а.) - қадам қўйиши;

Кишиларни улуглашда тенги йүк,
Үзи күп хоксору камтар одам.
Эди Абдулжамид исми-ю шахси
Анга монанд: мақтобли бир олам.
Чаманзори ҳаёт ичра мужкаррад¹ -
Кезиб саксон ишил этди тарк бу дам.
Түзүб күп богу бүстөн үз элига,
Күйиб кетди неча гулзор күркәм.
Күп эрди фазли, шоирлик шүүри,
Тахаллус шеъри ичра дөги Хуррам.
Отарди ёру дүсти «Жонли тарих»,
Билурди чунки күп гап, илдизин ҳам.
Эди гарчи лақаб, «үмри абад»дек,
Вале «үмри абад» ҳам топти баржам.
Мүқаррападир жаңон таркини қылмок,
Сикандардур агарчи, Сом ё Жам².
Ёзишга фавти тарихини Бокир,
Қалам олиб қўлига, тутди мотам.
Солиб қайгуга ёру дүстин ўтгач,
Демиш тарихини: «Бормиши у Хуррам».

16.08.1980 иил.

Қиблагоҳимнинг дўстлари, уларнинг бир-бирларига муносабатлари, феъл-атворларию хулқ-саъжиялари хақида ёзилган таърих - марсиялар, хотиротлар ва бошқа мавжуд манбалар асосида фикр юритар эканман, дадамнинг дўст танлашдаги, уларга эъзоз-эътибор кўрсатишлиридаги, дўстлик тамойилларирига риоя қилишларидаги ўзига хосликлари, одамийлик, инсонийликни қандай тушунишлари Ҳабибий домланинг «Оқибу девона» газалига боғланган мухаммасларида тўла үз ифодасини топганлигига ишонч ҳосил қилдим.

Шу сабабли ушбу тахмисни қиблагоҳим мухлисларига илиниб, уни тўла келтиришни лозим билдим.

¹ мужкаррад (а.) - танҳо, ёлғиз.

² Жам – Эроннинг қадимги афсонавий подшоҳларидан бири, яъни Жамшид

Шояд ушбу муҳаммас сабаб қиблагоҳим хотиралари ворислар даврасида яна бир бор тилга олинса, у кишининг ҳақларига калимот ўқилса ва уларнинг савоблари у муборак зот руҳи покларига етиб бориб, тангри таоло раҳматларига сазовор бўлса.

Бу - Муҳаммад Зокир аканинг Ҳофизона газали лаззатидан баҳраланмак ҳосили,

Ва бу газални «қўпайтириш»га бўлган шавқ түфайли қўйилган қадам маҳсули.

ОҚИЛУ ДЕВОНА

*Кунгул олмоқда үлфат-үлфату, бегона-бегона,
Сабак бермоқда мактаб-мактабу, майхона-майхона,
Наво тузмоқда бойкуш-бойкушу, бедона-бедона,
Лаб очса сўзга оқил-оқилу, девона-девона,
Нечук иш бўлса, танбал-танбалу, мардона-мардона.*

*Ишонма батъи савлатни куриб, охир чиқар ишқал,
Жилода фарқи бўлмас, бўлса мис гарди билан зарҳал,
Мато танлар эсанг, ақлинг кўзини яхши оч ҳар гал,
Кунгулни берма суратга боқиб, сийратга боқ аввал,
Билимдоңларга мунчоқ-мунчогу, дурдана-дурдана.*

*Гузаллик, яхшиликни касб қил, түгённи касб этма,
Кунгул ойинасин покиза тут, нуқсонни касб этма,
Бўлакни англа тўғри, тўғри юр, бўйтонни касб этма,
Азизим, росту, бир сўзли бўл, ёлғонни касб этма,
Киши тақдир этарда чин-чину, афсона-афсона.*

*Ҳаё бирлан адаб - ёшлик чиройин ортдирур, зиндор,
Ёқимлик айлар элга кимсанни хуш хўлк ила отвор,
Тутар хотирда бу зарбул масални, бўлса ким ҳўшёр,
Яшар ўз эркида ёшу-қари, аммо адаб даркор,
Қадам қўйганда лобар-лобару, мастона-мастона.*

Ёруттас дил үйин ишк, үзни күйдирған билан ҳар ким,
Харорат олmas, ул ўт сори юз үрган билан ҳар ким,
Етишмас бул ҳаваслик йўлида юрган билан ҳар ким,
Чин ошиқ бўлмагай, ишк узра лоф үрган билан ҳар ким,
Чарог олдида қўнгиз-қўнгизу, парвона-парвона.

Чин инсонлар учун эл қайгусидан ҳали бир дам йўк,
Бирор гафлатда, лекин, бошида бу ҳакда ўй ҳам йўк,
Эшишт, Бокир, бу сўзни ҳаклигига ҳеч шубҳам йўк,
Бирор ҳалқ узра қайгурса, бирорда заррача гам йўк,
Ҳабибий, ўйла, гофил-гофилу, фарзона-фарзона.

МАКТУБЛАРДА ЖИЛОЛАНГАН ТАРИХ

Ҳижрон аро ёд этиб, мени шод айла,
Маҳжур¹ кўнгулни гамдан озод айла,
Бу ҳотни анинг учун битдим мунда,
Кўрган сайин ҳатимни, мени ёд айло.
(Бобур).

Забардаст шоиrimiz Бобурнинг юқоридаги рубойисини мутолаа қилас эканман, унда катта ҳикмат, ибрат кўргандек бўлдим.

Назаримда бу улкан донишманд даъвати қиблагоҳим тилидан қилинган ва мен амал қилишим лозим бўлган бир васият, мени мақсад сари йўлловчи ёруғлик, ҳақиқатга элтувчи бир машъал эди.

Қиблагоҳим мерослари ичida турли мактублар ҳам анчагина. Уларда мактуб эгаларига боғлиқ тақдирлар,

¹ маҳжур (а.) - айрилган, ҳижронда қолган

тариҳлар, уларнинг инсоний қиёфалари, ҳар бирининг ўзига хос фазилатлари, дадамга бўлган муносабатлари ёрқин намоён бўлган.

Андижон адабий муҳити вакиллари билан Тошкент, Самарқанд, Қўқон ва бошқа маданий марказлардаги ижодкорлар, илм аҳли ўртасида мактублар воситасида илмий-адабий алоқалар бетўхтов давом этган.

Мактублар хоҳ табрикнома бўлсин, хоҳ ўз ижодлари намуналарига дўстларининг фикрларини билиш истагида юборилган бўлсин, барчasi юксак бадиий савияда ёзилганилиги билан ажралиб туради.

Шунинг учун унинг айримларини ўқувчилар ҳукмига ҳавола қилишни, уларда акс этган тариҳни агадий-лаштиришни лозим топдик. Мактубларда тилга олинган, тариҳимиизга даҳлдор улуғ кишиларнинг кўплари бугунги кунда «абадий уйқу»га кетган кишилардир. Уларни эслаб ўтиш, табаррук мактубларини ворисларига етказиш, уларни ибрат қилиб кўрсатиш ҳар жиҳатдан хайрли бўлиши шубҳасиз.

Қиблагоҳимнинг ўзлари Ўзбекистон ҳалқ шоири Ҳабибийдан келган мактубларни «Олтин қалам» рукни билан «Дўстларга мактублар» деб номлаб, «Ўзбекистон адабиёти ва санъати» ҳафтаномасида ёрита бошлаган здилар (1986 й. 19. XII).

Боқир изоҳи: Мұхтарам ғазалнавис (шоир Ҳабибий назарда тутилмоқда - M. B) ўзининг отахонлигига муносабиравишда ҳамма соҳадан хабардор бўлиб турардилар. Баъзан айрим масалаларни ҳал этишга ўз ҳиссасини қўшиш у кишига одат эди ва дўстларни ҳам бу жиҳатдан «қўзғаб» турарди.

Масалан, 1961 йили қўқонлик фозил отахонлардан Пўлоджон домла Қаюмов зиёратига борганимизда, у киши водий адиларини агадийлаштириш мақсадида бир мажмуя тузатганлигини айтиб, бу ишда баъзи маълумотларни топишга ёрдам беришимизни илтимос қилди.

У киши бу ҳақда Муҳаммад Зокир акага ҳам хат ёзган экан.

Ҳабибий мактуби:

«Ассалому алайкум, азиз дўстларим Имодиддин ва Амонуллохон!

Мен бола-чақаларим билан тинчман, соғман. Сизларнинг ҳам ўз вазифаларингизда муваффақиятли давом этиб, бола-чақа ва ёру дўстлар билан эркин яшамоқларингизни дўстона тиламоқдаман.

Имодиддин, Сизлар Қўқонга келиб, адабиётшунос, ширинсуҳбат, камтарин табиат, аҳли табъларга мухлис, пиру - бадавлат олижаноб домла Пўлоджон ҳазратларининг зиёратларига мушарраф бўлганликларингизни маълум қилиб ёзган руқъайи шодиёнангизни олдим.

Шу кунларда ёзувчилар билан Самарқанд сафарига бориб эдик. У ердан келсан, Пўлоджон ҳазратларидан хат келган экан. Унда Абдулғафур Муҳиб, Абдураззоқ Бимий, Қори Юсуф Мунтазирларнинг ғазаллари, оталарининг номлари, ёшлари ва қаерда вафот этганилклари ҳақида маълумотга эга эмасликларини ёзган экан.

16-числода у кишидан яна хат келди.

Сизларнинг зиёратларингиздан ҳаддан ортиқ хурсандликларини санъаткорона безаклар билан тавсифлабдилар. Юқоридаги шоирлар ҳақида чуқурроқ маълумот бериш Амонуллохонга юклатилган. Сизларнинг ташрифларингиз ҳақидаги маълумотни Азизхонга¹ ҳам ёзилганлиги айтилган. Яна октябрнинг яримларида Тошкентга келмоқчи бўлганликларини ҳам айтганлар...

Зокиржон (Ҳабибий) 17.09.1961 й.

Пўлоджон Қаюмов мактубидан:

«...ёш талантли шоиримиз А. Ж. Валихоновга!

...Лутфан этган илтифотингиз учун ташаккур ва раҳмат!

Қисқагина биографиянгиздан хабардор бўлдим.

7-дафтаримизнинг 18-саҳифасида Ҳабибийнинг ғазалига этган мухаммасингиз мундариждур.

¹ Азизхон – Пўлоджон домланинг ўали, академик Азиз Қаюмов

Қисман Ҳабибий домланинг берган маълумотларича, Андижонда эмас, «Асака» қасабасида 1925 йилда туғилган, деб кўрсатилган эди. Эътиборга қайси тўғридир?

Онангизнинг оталари бўлмиш, Бедилхон фозиллардан бўлмиш зотни Фаргона водийси фозилларидан сабаб, ҳаёт-мамотларидан хабардор этсангиз эди, номлари дафтаримизда ёзиб қолдирилар эди».

П. Қаюмов. 22.XI. 1961 й.

Пўлоджон домла Қаюмовнинг иккинчи мактубларидан:
«Муҳтарам укамиз А. Валихонов Боқирга!

...Бедилхон тоғангиз тўғрисида, у мавлоно Жалолиддин Румийнинг маснавийларидан мутолаа этувчи бўлган. Маълум бўлишича, андижонлик Шаҳобиддинхон Махдум бедилхонликда машхур бўлиб, фозиллардан дур. Сизга тога эканлар. 1931 йил вафотлариданур.

Онангизнинг оталари бўлмиш Мелихўжа мироббоши вафотлари 1909 й. Қўргонтепада дафн этилган.

Кекса шоирлар сингари шеър сўзлаганингиздан менинг ҳануз ҳайронлигим бордур.

Фазлий Наманғоний айтганидек:

*Бундайки нуктадон сен, ким эрур устодинг?
Ой қасби нур қилмас, то офтоб кўрмай.*

П. Қаюмов. 22.XII. 1961 й.

Профессор Ғанижон Абдуллаевга Самарқанддан, ака-демик Воҳид Абдуллодан келган мактубдан:

«...ушбу байтларни мадрасаи мунахажима устига тўқдим. Албатта, Улфат домла ва Амонулло ҳазрати олийлари ўз назари кимиё осорларини юргутириб, сайқал берурлар!».

Ғазали Воҳид Абдулло:

*Офтоби оразинг, олампаноҳ, савлат билан,
Дил мулкин забт этди тенги йўқ давлат билан.
Давлати ҳуснингдин ортиқ ганж борми, дилрабо,
Келмагай давлат кишига гам, алам, ҳасрат билан.
Менда не гам, не алам, не ташвиши фардолигим,*

*Сен эзурсан давлатим, меҳринг тўла шафқат билан.
Шафқатинг жонимга жон, қонимга қон, онимга он,
Она юртим оламидир сендаги иффат билан.
Иффатинг кони жавоҳир кўзларимнинг гавҳари,
Гавҳар одамда бўлур ҳикмат билан, ҳиммат билан.
Ҳиммату, ҳикматларингга, Воҳидо, жонлар фидо,
Одаму, олам ривожи дўсту - ёр, улфат билан.*

Воҳид Абдулло. 15.XII. 1977 й.

Академик олимнинг ўз ғазалини Улфат ва Боқир назаридан ўтказилишини илтимос қилиши, менинг назаримда, аввало, домла Воҳид аканинг ўта камтарлиги бўлса, иккинчидан, юқоридаги шоирларнинг истеъодига бўлган катта ишонч белгисидир.

Воҳид Абдулло ғазалининг Улфат ва Боқирлар назаридан ўтганидан кейинги ва дадам дастхати билан битилган кўриниши:

*Офтоби оразинг, оламоро, савлат билан,
Мулки дилни забт этибдур офтоб талъат билан.*

*Талъоти хуснингдан ортиқ ганж борми, дилрабо?
Келмагай давлат кишига гам, алам, ҳасрат билан.*

*Менда не гам, не алам, не ташвиши фардолигим,
Сен эзурсан давлатим, меҳринг тўла шафқат билан.*

*Шафқатинг жонимга-жон, қонимга-қон, онимга-он,
Она юртим завқлангай сендаги иффат билан.*

*Иффатинг кони малоҳат, кўзларимнинг гавҳари,
Гавҳар одамда бўлур ҳикмат билан, ҳиммат билан.*

*Ҳиммату ҳикматларингга, Воҳид этгай жон фидо,
Одаму олам ривожи дўст билан, улфат билан.*

Ушбу ғазалнинг машҳур ҳофиз Фаттоҳон Мамадалиев томонидан куйга солиниши ва юксак маҳорат билан куйланиб, шуҳрат топиши ҳам беҳикмат эмас.

Дадамнинг адабиётшунос олим Тўхтасин Жалоловга ёзган мактубидан:

«Агар чанд йўллар йироқдур ва лекин
кўнгил тортадур йўл танобиму оё?

Нечукким, хаёлим учар ул сорига:

Жалоловга гаҳо, Ваҳидовга гаҳо!

Ассалому алайкум, Тўхтасин ака!

Ҳаётингиз йилномаси қўлимга тегди.

Ундаги мактуб мазмунни сабабидан бошим кўкка етди, йўқ, йўқ, балки бу ишонч туфайли кўқдан ҳам шундай юқорига ўрладики, Зоҳир Фарёбийнинг бир байтини озгина ўзgartирилса, бунга мувофиқ бўлади:

Юксалди бошим ончаки, ул ердан отса тош,
Минг йилча вақт ўтса, Зўҳал томига тушар.

Фурсатдан фойдаланиб Сизни, оила аъзоларингизни, шунингдек, Эркинжон, Абдуллажон ва бошқаларни Баҳор байрами билан қизгин табриклайман.

Салом ва камоли эҳтиром билан Амонулло.

18. IV.1970 й.

Изоҳ: Тўхтасин Жалолов ўзининг ҳаёт йўлини акс эттирувчи «Ҳаётим йилномаси» деб аталган бир мажмуъани тузган эди. Уни ҳаётининг сўнгги йилларида дадамга келтириб топширган ва ўқувчиларга етказиш ишончини у кишидан кутган эди. Яна, унда бир мактуб ҳам бўлиб, унда: «...Ҳаётим йилномаси»ни Сизга, Сизни эса худога топширдим», - деган сўзлар бор эди. Аммо, афсуски, муаллиф орзуси амалга ошиб улгурмай, оғир дардга чалинган дадамнинг ўзларини Аллоҳнинг даргоҳига топширдик.

«Ҳаётим йилномаси» дадам вафотларидан кейин Тўхтасин Жалоловнинг қизи томонидан Тошкентга олиб кетилган.

Қиблагоҳимга юборилган мактублар ичида, шубҳасиз, Собир Абдулланинг қаламига мансублари салмоқ

жиҳатидангина эмас, мазмунига кўра ҳам алоҳида эътиборга сазовор. Чунки унинг мактублари ўзи ёзган бирор ширин байт ёки газал, кўп ҳолларда ҳайратангиз муҳаммаслар билан зийнатланарди.

Собир Абдулла мактубларидан:

«Муҳтарам укахонимиз Амонуллохон!
Вaalайкум ассалом!

Тансиқ мактубингизни бугун олибоқ, мазмунидан беҳад қувонч ҳосил қилиб, шу куниёқ жавоб мактуби ёзишга муваффақ бўлдим.

Навоий кечаси ҳақидаги газетанинг муҳтасар хабарини ўқидим. Ўша кечанинг иштирокчиси бўла олмаганимдан афсусланган эдим. Бу ҳақидаги хушхабарингиз, айниқса, Сизнинг ташаббусингиз билан дунёга келган монтаж ва унинг саҳнада намойиш этилиши, биз учун хурсандчиликдир...

Сизга бир ғазал ўқиб берай:

Букиб қаддинг сенинг, кўчди жаҳондан уч суюнч тоглар,
Тўкиб ашкинг сенинг ул уч биродар, дўсту ўртоглар.

Фироқ, ҳижрон, жудолик шиддати жонингни қийнардин,
Юзинг колдинг, ба лекин шунчалар қийналди тирноглар.

Дема, титратма тушди жон ила жиссимиға! Бу оздири,
Шу мотам вожсидин Тошкентимизга тушди титроглар.

Жудолик доди кетмас, - дедилар, албатта, бу ростдири,
Юракка нақш этилди уч қават мотамсаро додлар.

Хазон етмай ҳали, тарқ этди гулбогларни уч боғбон,
Чаман қон йиғлади, саргарди гамдин барча я проглар.

Чекиб ҳар андалиб юз нала, санъат тутди зўр мотам,
Навоий гумбази жунбушга кирди айрилиқ чоғлар.

*Бири улкан миришкор, жонкуяр, ҳалқ ўғли - мард Усмон¹,
Бири ул Тұхтасин² ким, күйига ҳалқ эрди мүштоглар.*

*Бири ҳалқ шоири, номи Гафур, шеър базми мүмтози,
Халойиқ қалбидә доим яшар, албатта, бундоглар.*

*Үзи кетди, ба лекин бу улуғ үч паҳлавон устаз,
Аларнинг ишларини ҳалқимиз, албатта, ардоглар.*

*Кўзинг сурт яхшилар қабрига, равшанилик етор шояд,
Не тонг, Собир, алардин тўтиё касб этса тупроглар.*

Камоли самимият билан Собир Абдулла
5.12.1966 й.

Бу улкан шоирнинг 1962 йилда Имодиддин амаки ва дадамларга ёзган мактублари ҳам ўзига хос бир тарих:

«Дўстим Имодиддин - Улфат ва Амонуллохон!

Улуг айём билан табриклайман.

Шу билан бирга Сизлар орқали, менсиз ўтадиган байрам сұхбатида иштирок этувчи барча аҳбобларни бир-бир табриклайман.

*Дўстлар олмас малол, бир ҳат билан қутлугласам,
Барчангизни шу улуғ айёмда дилдан иўқласам.*

Амонуллохон! Бугун эрталаб почтадан яна Сиз жүннатган конвертни очиб, «девон» парчасига назарим тушгач, фараҳлигим ошди, ташаккур! Жуда ҳам мана шундай закийликларингиз бизни доим қойил қолдиради...

Менинг юрагимни куйдириб, мулла Абдулаҳад акам Андижонга кетдилар. У кишидан бир ҳалтада салом юбордим, албатта, етиб боргандир. Шундай бўлса ҳам яна мазкур мактубни ёзишни эп кўрдим...

Байрам сұхбатига топган гул, топмаган бир бош пиёз нақлига кўра, янги ғазаллардан бирини юбордим. Умид қиласманки, боргандада Фаттоҳонлар айтишиб беришади.

¹ Усмон Юсупов.

² композитор Тұхтасин Жалилов

*Тамшаниб, ширин лабинг қилдим ҳаёл,
Айлади ширин ҳаёл комимни¹ бол.*

*Кўзларинг бир лаҳза тутқич бермагай,
Шўху бебошликда менга эй гизол².*

*Термулишдан кўзларим нури кетиб,
Бўлмиш икки мардумим³ ҳуснингга ҳол.*

*Васлсиз кун - гарчи кун носоз эмиш,
Ҳажрсиз тун - гарчи тун созу ҳалол.*

*Қолмади ҳижрон учун мұхтожлик,
Васлни этгач ишорат ул ҳилол.*

*Ёзди үтмиш шоури ҳижронни кўл,
Қолдириб менга узун шарҳи висол.*

*То балогат топди қасбим Васл ила,
Умрлар мадҳинг билан топдим камол.*

*Ишқ изҳоримга қаҳринг келмасин,
Бир табассум қилгилу, кўнглимни ол.*

*Ёзгали, Собир, агар олса қалам,
Жилмаяр қаршисида минг ой жамол.*

*Жиддий нарсалар орасида гоҳ-гоҳ шундай нарсалар
ҳам ёзилиб қолади. Хатосини айбга буюрмайсизлар.*

Хурмат ва самимият билан:

Собир Абдулла.
27.4.1962 й.

*Назаримда Собир амакининг мактублари қиблаго-
ҳимнинг руҳий-бадиий оламини белгилашдагина эмас,
мактуб муаллифининг маънавий оламини тасаввур*

¹ комимни (ф) – оазимни

² гизол - оҳу

³ мардум (ф.) - қорачига (кўз қорачиги)

қилишда ҳам келажак авлодга күп нарсалар бериши мумкин. Устоз шоирнинг яна бир мактуби:

«Қимматли Амонуллохон!

Ассалому алайкум!

9-да¹ ёзган мактуби хуш марғубингиз ва унга илова этилмиш муҳаммасингизни бугун олиб, қайта-қайта, иштаха билан ўқидим, ортиқ қувондим. Муҳаббатингиз учун раҳмат!

...Ҳар ҳолда «қимирлаган қир ошар», - дегандек қалам тебратиб, кундалик план бажарилаётиди.

«О» ҳарфи билан ёзилган ғазални шу мактубга илова қилгим келди:

Орази² гулранг, шароби лолагун³, эй соқиё,

Ошкоро тут қадаҳ, ҳам ёшурин боққил қиё,

Тўй дединг, тўй кечасида неча бор тутдинг қадаҳ,

Сипкориб ёшлиар қатори, базм тарқалгунча то.

Навқиронлик баҳш этиб қизлар, йигитлар давраси,

Ўксиган, чўккан кўнгилни қайтадан қилди бино.

Тўй қизил, майлар хина рангу, қадаҳлар қирмизи,

Яллаю рақслар самимиёна, чин кайфу сафо.

Соқиё, тутган қўлинг қайтаргали чорам қани,

Сен деганда: «Кексаликка бу шароб бўлгай даво!»

Тўй дединг, тўйгунча боқдим тўйга, аммо тўймадим,

Мунча ҳам ёшлик гўзалдирким, мен унга мубтало.

Оҳким, қайтмас яна ёшлик, уни сўзлаш билан,

Соқиий гулчехра илгидин⁴ ичиб шому-сабо.

Қўлда жом, Собир, йигитлик чоғларимни эсласам,

«Ёр аксин майда кўр», деб жомдин чиқди садо».

Шу кеча-кундузда улфатим тонг отар қоғоз-қалам бўлиб, ҳар кеча бир неча банд ёки бир неча ғазаллар ижод қилиш билан кўчага камроқ чиқиб, уриниб ётибман.

¹ 9.10.1964 й.

² ораз(а) – юз, бет, чехра

³ лолагун (ф) – қизил, лола ранг

⁴ илги – қўли

Роман ҳали босмахонада. («Муқимий» романи назарда тутилмоқда. - *M. B.*).

Биздан кейин ёзган ўртоқларимнинг асарлари «замонавий» бўлганлиги учун олдинроқ нашр этилиб, бизники «шул эрур айбим Муқимий» бўлиб, сурилиб келмоқда.

Бечора Муқимий... Ҳаёти ўзи шундай оғир қийинчиликларда кечган эди. Унинг ҳақидаги роман ҳам ўшаларни бошидан кечирмоқда.

Сўзни муҳтасар қила қолай!

Каминадан Имодиддин Қосимовга, Ганижонга ва Андикондаги кўнгли яқин қадрдонларимнинг ҳаммаларига бир-бир менинг соғинчли саломимни етказгайсиз.

Камоли ҳурмат билан **Собир Абдулла**.

12.10.1964 й.

Қиблагоҳим Андикон вилояти Адабиёт музейи бўлими мудири бўлиб ишга ўтганларидан кейин, турли нашиётлар, адабиёт муҳиблари, шеър ихлосмандларидан кўплаб хатлар ола бошладилар.

Ибратли томони, мактуб эгаларини тўла қаноатлантирувчи жавоб қилиш ҳаракатида бўлардилар.

Жумладан, 1981 йилнинг 21 апрелида адабиётшунос Ваҳоб Раҳмоновдан шундай мактуб олдилар:

«Муҳтарам Амонуллохон aka!

Сиз шоир Абдулваҳоб Сайфий билан шахсан таниш кишисиз. У шоирнинг ижодий маҳсуллари Сизга аён. Шунинг учун Сиздан мени қизиқтирган бир масалани ойдинлаштиришга ёрдам сўрайман.

Маълумки, Сайфий Фурқат ҳақида достон ёзганидан сўнг, мактаб программаларига бирданига иккита шеъри «Соғиниши» ва «Туф» кириб келди ва дарслик - хрестоматиялардан жой олди. Мен «Гулистан» журнали орқали (1975, № 6) чиқишимда «Соғиниши» ғазалининг автори масаласида баҳс юритган эдим. Энди навбат «Туф» шеърига келди. Менинг мулоҳазамча, ҳеч қаерда ёзма нусхаси бўлмаган бу ҳажвий асарни шоир Сайфий Фурқат тилидан ижод қилиб, ўз достонига киритган. Турли сабаблар

билин мактаб программаси ва дарсликларидан чиқиб кетган бу шеър олий мактаблар учун ёзилган «Ўзбек адабиёти тарихи» (учинчи қисм) дан мустаҳкам ўрин олган. Унда шеър тексти тўла эълон қилинган бўлиб, тегишлича таҳлил ҳам қилинган.

Агар шу шеър биографиясидан воқиф бўлсангиз, мактуб орқали ўз мулоҳазангизни билдирангиз. Рухсат этсангиз, Сизнинг жавобингизни матбуотдаги чиқишилари мизда ёритсак. Малол келмаса, билобетавақкуф ўзрай-ларини эшиттирсалар.

Сизга дуои салом билан камина **Ваҳоб Раҳмонов**.

21 апрел, 1981 йил, Балдаи Шош.

Қиблагоҳимнинг В. Раҳмоновга жавоб мактублари:
«Ассалому алайкум, ҳурматли Ваҳобжон!

21 апрелда ёзган мактубингизни олдим. Мени эслаганингиз учун миннатдорман.

Мактубингизда тилга олиб ўтилган масала юзасидан менга маълум нарсалар борасида қўйидагиларни айта оламан.

Ўзингиз айтиб ўтганингиздек, Абдулваҳоб ака Сайфий билан жуда яқиндан таниш эдим. Андижон адабий муҳити вакиллари билан қарийб кунда учрашар ва сұхбатларидан баҳраманд бўлар эдим. Шу сабабдан мазкур адабий муҳитнинг айрим намояндлари Тошкентда туриб қолганларидан кейинги вақтларда у ерга йўлимиз тушса, албатта, Абдулваҳоб ака (Сайфий), Муҳаммад Зокир ака (Ҳабибий), Мунирхон ака (Муинзода), Абдулаҳад ака (Анисий), Собир ака (Собир Абдулла)лардан ҳол-ахвол сўрамасдан қайтмас эдик. Абдулваҳоб ака Самарқанд дарвозадаги пионерлар лагерида боғбонлик қилаётган кезларида уни истаб бир борганимизда у кишини ижодий иш устида учратдим. Мени самимий кутиб олди. Дарҳол сабзи-пиёз арчишга бошладик (Рафиқаси Ойшахон опа, ўғиллари Восеъжон ва Ирфонжонлар аллақаёққа кетишган экан).

Узок ўтириб сұхбатлашдик. Абдулваҳоб ака Фурқатнинг ҳаётига оид бир достон бошлаганлигини айт-

ди ва унга киритиладиган, Фурқат тилидан ёзиладиган баъзи шеърларни кўрсатди. Улар орасида Сизни қизиқтирган ҳар иккала газал ҳам бор эди. Уларни кўриб чиққач, мен ундан менга англашилмаган баъзи нарсаларни сўрадим.

Биринчи саволим, Сизда «Согиниш» деб тилга олинганд ғазал эди:

- Абдулваҳоб ака, бу газалнинг айрим мисралари, менга танишдек туюлди. Илгарироқ ёзилган бирор нарсадан эмасми?

- Тўгри, - деди Абдулваҳоб ака, - баъзи мисралари, умуман, ғазал усули Нодиранини.

Нодира Амирийнинг вафотларидан кейин, жуда қаттиқ изтиробда қолган пайтларида ёзган газалларидан бирининг баъзи жойлари.

У мен тасвирлаётган Фурқатнинг ахволи руҳиятига мос бўлганлигидан, шу ғазалга тазмин қилдим. Фарқ шундаки, «шаҳсувор» каби сўзлар «диёр» каби ифодаларга алмаштирилди. Бундан ташқари, Фурқат меросида тазминнинг янгича услуби учратилади. Масалан, форсийдаги «Нест» радифли ғазални олиб кўринг. Табризий, Хисрав, Бедил ва бошқаларнинг асарларидан мисралар ёки мисранинг қисмлари олинган.

(Қаранг: Фурқат, Асарлар, 1960 й. 211 – 212-бетлар.
- А. В.)

Тазминнинг Фурқат қўллаган шу услубидан фойдаланишда Нодира ғазалидаги изтироблар шиддати бу ерда кучайтирилди.

Мен яна бир нарсани аниқлаб олмоқчи бўлиб сўрадим:

- Абдулваҳоб ака, мана бу ғазални ҳам Фурқат тилидан ёзибсиз. Лекин Фурқат даврида шу радиф ва услуб («Туф» радифли ғазал назарда тутилмоқда - А. В.) худди шу шаклда бўларми эди?

- Бу саволингиз ҳам ғоят ўринли, - деди Абдулваҳоб ака. - Фурқат яшаган давр услуби бундан бир оз бошқачароқ эди. - Лекин мен бугунги кундаги ўқувчига

етиб боришини назарда тутиб, Фурқат изтироб - нолала-
рини очиқроқ ифодалашга уриндим.

Менга ҳамма нарса равшанлашди ва фақат бир нар-
сани аниқлаш қолган эди холос. Уни ҳам сўрадим:

- Бу шеърларда тахаллус «Фурқат» бўлганидан
муголабага тушувчи ўқувчилар бўлмасмикин?

- Бу шубҳангиз ўринсиз, - деди Абдулваҳоб ака ку-
лимсираб, - дуруст, Фузулий «Лайли ва Мажнун»ида ўз
такаллусини ишлатган. Лекин сўнгги пайтларда бундай
қилинмаяпти. Воеани баён этишда, бу сўнгги усул, асар-
лар билан узвий алоқага киришиб кетувчи «кўчир-
ма»лардан фойдаланилмоқда. Шунинг учун бўлса керак,
Собир Абдулладан тортиб, бир қатор шоирлар бу услуб-
ни кенг қўллашмоқда.

Энди «муголаба» масаласига келсак, Фурқат билан
менинг услубимни фарқ қилмайдиган кишилар ҳам бўлар,
лекин улар адабиётдан анча йироқ кишилардир. Ҳозир
ўзингиз аввалги саволларингизда услугуб масаласини сўра-
дингиз. Демак, уни фарқлаш мумкин экан. Ахир адабиёт-
га қизиқувчилар, айниқса, адабиётшунослар шеърдаги
услубни билмайдиган бўлади, деб ўйлайсизми?

Ваҳобжон! Бунча дуру дароз сўз суришимдан муро-
дим шулки, айрим адабиётшуносларнинг бепарволигидан
ҳар қайси шоирнинг «ўзлиги», «ўзига хослиги», услуги
илмий тадқиқотда назардан четда қолдирилиши
оқибатида, баъзи бир чалкашликлар ҳозиргача ҳам ҳукм
суроётганлигидан афсусланишдир.

Энди Сиз томонингиздан менга бир таъна ўринли бў-
лур эди:

- Нега шулар тўғрисида илгарироқ гапирилмади?

Гап шундаки, титуллари ярим қофозга сигмайдиган
«адабиёт арбоблари»га қарши кичик бир математика му-
аллимининг чиқишига ким ўрин беради?

Ҳурматли Ваҳобжон! Агар бу мактубдаги фикрларим
сизга бирор манфаат бера олса, бундан мамнун бўлар
эдим.

Фурсатдан фойдаланиб, Сизни ва оила аъзоларин-
гизни баҳор байрами билан табриклайман ва адабиёт

жонкуярлиги соҳасидаги ишларингизда улкан илгарилашлар тилайман.

Камоли эҳтиром билан **А. Валихонов.**

26.04.1981 й.

Мазкур мактуб санасига эътибор қилинса, унда дадамга хос яна бир фазилатни, яъни мактубларга маъсъулият, эътибор билан қараш билан бирга уларга ўз вақтида, кечиктирмай, мукаммал жавоб қайтаришга интилишни кўриш мумкин.

Ушбу мактублар дадам «кичик математика муаллими» бўлсалар-да, унинг Шарқ адабиётини, тиљшуносликнинг энг нозик нуқталарини ва уларга алоқадор фанлардан чуқур боҳабарлигини, ҳаётнинг турли жабҳаларини мукаммал билишларини, улар ҳақида теран мушоҳада юритиб, муносабатларини билдира оладиган кишилардан эканлигини тасдиқловчи ҳужокатлар сирасига киради.

Иброҳим Фофуров мактублари:

«Ҳурматли Амонуллохон aka! Ассалому алайкум!

«Ўзбекистон адабиёти» газетасида эълон қилинган (3 сентябр, 1982 й.) А. Рустамовнинг «Матнчилигимииздаги нуқсонлар» мақоласига кўзингиз тушган бўлса керак. Мақоланинг давоми 10 сентябрда босилмоқда. Масаланинг жуда муҳимлигини назарда тутиб, шундай «оғриб» етилган масалани кўтармоқдамиз. Муҳокамага адабий меросимизни нашр этиш ишларидан яхши хабардор олимларни жалб этишни истардик. Сизга мурожаат этаётганлигимизнинг боиси ҳам шу.

Амонулло aka! Газетанинг ушбу муҳокамасида ўз эътиборли мулоҳазаларингиз билан қатнашсангиз, беҳад миннатдор бўлурмиз. Сиздан шу ҳақда тайин жавоб кутаман. Агар ёзишга рози бўлсангиз, мақолангиз қачон тайёр бўлади?

Сизга соғлиқ тилаб, **Иброҳим Фофуров».**

«Муҳтарам Амонулло aka! Салом! Хатингизни олдим. Таклифимизга рози бўлганингиздан бағоят хурсандман.

Сиз «Правда Востока» бирлашган нашриёти чиқарған йилтироқ мұқовали, ичига миниатюра безаклар илова қилинганды Шарқ классик шоирлари кутубхонасида чиқарылған Навоий, Саъдий, Хайём, Махтумкули сингари шоирларнинг китобларини күрган бўлсангиз керак. 1979 йилдан бошлаб шу сериядаги китобларни биз чиқарадиган бўлдик.

Сизга Увайсий ғазалиётини тайёрлаб беришни айтганда, ушбу серияни назарда тутган эдик. Бу серияда чиқадиган китобларнинг ҳажми 5,0 табок, яъни 3500 сатр шеърдан иборат, қисқача сўзбоши ҳамда энг қийин сўзлар ва изоҳлар учун лугат.

Мен мана шу тартиб ва мана шу ҳажмдаги ишни бизга 1980 й. май ойларига қадар тайёрлаб бера оласиз, деб умид қиласман.

Сизга тандурустлик ва файзу шукуҳ, ободончилик тилайман, **Иброҳим Фофуров**.

17 октябр, 1979 й.

**«Тошкент» бадиий адабиёт нашриёти,
А. Мираҳмедов мактуби:**

«Ҳурматли ўртоқ Қосимов (Улфат) ва Валихонов (Боқир)!

«Тошкент» бадиий адабиёт нашриёти Сизга маълум қиласиди, нашриётнинг хорижий Шарқ халқлари адабиёти бўлими машҳур шоир Абдураҳмон Жомий шеърларини ўзбек тилида чиқаришни планлаштируди. Китоб 12 п.л. дан иборат бўлиб, шу йил нашрга топширилиши керак. Ушбу шарафли ишга ҳисса қўшиш мақсадида қўлингизда мавжуд тайёр шеърларни зудлик билан бизга юборишингиз ва яна қайси асарларни, қай муддатда тайёрлаб беришингиз мумкинлиги тўгрисида хабар қилишингизни сўраймиз.

Эҳтиром билан хорижий Шарқ халқлари адабиёти бўлимининг мудири: **А. Мираҳмедов**.

**Дадамнинг «Тил ва адабиёт» журналига
ёзган мактубидан:**

Хурматли Наймжон! Ассалому алайкум!

Сизга ишонилган журналда қофия борасида муноза-
рага ўхшаш бир саҳифа очмоқчи экансизлар ва унга ме-
нинг иштирок этишим мумкинлигини, балки дурустлигини
айтган экансиз. Менга бундай ишонч билдирганингиз учун
Сизга чексиз миннатдорчилигимни билдиргач, Сиздан бу
мақоланинг структураси, ҳажми, юбориладиган вақти
ҳақида справка олмоқни зарур, деб билдим.

Менинг бундай мақола билан илмий журналда ишти-
роким муҳтарам олимларимиз олдида одоб доирасидан
ташқари бўлиши, ёки аксини мулоҳаза қилгандирсиз, деб
умид қиласман.

Камоли эҳтиром билан зътиборингиздан четда
қолмаганидан қаноат ҳосил қилган дўстингиз **Амонулло
Валихонов**.

15.12.1972 йил.

Қўйидаги мактуб дадам қўшиқларини севиб тингла-
ган етук ижрочимиз Берта Давидова қаламига мансуб:

«Хурматли О. Валихонов!

Сизнинг менга «Республикада хизмат кўрсатган ар-
тистка» деган шарафли унвон берилиши муносабати би-
лан юборган табрик хатингизни ва шоир Ҳабибий орқали
юборилган ғазалларингизни олдим. Менга бўлган зўр
эҳтиромингиз учун катта раҳмат!

Сизнинг ҳам ижодингизда катта муваффақиятлар
ҳамда оила аъзоларингизга баҳт, сихат-саломатлик ва
узоқ умр тилайман деб: **Берта Давидова**.

26.02.1960 йил.

Мактублар катта тарихнинг, инсон оламининг бутун-
лигини таъминловчи, инсон баён қила олмайдиган яширин
қирраларини кашф қилувчи, тарихга, тақдирга маълум
аниқлик киритувчи беназир шоҳид. Унинг қаърига инсон
қалби, идроки, унга хос феъл-атвору бетакрор қиёфа
муҳрланган.

СҮНГГИ СЎЗ ЎРНИДА

2006 йилнинг январ ойи қаҳратони. Қиблагоҳим тавалудларига 80 йил тўлган кунларда ушбу рисолага сўнгги нуқта қўйишга тараддулданар эканман, бу ёдноманинг яратилиши осон кечмаганлигини, унда қанча-қанча одамларнинг хизматлари борлигини, уларнинг даъвати, рағбати, ҳимояти ва ҳатто «таъна-дашномлари» каминага илҳом бахш этганлигини, менда журъат пайдо қилганлигини миннатдорлик билан эътироф этаман.

Китобнинг яратилишида 1995 йилда Андижон адабиёт музейи ташаббуси билан ўтказилган Боқир тавалудининг 70 йиллиги тантана кечаси ва унда иштирок этган кишиларнинг хотиралари, уларнинг дадамларга қайноқ муҳаббатлари, самимиятлари, менга катта куч, илҳом, журъат бахш этди.

Дарҳақиқат, ушбу маросимни очган Андижон Адабиёт ва санъат музейи директори Тўлқин aka Қўлдошевнинг сўзлари:

«Амонуллохон aka Валихоновдек инсон дунёга кела-вермайди.

Биз бугун улуг, шу билан бирга ўта камтарин инсоннинг 70 ёшларини хотирлаб нишонлар эканмиз, уни нафақат вилоят миқёсида, балки республика миқёсида хотирлаш вақти келганлигини таъкидлашимиз зарур.

У кишининг музей учун тўплаган манбалари, адабиёт-шунослигимизнинг долзарб муаммолари юзасидан эълон қилган соф илмий мақолалари ва келажак авлод учун қолдирган қатор бадиий-илмий асарлари у киши учун айтилиши лозим бўлган ҳар қандай таҳсindан юқори туради.

Биз уларни ворисларига етказиб бера олсаккина, уларни авайлаб сақлай олсаккина ўз олдимизга қўйган вазифаларни уddaляпмиз, деб айта оламиз».

Андижон Давлат тиллар педагогика институти ўзбек тили ва адабиёти кафедрасининг мудири, дадамнинг дўстти қадрдони бўлган Фатҳиддин домла Исҳоқов:

«Амонуллохон ака баркамол инсон эди. У киши одамий эди.

Халқимиизда: «Олим бўлсанг, олам сеники», деган гап бор. Унинг замирида ҳақиқий олимнинг оламни бутун борлигicha кўра олиши тушунчаси ётар экан.

Амонуллохон ака шундай баланд чўққига (илм чўққисига) чиқиб туриб, оламни кўра олган инсонлардан эди.

У киши ўз илми билан жуда кўп одамларни қарздор қилиб кетди. У ана шундай мукаммал, ҳақиқий баркамол инсон эди. У киши - бошқа дунё кишиси эди».

Сайфиддин ҳожи ака Жалиловнинг мазкур йигинда: «...Амонуллохон Бокирдан анчагина бадиий ва илмий мерос қолган. Буларни қунт билан ўрганиш, таҳлил қилиш ва нашрга тайёрлаш келгусининг вазифасидир. Зеро, Бокир Андикон адабий мұхитида ўз ўрнига эга ва унинг ривожига сезиларли таъсир кўрсатган» деганликларидан ташқари, биз билан учрашганларида «мерос ишлари қандай кетаётганлигини» суриштириб туришлари менга «калтак» бўлди.

Албатта, илк бор кўлига қалам тутган ва Яратганинг ўзига таваккал қилиб, ўз ҳадди-имкониятидан ташқари бўлган қалтис ишга қўл уришга журъат этган бу ожизанинг саҳв, хатолари қиблагоҳим мухлислари томонидан афв этилгай ва ушбу рисола сабаб, у киши ҳақида айтилган ҳар бир хайрли гап дадамнинг руҳларини шод этишга хизмат қилар.

Ушбу рисолани қиблагоҳимга дил изҳори сифатида қуйидаги марсия билан тугатишни маъқул кўрдим:

(Собир Абдулланинг шоир Сайфийга бағишлиб ёзган марсиясига ўхшатма)

«Келиб гул фасли боз сенсиз, қизил гул бағри қон сенсиз,
Узумзор бемиришкору, очилмиш арагувон сенсиз»,
Чекар нола фироқинг ёдида бул ошиён сенсиз,
Варақлар саргайиб, ҳам ҳома¹ қолди нотавон сенсиз,

¹ ҳома (ф.) - қалам

Ки ҳижрон домига түшди қогозу хома, жон сенсиз,
«Юриб согу-саломат, бир даме ёнбошладинг, кетдинг,
Тугатмай ёзганинг, нозик сатрлар бошладинг, кетдинг»,
Тилиб бағрам, тилимлаб тилка-тилка, ташладинг, кетдинг,
Құйиб дөг қызларинг күксига, құзни ёшладинг, кетдинг,
Бу дөнү ҳам бу мотам үтіда қуйди жағон сенсиз.
Құзимга түтіе - юрган йұлғында изларинг қолди,
Етимлик әхкемінде икрор, бүзлаб қызларинг қолди.
Күнгілда шеърга пайваст, үйга чүмган кезларинг қолди,
«Фұзилий, Фурқатона күкдә шахбоз¹ сүзларинг қолди,
Китобинг халққа манзур бўлди, бу сендан нишон сенсиз»,
Қалам аҳли орасида улуг бир тог эдинг сен ҳам,
Ижодинг ҳосили мўл, мевали бир бояз эдинг сен ҳам,
Ки, дўстлар даврасида доимо қувноқ эдинг сен ҳам,
«Күлиб завқи маҳаббат бирла, күнгил чоғ эдинг сен ҳам,
Агар тўпланса аҳбоблар, бу сүҳбат ҳар қачон сенсиз».

¹ шахбоз (ф.) - лочин.

ФОЙДАЛАНИЛГАН АДАБИЁТЛАР:

1. Ўзбек совет энциклопедияси, Тошкент, Ўз ССР ФА, 1979, 12-жилд.
2. Даут Абдулимович Исиев. Уйгурское государство Йэттишаар (1864-1877) М.«Наука». Главная редакция восточной литературы, 1981.
3. Бўрибой Аҳмедов. Тариҳдан сабоқлар. Тошкент, «Ўқитувчи», 1994 йил.
4. Ибрат (Исҳоқхон Жунайдуллохўжа ўғли) Фарғона тарихи. Тошкент, «Камалаю», 1991 йил.
5. А. Зоҳидий. Маҳдуми Аъзам сийрати ва мероси. Тошкент, «Адолат», 1996 йил.
6. Жўрахон ҳожи Сайид Авлиёҳон. Мовароуннаҳр саййидлари.
7. Алишер Бек. Туркийзабон саййид авлодлари. Шажара, 1-китоб.
8. Омонбой Жалилов. Шарқий Туркистон хожаларидан Маҳдуми Аъзам авлодлари шажараси. «Туркистон тарихи» журнали, 1994, август.
9. Омонбой Жалилов. Офоқ хожа. «Мулоқот» журнали, 1993, май-июн.
10. Акмал Акрам ўғли. Қошғарнинг сўнгти амири. «Туркистон» газетаси, 1992, август.
11. Исоҳон Юсуфхон ўғли. Маҳдуми Аъзам - пайғамбар авлодидан. «Коммунист» газетаси, 1991, апрел.
12. «Улар хотираси барҳаёт» (тўплам). Тошкент. «Янги аср авлоди», 2003 йил.
13. Тўхтасин Жалолов. «Ўзбек шоирлари». Тошкент, Fafur Fулом номли нашриёт, 1980 йил.
14. Тўхтасин Жалолов. «Бону». Т. «Ёш гвардия», 1963.
15. Улфат. Зебо сабаб. Тошкент. «Ғ. Фулом», 1983.
16. Улфат. Гулбог (Девон). Тошкент, «Ғ. Фулом», 1988.
17. «Андижоннома», «Ўзбекистон маданияти», «Ўзбекистон адабиёти ва санъати» газеталари таҳламалари.
18. Дадамнинг шахсий архиви материаллари.
19. О. Жалилов. Офоқ хожа манақиби. Андижон. «Мерос». 2004 й.
20. Новейшая история Китая. М. Наука, 1984.

МУНДАРИЖА

Масъул мұхаррирдан	3
Китобнинг ёзилиши сабаби	7
Пурвиқор қоялар бағридаги чашма	11
Чарх кажравлигин енгиб	25
Хуш кечар умрим менинг	58
Мактубларда жилоланган тарих	82
Сўнгги сўз ўрнида	99
Фойдаланилган адабиётлар	102

**Муаллиф мазкур китобнинг дунё юзини кўришига
молиявий кўмак берганлиги учун Андижон шаҳридаги
Алишер Навоий номли маданият ва истироҳат бори
директори Раҳимжон Умаровга самимий миннатдор-
чилик изҳор этади.**

Илмий-оммабол нашр.

Музайяна Амонуллохон (Боқир) қизи

БОҚИРНОМА

ёҳуд дадам ҳақида (Хотиралар)

«Andijon nashriyot-matbaa» ОАЖ. 2006 й.

Муҳаррирлар
Техн. муҳаррир
Мусахҳих
Компьютер устаси

М.Худоёров, Ҳ. Турсунматов
М. Мирзакаримова
Н. Тоҳиматова
А. Исмонов

Босмахонага 2005 йил 5 августда топширилди. Босишга
2006 йил 29 марта рухсат этилди. Бичими 84x108 1/32. Ҳажми
6,75 босма тобоқ. Panda BUKVAR гарнитураси.

Буюртма №661. Тиражи 500 нусха.

«Andijon nashriyot-matbaa» ОАЖ босмахонасида чоп этилди.
Манзил: Андижон шаҳри, Навоий шоҳкӯчаси, 71.